

પ્રેષિતાહા કામ પ્રસ્તાવના

પ્રેષિતાહા કામહા ચોપડી લુકા લોખલી હારી ખોબાર જાઅને પારવાયેહે, તાઅને પ્રેષિતાહા કામહા ચોપડી શુરવાત ઓઅેહે, પેલ્લી મંડળી ઉત્તરી નુસાર ઈસુ ખ્રિસ્તા શિષ્ય હારી ખોબારેલ ચેરસાલેમ થી લેયને, ચહૂદીયા લોક, સામરિયા, એને બોદા દુનિયામાય લેય ગીયા, કહાની ખ્રિસ્તા હોરગામાય જાઅના એને પચાસમા દિહયા ઘટના થી સુરુ ઓઅેહે. જેહેકોય ગેર ચહૂદી લોકહાય હારી ખોબારે જવાબ દેયના સુરુ કોઅય દેનલા હેય, દિયાન પાઉલ એને આ મિશનરી મુસાફરી માય બદલાય જાહે. પ્રેષિતાહા કામ ચાર હારી ખોબારે એને બાકી નોવા નિયમા વોચમાય ચોક વાટ બોનાડેહે, જ્યામાય દેખાડલા ગીઅલા હેય કા પ્રેષિતાહાય ખ્રિસ્તા કામહાલ કેહેકેન કોઅયા એને પ્રકાશના માધ્યમથી રોમી લોકાહાહારી ચોક ઈતિહાસિક વાત કોઅય દેની, પ્રેષિતાહા કામ ઈ ચોપડી લુકાથી લોખલી બેન નોવા નિયમા ચોપડીમાઅરે બીજી ચોપડી હેય, લુકા લોખલી હારી ખોબારે હારકા, પ્રેષિતાહા કામબી લુકા હાંગાત્યો થીયોફિલૂસાલ લોખલાં ચોક પત્ર આતા, ચાલ લગભગ ઇસવી સન 62-64 માય લોખલાં ગીઅલા આતા.

પ્રસ્તાવના

¹ માનનીય થીયોફિલુસ, મા પેલ્લી ચોપડીમાય, જું માયે તોહાટી લોખલી આતી, માયે આ કોલહોક ચીજહે બારામાય લોખ્યાં જું ઈસુય કોઅલા આતા એને હિકાડલા આતા જાંવલોગુ તો હોરગામાય લેવાય નાંચ ગીઅલો આતો.

² બાકી ઈસુલ પોરમેહેરાકોય હોરગામાય લેય લાં પેલ્લા, આય પવિત્ર આત્મા સામર્થ્યાકોય આ પ્રેષિતાહાલ આગના દેની.

³ ઈસુય દુઃખ ઉઠાવ્યા એને મોરણા પાછે બોજ પાક્કી સાબિતી કોઇન તો જીવતો હેય એહેકોય દેખાડયાં, એને ચાળીસ દિહયા લોગુ તો પ્રેષિતાહાલ દેખાતો રિયો, એને પોરમેહેરા રાજ્યા વાતો આખતો રિયો.

પવિત્ર આત્માલ વાટ જોવના

4 યોક સમય ઈસુવા શિષ્ય ચ્યાઆરે આતા તોવે ઈસુય ચ્યાહાન આગના દેની, “ચેરૂસાલેમ શેહેર છોડીન જાહા મા, બાકી તી દાન મીળે તાંવ લોગુ વાટ જોવાં જી પોરમેહેર આબહાય તુમહાન દેઅના વાયદો કોઅલો આતો, જ્યા બારામાય તુમા માયેપાઅને વોનાય ચુક્યાહા.

5 કાહાકા યોહાનાય તે પાઆયાકોય બાપતિસ્મા દેનલા હેય, બાકી કોલહાક દિહયા પાછે પોરમેહેર તુમહેઆરે રાંહાટી પવિત્ર આત્મા દોવાડી.”

6 પાછે જોવે પ્રેષિત બીજેદા ઈસુલ મિળ્યાં, તોવે ચ્યાહાય ઈસુલ પુછ્યાં, “ઓ પ્રભુ, કાય ઈસરાયેલાલ છુટકા કોઅના એને આપહેરાજ્યા પાછો સ્થાપન કોઅના તો સમય યેય ગીયહો?”

7 ઈસુય ચ્યાહાન આપ્યાં, “તો સમય એને ચ્યો વાતો કોવે ઓઅરી, ચ્યા બારામાય જાઅના પોરમેહેર આબહાલ ઓદિકાર હેય, ઈ તુમહાન જાઅના ગોરાજ નાંચ હેય.

8 બાકી જોવે પવિત્ર આત્મા તુમહેવોય યેઅરી તોવે તુમા સામર્થ્ય મેળવહા; એને ચેરૂસાલેમ શેહેરામાય એને બોદા યહૂદીયા એને સમરૂન વિસ્તારમાય, એને બોદા દુનિયામાય લોકહાન મા બારામાય સાક્ષી દાહા.”

ઈસુ હોરગામાય જાયના

9 ઈ આખીન ઈસુ ચ્યાહા દેખતા-દેખતાજ પોરમેહેરાય ચ્યાલ હોરગામાય લેય લેદો, એને વાદળાં લીદે ચ્યે ચ્યાલ આગાડી નાંચ દેખી હોક્યે.

10 એને ઈસુ જાતી સમયે જોવે ચ્યા આકાશા એછે એઅઇ રીઅલા આતા, તોવે અચાનક, બેન માટડા ઉજળેં ડોગલેં પોવલા ચ્યાહા પાહી યેયન ઉબા રિયા,

11 એને ચ્યાહાન એહેકેન આપ્યાં, “ઓ ગાલીલ ભાગામાય રોનારા માઅહાય, તુમા કાહા ઉબા રોયન ઉચે આકાશા એછે એઅઇ રીયહા? ઓજ ઈસુ, જ્યાલ પોરમેહેરાય તુમહે પાહીને હોરગામાય લેય લેદલો હેય, તુમા ચ્યાલ જેહેકેન આકાશામાય જાતા દેખ્યાહા તેહેકેન તો પાછો યેઅરી.”

મિળીન પ્રાર્થના

12 જોવે બેન માટડા જાતા રિયા તોવે શિષ્ય જૈતુન નાંવા ડોગાવોયને જો યેરૂસાલેમ શેહેરા છહને યોક કિલોમીટર દુઉ હેય, યેરૂસાલેમ શેહેરામાય પાછા યેના.

13 એને જોવે શિષ્ય યેરૂસાલેમ શેહેરામાય પોઅચ્યા તોવે ચ્યા ઉચલી ખોલીમાય ગીયા. તાં પિત્તર, યોહાન, યાકૂબ, આંદ્રિયાસ, ફિલિપ, થોમો, બરથલ્મી, માથ્થી, અલફિયા પોહો યાકૂબ, સિમોન જેલોતોસ, એને યાકૂબા પોહો યહૂદા રા આતા.

14 ચ્યા બોદા એને તાં ચ્યાહાઆરે કોલ્યોહોક બીજ્યોબી થેઅયો આત્યો જ્યેહેય ઈસુલ મોદાત કોઅલી આતી એને ઈસુવા આયહો મરિયમ એને ચ્યે બાહાહા આરે યોકચીત્ત ઓઇન પ્રાર્થનામાય લાગી રોત.

યોક નોવા પ્રેષિતા નિવડ

15 એને ચ્યાજ દિહીહયામાય જોવે લગભગ યોક હોવને વિહી વિસ્વાસી યોખઠા આતા, તોવે પિત્તર ચ્યાહા વોચમાય ઉબો રોચન આખા લાગ્યો.

16 “ઓ બાહાહાય, પવિત્ર આત્માય બોજ સોમાયા પેલ્લા રાજા દાઉદા કોય યહૂદા બારામાય આખ્યાં, જો ઈસુલ દોઆડનારા લોકહા આગેવાની કોઅનારો બોની ગીયો, ઈ જરુરી આતાં કા યહૂદા બારામાય પવિત્રશાસ્ત્રમાય લોખલાં હેય તી હાચ્યાં સાબિત ઓએ.

17 કાહાકા તો આપહે માઅને યોક આતો, એને યે સેવાયેમાય ભાગી જાયલો આતો.

18-19 જેહેકેન તુમા જાંઅતેહે કા, યહૂદી આગેવાનહાય યહૂદાલ પોયહા દેના જોવે ચ્યાય ચાલાકી કોઇન ઈસુલ દોગો દેયના વાયદો કોઅયો, પાછે યહૂદાય ચ્યા પોયહા ચ્યાહાન પાછા ફેરવી દેના. એને જોવે યહૂદાય ગોળ ફાંસ લાવી લેદા, એને ચ્યા શરીર દોરતીવોય ટુટી પોડ્યા, ચ્યા બુકો ફાટી ગીયો એને ચ્યા બોદે આતે બાઆ નિંગી યેને, યાહાટી યહૂદી આગેવાનહાય ચ્યા પોયહાકોય યોક રાન વેચાતાં લેદા. યેરૂસાલેમ શેહેરામાઅને લોક યે વાતે બારામાય જાંઆય ગીયા, યાહાટી ચ્યા લોક ચ્યા જાગાલ ચ્યાહા ભાષામાય ‘હકલદમા’ એટલે ‘લોયા રાન’ એહેકેન નાંવ પાડ્યા.

20 કાહાકા રાજા દાઉદા ગીતશાસ્ત્રમાય એહેકેન લોખલાં હેય, ‘ચ્યા ગુઉ ઉજાડ એઅઇ જાઅરી, એને ચ્યામાય કાદાં નાંચ રોય’ એને ઈ બી લોખલાં હેય, ‘કાદો બિહરો ચ્યા પદ લી.’

21-22 યાહાટી ઈ જરુરી હેય કા ચોક ઓહડા માઅહાન નિવાડલા જાય, જો પ્રભુ ઈસુવા કામહા બોદયે સમયે સાક્ષી હેય, એને પ્રભુ ઈસુલ યોહાનાકોય બાપતિસ્મા દેના ચ્યાપાઅને લેયને ઈસુલ પોરમેહેરાકોય હોરગામાય લેય લેઅના લોગુ ઈ માઅહું પ્રભુ ઈસુ મોઅલા માઅને પાછા જીવી ઉઠના બારામાય સાક્ષી બોને.”

23 તોવે ચ્યાહાય બેન માઅહાલ ઉબા રાખ્યા, ચોક યુસુફ જો બર-સબ્બા આખાયેહે, જ્યા ઉપનાંવ યુસ્તસ હેય, બિજો મત્તીયાહ.

24 એને ઈ પ્રાર્થના કોઅયી, “ઓ પ્રભુ, તું જો બોદહા મોન જાંઅતોહો, આમહાન ઈ પ્રગટ કોઅો કા યા બેનહયા માઅને તુયે કાલ નિવડયોહો.

25 કા તો ઈ સેવા એને પ્રેષિત પદ લેય, જો જાગો યહૂદા છોડી ગીયો, એને મોઅઇ ગીયો એને ચ્યા જાગાવોય જાતો રિયો જાં ચ્યાલ રા જોજીતાં આતા.”

26 તોવે ચ્યાહાય ચ્યાહા બારામાય ચીઠયો ટાક્યો, એને મત્તીયા નાંવા ચિઠ્ઠી નિંગી, તોવે તો ચ્યા ઓગ્યાર પ્રેષિતાહા આરે ગોણાય ગીયો.

2

પવિત્ર આત્મા ચેયના

1 જોવે યહૂદી લોકહા પચાસમા દિહા સણ ચેનો, તોવે ચ્યા બોદા ચોક જાગે ચોકઠા જાયલા આતા.

2 એને અચાનક હોરગામાઅને મોઠા તુફાન રોકો ગોંગારના આવાજ ઓઅયો, એને ચ્યા બોઠલા આતા તી બોદા ગુઉ ચ્યા આવાજા કોય ગાજી ઉઠયા.

3 તોવે ચ્યાહા હોમ્મે ઓહડી આગ દેખાયી, જ્યે આકાર જીબ્યે રોકો આતો, જું આલાગ ઓઇન ચ્યાહામાઅને બોદહાવોય થોબતી ગીયી.

4 એને ચ્યા બોદા પવિત્ર આત્માકોય બાઆઈ ગીયા, એને જેહેકેન પવિત્ર આત્માય ચ્યાહાન બોલના તાકાત દેની, ચ્યે રીતે જુદી-જુદી ભાષામાય બોલા લાગ્યા.

5 એ સમયે, પોરમેહેરા દાક રાખનારા કોલહાક યહૂદી લોક આતા, જ્યા આકાશા નિચે દુનિયા બોદા દેશામાઅને સણ મોનાવાહાટી યેરૂસાલેમ શેહેરામાય યેનલા આતા એને યેરૂસાલેમ શેહેરામાય રોતા આતા.

6 જોવે ગોંગારના આવાજ ઓઅયો, તોવે ગીરદી ઓઈ ગીચી એને લોક ગાબરાય ગીયા, કાહાકા બોદા આપહે-આપહે ભાષામાય બોલતા વોનાય રીઅલા આતા.

7 આ બોદાજ ઓમકાયન એને નોવાય પામીન આખા લાગ્યા, “એઆ, યા જું બોલી રીઅલા હેય કાય બોદા ગાલીલ ભાગા માઅહે નાંચ હેય?”

8 તે ઈ કાય ઓઈ રીચહા જું આમહે માઅને બોદા જાંઆ આપહે-આપહે બોલી ભાષામાય વાતો કોઅતા વોનાય રીચલા હેય.

9 આપહે માઅને કોલહાક લોક પારથી વિસ્તારામાઅને હેય એને કોલહાક લોક મેદી વિસ્તારામાઅને એને કોલહાક લોક એલામી વિસ્તારામાઅને એને કોલહાક લોક મેસોપોટમિયા વિસ્તારામાઅને એને કોલહાક લોક યહૂદીયા વિસ્તારામાઅને એને કોલહાક લોક કાપાદોકિયા વિસ્તારામાઅને એને કોલહાક લોક પુન્તસ વિસ્તારામાઅને એને કોલહાક લોક આસિયા વિસ્તારામાઅને હેય,

10 એને ફુગીયા એને પંકૂલિયા વિસ્તારામાઅને હેય એને મિસર દેશ એને કુરેન શેહેરા પાહીને લિબિયા દેશા કોલહાક લોક, એને રોમમાઅને યેરૂસાલેમમાય યેનલા યહૂદી મુસાફીર,

11 એટલે કાય યહૂદી, એને કાય ગેર યહૂદી જ્યાહાય યહૂદી ધર્મ માની લેદલો, કેતે બેટવોય રોનારા લોક એને અરબી દેશાબી લોક હેતા, બાકી આપહે-આપહે ભાષામાય ચ્યાહાપાઅને પોરમેહેરા મોઠા-મોઠા ચમત્કારહા બારામાય બોલતા વોનાય રીઅલા હેય.”

12 એને આ બોદા નોવાય પામ્યા, એને ગાબરાય જાયને ચોકબિજાલ આખા લાગ્યા, “ઈ કાય ઓઈ રીઅલા હેય?”

13 બાકી બીજહાંચ ચ્યાહા મશ્કરી કોઈન આખ્યાં, “ચ્યા તે દારવા પીયને સાકી ગીઅલા હેતા.”

પયાસમા દિહી પિત્તરા સંદેશ

14 તોવે પિત્તર ચ્યા અગ્યાર પ્રેષિતાહા આરે ઉબો રિયો એને મોઠેરે બોબલીન આખા લાગ્યો, ઓ યહૂદીયા વિસ્તારા બાહાહાય, એને ઓ

ચેરૂસાલેમ શેહેરમાય રોનારા બોદા લોકહાય, ઈ જાઈલા, એને દિયાન દિન મા વાત વોનાય લા.

15 જેહેકેન તુમા હોમજી રીયહા, યા લોક સાકલા નાંય હેય, કાહાકા આમીતે હાકાળેહે નોઉ વાગ્યહે.

16 બાકી જીં આમહે આરે જાયા ઈ ચ્યો વાતો પુરાં ઓઅના હેય, જીં ચોયેલ ભવિષ્યવક્તાકોય પવિત્રશાસ્ત્રામાય પોરમેહેરાય આખલા આતા.

17 પોરમેહેર આખહે, કા છેલ્લા દિહાહામાય એહેકેન ઓઅરી, કા આંય મા આત્મા બોદા માઅહાલ દિહી, એને તુમહે પોહા એને તુમહે પોહ્યો ભવિષ્યવાણી કોઅરી, એને તુમહે જુવાન્યે દર્શન એઅરી, એને તુમહે ડાયા હોપને એઅરી.

18 ચ્યા દિહાહામાય આંય મા સેવાફ એને સેવાક્યે બાયહેનબી મા આત્મા દિહી, એને ચ્યે બી ભવિષ્યવાણી કોઅરી.

19 એને આંય ઉચે આકાશ માય પરાક્રમ, એને નિચે દોરત્યેવોય ચિન્હે એટલે લોય, એને આગ એને દુમાડા વાદળાં દેખાડીહી.

20 પ્રભુ ચેયના પેલ્લા દિહી કાળો પોડી એને આંદારાં ઓઈ જાઅરી એને ચાંદ લોય રોકો ઓઈ જાઅરી, તો દિહી બોજ મહાન એને ચોમકનારો દિહી ઓઅરી.

21 એને ચ્યા સમયા પેલ્લા જો કાદો પ્રભુવા નાંવ લેઅરી, તોજ તારણ મેળવી.

22 “ઓ ઈસરાયેલ લોકહાય, ચો વાતો વોનાયા, નાજરેત ગાવામાઅને ઈસુ ચોક ઓહડો માઅહું આતો, ચ્યા ચમત્કારા કામ એને નોવાયે કામ એને ચિન્હા કોય ચ્યાલ પોરમેહેરાય તુમહે હોમ્મે સાબિત કોઅલો આતો, તુમા પોતે ઈ જાંઅતાહા કા ઈ હાચ્યાં હેય.”

23 પોરમેહેરાકોય ઠરાવલી યોજના એને પેલ્લા જ્ઞાનાનુસાર, તો તુમહે આથામાય હોપાય ગીયો, તુમહાય ચ્યાલ ખારાબ માઅહા મોદાત લેયને ખીલા ઠોકીન હુળીખાંબાવોય ચોડવીન માઆઇ ટાક્યો.

24 બાકી ચ્યાલ પોરમેહેરે ચ્યા મોરણા બંધન માઅને છોડાવીન ચ્યાલ પાછો જીવતો કોઅયો, કાહાકા ઈસુલ મોરણા તાબામાંય નાંય રાખી હોકતા આતા.

25 કાહાકા દાઉદ રાજા ઈસુ બારામાય એહેકોય આખહે, “આંય મા

પોરમેહેરાલ કાયામ મા આગલા દેખતો રિયો, કાહાકા તો મા જમણા આથા એછે હેય, યાહાટી કા આંય ચ્યા લોકહાન નાંય બીઅયુ, જ્યા મા નુકસાન કોઅરા માગતાહા.

26 યાહાટી આંય આનંદાકોય બાઆય ગીયો, એને આંય આનંદાકોય તો સ્તુતિ કોઅતાહાંવ, એને મા શરીરબી આશામાય બોની રોહે.

27 કાહાકા તું મા જીવાલ અઘોલોકમાય નાંય જાં દેહે એને પવિત્ર માઅહા કુડીલ હોડી નાંય જાં દેહે.

28 તુયે માન જીવના વાટ દેખાડીહી; તું માન દર્શન થી તો હજર્યેમાય આનંદાકોય બોઅઇ દેહે.”

29 “ઓ બાહાહાય, આંય ડાયા દાઉદ રાજા બારામાય તુમહાન ઈમાતકોય આખી હોકતાહાવ કા તો તે મોઅઇ ગીયો એને દાટી બી દેનો એને ચ્યા કોબાર આજ લોગુ આપહે ઈહી હેય.

30 તો ભવિષ્યવક્તો આતો, તો જાંઅતો આતો કા પોરમેહેરાય કોસામ ખાયન ચ્યાઆરે વાયદો કોઅયેલ, કા આંય તો પીડી માઅને ચોકા માઅહાલ તો રાજગાદેવોય બોહાડિહી.

31 દાઉદ રાજાય ઈ જાઇન કા ભવિષ્યમાય કાય ઓઅનારા આતા, એને યાહાટી ચ્યે ઈસુ ખ્રિસ્તા મોઅલા માઅને પાછા જીવતા ઓઅના વાત કોઅચી, કાહાકા તું મા જીવાલ અઘોલોકમાય નાંય જાં દેહે એને પવિત્ર માઅહા કુડીલ હોડી નાંય જાં દેહે.

32 યાજ ઈસુવાલ પોરમેહેરે મોઅલા માઅને પાછો જીવતો કોઅયો, જ્યા આમા બોદા સાક્ષી હેજે.

33 આમી તો હોરગામાય પોરમેહેરા જમણા આથા મોઠા માનાપાના જાગાવોય બોઠલો હેય, એને આબહાય ઈસુલ પવિત્ર આત્મા દેના જેહેકેન ચ્યાય વાયદો કોઅલો આતો, એને ઈસુય પવિત્ર આત્મા આમહાન દેનલા હેય, જેહેકેન કા આજે તુમા એઅતેહે એને વોનાતેહે.

34 કાહાકા દાઉદ તે હોરગામાય નાંય ચોડયો, બાકી તો પોતે આખહે, ‘પ્રભુ પોરમેહેરાય મા પ્રભુવાલ આખ્યાં, તું મા જમણા આથા એછે બોહો.’

35 પ્રભુ પોરમેહેરાય મા પ્રભુવાલ આખ્યાં, ‘તું મા જમણે આથે બોહો, જાવ લોગુ આંય તુમહે દુશ્માનાહાન તુમહે તાબામાંય કોઇ દાવ.’

36 ચાહાટી, ઈસરાયેલા બોદાજ લોકહાન યે વાતહેબારામાય ખાત્રી ઓઈ જાય કા, પોરમેહેર ચ્યાજ ઈસુવાલ, જ્યાલ તુમહાય હુળીખાંબાવોય ચોડવ્યેલ પ્રભુ એને ખ્રિસ્તબી બેની કોરવ્યો.”

37 જોવે લોક ઈ વોનાયા, તોવે આપા બોજ દોષી હેજે એહેકેન જાંઅયા, તોવે ચ્યા પિત્તરાલ એને બિજા પ્રેષિતાહાલ પુછા લાગ્યા, “ઓ બાહાહાય આમા કાય કોઅજે?”

38 પિત્તરે ચ્યાહાન આખ્યાં કા, “પાપ કોઅના બંદ કોઆ, એને તુમહેમાઅને બોદા જાંઆ તુમહે પાપહા માફી મેળવાહાટી ઈસુ ખ્રિસ્તા નાંવે બાપતિસ્મા લાં, તોવે તુમહાન પવિત્ર આત્મા દાન મિળી.

39 કાહાકા ઓ વાયદો તુમહેહાટી, એને તુમહે પોહહાહાટી, એને ચ્યા બોદા દુઉ-દુઉને લોકાહાહાટી બી હેય, જ્યાહાલ પ્રભુ આમહે પોરમેહેર ચ્યા પાહી હાદી.”

40 પિત્તરે આજુ બોજ વાતો પાછી-પાછી આખીન ચ્યાહાન વિનાંતી કોઅયી કા તુમા પોતે યા આડી પેડયે થી બોચી જાં.

41 જું કાય પિત્તરે આખ્યાં, જ્યાહાય ચ્યાવોય બોરહો કોઅયો ચ્યાહાય બાપતિસ્મા લેદા, એને ચ્યેજ દિહી બોરહો કોઅનારા ટોળામાય લગભગ ત્રીન ઓજાર માઅહે જોડાય ગીયે.

બોરહો થોવનારાહા હારાં જીવન

42 એને ચ્યે પ્રેષિતાહા પાયને હિકના, ચ્યાહાઆરે મિળીન રોઅના એને ચ્યે પ્રભુભોજમાય ભાગી ઓઅતે આતે એને પ્રાર્થના કોઅરા દૃસતાથી લાગી રિયે.

43 એને યેરૂસાલેમમાય બોદા લોક ઘાકાય ગીયા, કાહાકા બોજ નોવાયે કામે એને ચમત્કાર પ્રેષિતાહાકોય ઓઅતે આતે.

44 એને બોદાજ બોરહો થોવનારા લોક ચોકઠા રોતા આતા, એને જું કાયબી ચ્યાહાપાય આતા તી બોદાંજ ચોખઠા કોઅતે આતે.

45 એને ચ્યે ચ્યાહા મિલકાત એને કાયબી સામાન વેચિન જ્યાહાલ જું ગોરાજ પોડતી આતી ચ્યાહાન વાટી દેતા આતા.

46 એને ચ્યે દિનેરોજ ચોક મોનાકોય દેવાળામાય બેગે ઓઅેત એને ગોઅહે-ગોઅહે પ્રભુભોજમાય ભાગી ઓઅે એને ઉદાર મોનાકોય આનંદાકોય ચ્યે ઈળી-મિળીન ખાઅના ખાતે આતે.

47 એને પોરમેહેરા સ્તુતિ કોઅતે આતે, એને બોદા લોક ચ્યાહાથી ખુશ આતા; એને જ્યા તારણ મિળવેત, ચ્યાહાન પ્રભુ દિનેરોજ ચ્યાહામાય મેળવી દેતો આતો.

3

લેંગડા બિખાર્યા હારાં ઓઅના

1 યોક દિહી પિત્તર એને ચોહાન બોપરેહે તીન વાગે પ્રાર્થના સમયે દેવાળામાય જાય રીઅલા આતા.

2 ઓલહામાય લોક યોકા જન્મા પાઅને લેંગડા આતા ચ્યા માઅહાલ લેઈને ચેત, ચ્યાલ દિનેરોજ દેવાળા બાઅણા પાય જ્યાલ સુંદાર નાંવા બાઅણા આખતેહે, ચ્યાપાય બોહાડી જાત, કા તો દેવાળે જાનારાહા પાયને બિખ માગે.

3 જોવે ચ્યાય પિત્તર એને ચોહાનાલ દેવાળામાય જાતા દેખ્યા, તોવે ચ્યાહાપાઅને બિખ માગી.

4 પિત્તર એને ચોહાને ચ્યાલ દિયાન દેયને એઅયા એને પિત્તરે આખ્યાં, “આમહે એછે એઅે.”

5 ચ્યાહાપાઅને કાય મિળી ચે આશોકોય તો ચ્યાહા એછે એઅરા લાગ્યો.

6 તોવે પિત્તરે આખ્યાં, “ચાંદી એને હોના તે માયેપાંચ હેયેજ નાંચ, જું હેય તી તુલ આંચ દેતહાવ, નાજરેત ગાવામાઅને ઈસુ ખ્રિસ્તા નાવાકોય ઉઠ એને ચાલતો લાગ.”

7 એને પિત્તરે ચ્યા જમણો આથ દોઇન ચ્યાલ ઉઠાડ્યો, એને તારાત ચ્યા પાગહામાય એને માંડયેહે માય તાકાત ચેની.

8 એને તો કુદીન ઉબો ઓઈ ગીયો, એને ચાલા-ફિરા લાગ્યો, એને ચાલતો, એને કૂદતો, પોરમેહેરા સ્તુતિ કોઅતો તો પિત્તર એને ચોહાના આરે દેવાળા બાઆપુર ગીયો.

9 બોદા લોકહાય ચ્યાલ ચાલતો-ફિરતો એને પોરમેહેરા સ્તુતિ કોઅતો દેખ્યો.

10 એને ચ્યાલ વોળખી લેદો કા ઓ તોજ હેય જો દેવાળા સુંદાર નાંવા બાઅણા પાય બોહીન બિખ માગે, એને ચ્યે ચે ઘટના કોય જું ચ્યાઆરે જાયલી, ચ્યે બોજ નોવાય પામીન ચમકાય ગીયે.

લોકહા ગીરધેલ પિત્તર હારી ખોબાર આખહે

11 જોવે તો માઅહું પિત્તર એને યોહાના આરે આતો, તે બોદા લોક બોજ નોવાય પામીન ચે બોદે સુલેમાના પારસાળા માય દાંહાદી ગીયે, જાં હારો ઓઅય ગીઅલા માઅહું પિત્તર એને યોહાનાલ ફીટ દોઅય રિઅલો આતો.

12 ઈ એઇન પિત્તરે લોકહાન આખ્યાં, “ઓ ઈસરાયેલી લોકહાય, તુમહાન યા માઅહાલ એઇન કાહા નોવાય લાગી? એને આમહે એછે એહેકેન કાહા દારી-દારી એઅતાહા? કા જેહેકેન આમહાયજ આમહે શક્તિ કા ભક્તિ તાકાતેવોય યા માઅહાલ ચાલા-ફિરા લાયકે બોનાડી દેનો.

13 આમહે આગલ્યાડાયા આબ્રાહામા, ઈસાકા એને યાફૂબા પોરમેહેરે, આપહે વડીલાહા પોરમેહેરે ચ્યા ચાકાર ઈસુવા મહિમા કોઅયી, બાકી તુમહાય ચ્યાલ માઆઇ ટાકાંહાટી યહૂદી આગેવાનહાન હોઅપી દેનો, એને જોવે પિલાત રાજાય ચ્યાલ ડૉડ દેઅનાથી મોનાઈ કોઇ દેના, તોવે તુમહાય પિલાતા હોમ્મે ઈસુ નાકાર કોઅયા.

14 તુમહાય ઈસુલ નાકાર કોઇ દેનો, જો પવિત્ર એને ન્યાયી હેય, બાકી તુમહાય ઈ માગણી કોઅયી કા ચ્યા બોદલે ખૂની માઅહાલ તુમહેહાટી છોડી દેય.

15 એને તુમહાય લોકહાન જીવન દેનારાલ માઆઇ ટાક્યો બાકી પોરમેહેરે ચ્યાલ મોઅલા માઅને પાછો જીવતો ઉઠાડયો, ચ્યા આમા સાક્ષી હેજે.

16 ખ્રિસ્ત ઈસુ નાવામાય બોરહો કોઅલા લીદે યા માઅહાલ જ્યાલ તુમા જાંઅતેહે, જ્યાલ તુમા યે સમયે એઅઇ રીયહે, ચ્યાલ તાકાત દેનલી હેય ઈ માઅહું ઈસુ નાવામાય એને ખ્રિસ્ત ઈસુમાય બોરહો કોઅલા લીદે બિલકુલ હારો હુદરી ગીઅલો હેય, જેહેકેન તુમા પોતે એઇ રીઅલા હેય.”

17 “એને આમી ઓ બાહાહાય, માન ખોબાર હેય કા તુમહાય એને તુમહે આગેવાનાહાય ઈસુલ જાંઅયા વોગાર માઆઇ ટાક્યો કાહાકા તુમહાન નાંય ખોબાર આતી કા તો ખ્રિસ્ત હેય.

18 બાકી જ્યે વાતહેબારામાય પોરમેહેરાય બોદા ભવિષ્યવક્તાહાકોય પેલ્લાજ આખલા આતા, કા ખ્રિસ્ત દુઃખ ઉઠાવી

એને માઆઇ ટાકલો જાય, એને ચ્યાય તી હાચ્યાં સાબિત કોઇ દેખાડ્યાં.

19 યાહાટી આમી તુમા પાપ કોઅના બંદ કોઆ, એને પોરમેહેરા એછે ફિરા કા તુમહે પાપહા માફી મિળી, તોવે પોરમેહેરાપાઅને આત્મિક સામર્થ્ય મિળી.

20 એને તો ઈસુલ દોવાડી, જો ખ્રિસ્ત હેય જ્યાલ તુમહેહાટી પેલ્લાથીજ નિવાડલા હેય.

21 ઈસુલ હોરગામાય ચ્યા સમયે લોગુ રોઅના જરુરી હેય, જોવે પોરમેહેર ચ્યે વસ્તુલ નોવી બોનાવી દી જ્યો ચ્યે બોનાવલ્યો હેય, બોજ સમાયા પેલ્લા પોરમેહેરાય લોકહાન ઈ આખાહાટી પવિત્ર ભવિષ્યવક્તાહાકોય એહેકેન કોઅના વાયદો કોઅયો.

22 જેહેકેન કા મૂસાય આખ્યાં, ‘તુમહે પ્રભુ પોરમેહેર તુમહે બાહાહા માઅને તુમહેહાટી મા રોકો ચોક ભવિષ્યવક્તાલ દોવાડી, જું કાય તો તુમહાન આપે, ચ્યા તુમા વોનાજા.’

23 બાકી જો કાદો માઅહું ચ્યા ભવિષ્યવક્તા નાંચ વોનાયે, તી માઅહું પોરમેહેરા લોકહામાય નાંચ રોય એને પોરમેહેર ચ્યાલ નાશ કોઅય દેઅરી.

24 શમુઅેલ ભવિષ્યવક્તા એને ચ્યા પાછે યેનારાહા આરે બોદા ભવિષ્યવક્તાહાયબી વાત આખ્યેલ યા દિહીહયામાય કાય ઓઅરી.

25 તુમા બોદા ભવિષ્યવક્તાહા વારીસ હેતા એને ચ્યા કરારા ભાગીદાર હેય, જો પોરમેહેરે તુમહે આગલ્યા ડાયહા આરે કોઅલો, કાહાકા પોરમેહેરાય આબ્રાહામાલ આખ્યાં, ‘તો વંશાકોય દોરતીવોય બોદા જાતી લોક બોરકાત મેળવી.’

26 પોરમેહેરાય ચ્યા ચાકારાલ મોઅલા માઅને પાછો જીવતો ઉઠાડીન બોદહા પેલ્લા તુમહેપાય દોવાડયો, કા આપહે માઅને બોદહાલ ચ્યાહા પાપી જીવના માઅને ફેરવી લેયને પોરમેહેરા બોરકાત દેય.”

4

પિત્તર એને ચોહાન

1 જોવે પિત્તર એને યોહાન લોકહાન ઈ આખી રીઅલા આતા, તોવે યાજક એને દેવાળા રાખવાળી કોઅનારાહા આગેવાન એને સાદૂકી લોક આહા હોમ્મે યેયન ઉબા રિયા.

2 એને બોજ ખિજવાય ગીયા, કાહાકા પિત્તર એને યોહાન ઈસુ બારામાય હિકાડતા આતા કા જ્યા લોક મોઅઇ ગીયહા પોરમેહેર આહાન મોઅલા માઅને પાછો જીવતો કોઅરી, જેહેકેન આય ઈસુલ મોઅલા માઅને પાછો જીવતો કોઅયો.

3 એને આહાય આહાન દોઓઈન બીજે દિહે લોગુ જેલેમાય થોવ્યા, કાહાકા રુવાળા પોડી ગીઅલા આતા.

4 એને જ્યે પ્રેષિતાહા સંદેશ વોનાયે, આહામાઅને બોજ લોકહાય ઈસુવોય બોરહો કોઅયો, એને બોરહો કોઅનારા માટડાહા ગોણત્રી બોદી મિળીન આમી લગભગ પાય ઓજાર લોગુ ઓઅય ગીયી.

પિત્તર એને યોહાન ચહૂદી સોબાયે હામ્મે

5 બીજે દિહી આહા આગેવાન, વડીલ લોક એને મૂસા નિયમ હિકાડનારા ગુરુ યેરૂસાલેમ શેહેરામાય ચોક જાગે યોખઠા જાયા.

6 જ્યા લોક સોબાયેમાય યોખઠા જાયલા આતા, આહામાય હન્ના મહાયાજક આતો એને કાયફા, યોહાન, સિકંદર એને બિજા જોલા મહાયાજકા કુટુંબમાઅને આતા આખી સોબાયેમાય સામીલ આતા.

7 એને પિત્તર એને યોહાનાલ વોયમાય ઉબા કોઇન પુછા લાગ્યા, “યા માઅહાલ હારાં કોઅરાહાટી કુંયે તુમહાન સામર્થ એને ઓદિકાર દેનો?”

8 તોવે પિત્તર પવિત્ર આત્માકોય બોઆય ગીયો એને ચે આગેવાનહાન આખ્યા.

9 “ઓ લોકહા આગેવાનાહાય એને વડીલાહાય, આમહાય ચોકા નોબળા માઅહા ભલા કોઅલા હેય, એને આજે યા બારામાય આમહે પૂછપારસ ઓઈ રીયહી કા યા કેહેકેન બોચાવ જાયો.

10 તોવે તુમા બોદા એને બોદા ઈસરાયેલી લોક જાઈલા કા ઈ નાજરેત ગાવામાઅને ઈસુ ખ્રિસ્તા નાવાકોય કોઅલા હેય, આજ ઈસુવાલ તુમહાય હુળીખાંબાવોય ચોડવી દેનલો આતો, બાકી પોરમેહેરે આલ મોઅલા માઅને પાછો જીવતો કોઅયો, આજે આજ નાવાકોય ઈ માઅહું તુમહે હોમ્મે હારાં હુદરીન ઉબલાં હેય.

11 ખ્રિસ્ત ઈસુજ તો દોગાડ હેય, જ્યા બારામાય શાસ્ત્રામાય લોખલાં હેય કા જ્યાલ તુમહે બાંદનારાહાય નોકામ્યો હુમજ્યો, એને તોજ ખૂણાવોયને મેન દોગાડ બોની ગીયો.

12 ઈસુ સિવાય કાદા બિજા કોય બોચાવ નાંય હેય, કાહાકા હોરગા નિચે માઅહામાય બિજા કાય નાંવ નાંય દેનલા હેય, જ્યાકોય આપા બોચી જાય હોકજે.”

ઈસુવા નાંવા હાટી શિષ્યાહાન દાકાડના

13 જોવે ચ્યાહાય પિત્તર એને ચોહાન ચાહા ઈમાત દેખી, એને ઈ જાંઅચા કા યા અભાણ એને સાદે માઅહે હેય, તોવે નોવાય પામ્યા, પાછે ચ્યાહાન વોળખ્યા, યા ઈસુ આરે રોય રીઅલા આતા.

14 બાકી જીં માઅહું હારો જાયલો આતો, તો પિત્તર એને ચોહાના આરે ઉબો દેખીન, સોબાયેમાય ચોખઠા ઓઅલા લોક ચ્યાહા વિરુદ્ધમાય કાયજ આખી નાંય હોક્યા.

15 બાકી ચ્યાહાન મોઠી સોબાયે બાઆ જાયને ઉબા રા આખ્યાં, એને ચ્યા ચ્યાહામાય વિચાર કોઅતા લાગ્યા.

16 “આપા યા માઅહા આરે કાય કોઅતા? કાહાકા ચેરૂસાલેમ શેહેરામાય રોનારા બોદા લોકહાન ખોબાર હેય, કા યાહાકોય ચોક પ્રસિદ્ધ ચિન્હ દેખાડલા ગીઅલા હેય, એને આપા ચાલ નાકાર નાંય કોઇ હોકજે.

17 બાકી લોકહામાય ઈ ખોબાર આજુ વોદારે નાંય ફેલાય જાય, ચ્યાહાટી આપા ચ્યાહાન દમકાડતા, કા ચ્યા ઈસુ નાવાકોય પાછી કાદા માઅહા આરે વાત નાંય કોએ.”

18 તોવે પિત્તર એને ચોહાનાલ સબાયે માજે હાદ્યા એને ચેતાવણી દેયને ઈ આખ્યાં, “ઈસુવા નાવાકોય કાયજ નાંય બોલના એને નાંય હિકાડના.”

19 બાકી પિત્તર એને ચોહાનાય ચ્યાહાન આખ્યાં, “તુમાંજ ઠોરવા, કા કાય ઈ પોરમેહેરા આગલા હારાં હેય, કા આમા પોરમેહેરા વાતે કોઅતા તુમહે વાત માનજે?”

20 કાહાકા ઈ તે આમહે કોય નાંય ઓઈ હોકે, કા જીં આમહાય દેખ્યા એને વોનાલા હેય, તી નાંય આખજે.”

21 તોવે ચ્યાહાય ચ્યાહાન આજુ દોમકાડીન જેલેમાઅને છોડી દેના, કાહાકા લોકહા લીદે ચ્યાહાન ડોંડ દેઅના કાયજ કારણ નાંચ મિળ્યાં, યાહાટી કા જીં ઘટના જાયલી આતી ચ્યા લીદે બોદા લોક પોરમેહેરા સ્તુતિ કોઅતા આતા.

22 કાહાકા જો માટડો ચમત્કારિક રીતે હારો જાયલો આતો, તો ચાળહી વોરહા કોઅતો વોદારી ઉબારે આતો.

શિષ્યહા પ્રાર્થના

23 પિત્તર એને ચોહાન જેલેમાઅને સુટીન યેરૂસાલેમમાય ચ્યાહા હાંગાત્યાહા પાય ચેના, એને જીં કાય મુખ્ય ચાજક એને આગેવાનહાય આખલા આતા, ચ્યાહાન આખી દેના.

24 ઈ વોનાઈન, ચ્યાહાય ચોકમન ઓઈન મોઠા આવાજા કોય પોરમેહેરાલ પ્રાર્થના કોઅયી, “ઓ પ્રભુ, તું તોજ હેય જ્યાંય હોરગા એને દોરતી એને જીં કાય ચ્યામાય હેય બોનાવ્યાં.

25 તુયે પવિત્ર આત્માકોય તો ચાકાર આમહે વડીલ દાઉદા મુંચા કોઈન આખ્યાં કા, ગેર ચહૂદી લોકહાય કાહા ખળબળ કોઅયી? એને લોકહાય કાહા નોકામ્મે વાતહે વિચાર કોઅયો?

26 પ્રભુ એને ચ્યા ખ્રિસ્તા વિરુદ્ધમાય દોરતી રાજા ઉબા રોય ગીયા, એને ઓદિકારી ચોખઠા ઓઅઈ ગીયા.

27 હાં, હેરોદેસ એને પંતિયાસ પિલાત બી ચા નગરમાય ગેર ચહૂદી એને ઈસરાયેલીયાઆરે મિળીન તો પવિત્ર સેવક ઈસુ વિરુદ્ધમાય, જ્યાલ તુયે ખ્રિસ્તા રુપામાય અભિષેક કોઅયેલ, આસલીમાય એકતામાય ચોખઠા ઓઅય ગીઅલા આતા.

28 ચ્યાહાય તીજ કોઅયા જીં તો સામથ્યાકોય એને તો ઇચ્છાકોય પેલ્લાજ નોકકી કોઈ લેદલા આતા કા ઓઅરા જોજે.

29 આમી ઓ પ્રભુ, ચ્યાહા દમકી વોનાય, એને તો સેવકાહાલ ઈ વરદાન દે કા તો વચન મોઠી ઈંમાતે કોય આખે.

30 એને હારાં કોઅરાહાટી તું ઓદિકાર દે કા ચિન્હ ચમત્કાર એને અદભુત કામ તો પવિત્ર સેવક ઈસુ નાવાકોય કોઅલે જાય.”

31 જોવે એ પ્રાર્થના કોઈ યુક્ત્યે, તોવે તો જાગો જાં એ બેગે આર્તે આલી ગીયો, એને એ બોદે પવિત્ર આત્માકોય બાઆય ગીયે, એને ય્યા પોરમેહેરા વચન મોઠી ઈમાતે કોય આખે.

બોરહો કોઅનારા મોદાત

32 એને બોરહો કોઅનારાહા મંડળી ચોક જીવ એને ચોકા મોના આતી, ઓલે લોગુ કા કાદોજ પોતા મિલકાત પોતા નાંચ આખતો આતો, બાકી ય્યાહાય ય્યાહાપાય જીં કાય આતાં તી બોદા ચોખઠા કોઅયા.

33 એને પ્રેષિત મોઠા સામથ્યાકોય પ્રભુ ઈસુ મોઅલા માઅને પાછો જીવી ઉઠના બારામાય સાક્ષી દેતા રોયા એને ય્યા બોદહાવોય પોરમેહેરા મોઠી સદા મોયા આતી.

34 એને ય્યાહામાય કાદોજ ગરીબ નાંચ આતો, કાહાકા જ્યાહાવોય જાગો એને ગોઅે આર્તે, એ ય્યાહાન વેચી-વેચિન, વેચલી વસ્તુ પોયહા લેય ચેત, એને પ્રેષિતાહાલ દેત.

35 એને જેહેકેન જ્યાલ ગોરાજ પોડે, ય્યાનુસાર પ્રેષિત બોદહાન વાટી દિયા કોઅતે આર્તે.

36 ચોસેફ નાંવા ચોક માટડો આતો, તો લેવી કુળામાઅને આતો, એને સાઇપ્રસ બેટવોયને આતો, પ્રેષિતાહાય ય્યાલ બારનાબાસ આખ્યાં, જ્યા મતલબ હેય, ચોક ઓહડો માઅહું જો બીજહાન ઉત્તેજન કોઅહે.

37 ય્યા કોલહિક જમીન આતી, ય્યાય ચ્યેલ વેચી દેની, એને જાગો વેચલા પોયહા લેય ચેયન પ્રેષિતાહાલ દેના.

5

પવિત્ર આત્માલ જુઠા બોલના

1 વિસ્વાસ્યાહા માઅને, હનાન્યા નાંવા ચોક માટડાય એને ય્યા થેઅે સફીરા ય્યાહાય કોલહિક મિલકાત વેચી દેની જીં ય્યાહા આતી.

2 એને ય્યા પોયહા માઅને કોલહાક પોયહા હનાન્યાય ય્યાહાહાટી રાખી થોવ્યા, એને બાકી પોયહા લેય ચેયન ય્યાહાય પ્રેષિતાહાલ દેય દેના એને ઈ વાત ય્યા થેઅેબી હારેરીતે જાઅતી આતી.

3 તોવે પિત્તરે આખ્યાં, “ઓ હનાન્યા, જો સૈતાને તો મોનામાય પવિત્ર આત્મા આરે જુઠા બોલના વિચાર ટાકલો હેય, એને તુયે તો વેચલી મિલકાત માઅને કોલહાક પોયહા તોહાટી રાખી થોવલા હેય.

4 કાય વેચી દાં પેલ્લા તો મિલકાત તો નાંચ આતી? એને જોવે વેચી દેની તે ચ્યા કિમત કાય તો તાબામાંય નાંચ આતી? તે તો મોનામાય ઓ બારાબ વિચાર કર્કેકન ચેની? તુચે માચહાલ નાંચ, બાકી પોરમેહરાલ છેતર્યો.”

5 ઈ વોનાતાજ હનાન્યા દોરતીવોચ પોડી ગીયો, એને તો મોઓઈ ગીયો, એને બોદા વોનાનારા લોક ગાબરાય ગીયા.

6 પાછે જુવાન્યા ચેચન ચ્યા કુડી ફાડકા કોઈન ચોંડાળીન બાચા લેચ જાયને દાટી દેના.

7 લગભગ તીન કલાક પાછે ચ્યા થેચે માજે ચેની, તી ચે ઘટના બારામાય કાયજ નાંચ જાયતી આતી.

8 તોવે પિત્તરે ચ્યેલ પુછ્યાં, “માન આખ ઓલહામાયજ મિલકાત વેચ્યેલ કા?” ચ્યે આખ્યાં, “હાં, ઓલહાંજ માય.”

9 પિત્તરે ચ્યેલ આખ્યાં, “ઈ કાય વાત હેચ, કા તુમા બેન્યાહાય પ્રભુ આત્મા પરીક્ષા કોઅરાહાટી એકી કોઅચી? એચે, તો દોનારાલ દાટીન ચેનારા બાઅણા પાય ઉબલા હેચ, એને તુલબી બાચા લેચ જાય.”

10 તોવે તી તારાત ચ્યા પાગહા આગલા દોરતીવોચ પોડી ગીચી એને તી મોઓઈ ગિઈ, એને જુવાન્યા માજે ચેના, તોવે ચ્યેલ મોઅલી દેખી, ચ્યેલ બાચા લેચ ગીયા, એને ચ્યે માટડા પાહી દાટી દેની.

11 એને ચેરૂસાલેમ શેહેરા મંડળીમાય એને જ્યાહાય ઈ વાત વોનાચે ચ્યે બોદે બોજ ગાબરાય ગીચે.

પ્રેષિતાહાકોચ ચિન્હ એને ચમત્કાર

12 પ્રેષિતાહાકોચ બોજ ચિન્હ એને અદભુત કામે લોકહામાય દેખાડલે જાતે આર્તે, એને બોદે બોરહો કોઅનારે ચોકમન ઓઈન દેવાળા ઈહીં સુલેમાના પારસાળા માય બેગે ઓઅતે આર્તે.

13 બાકી જ્યાહાય આમી લોગુ ઈસુવોચ બોરહો નાંચ કોઅલો આતો, ચ્યાહાલ ઈ ઈમાત નાંચ ઓઅે કા, ચ્યાહામાય મિળી જાજે, તેરુંબી લોક ચ્યાહા વાહવા કોઅતા આતા.

14 એને પ્રભુવોચ બોરહો કોઅનારાહા ગોણત્રી વોદતી ગીચી.

15 જી કાય પ્રેષિત કોઅતા આતા ચ્યા લીદે લોક બિમાર્યાહાન વાટેવોચ લેચ ચેચન પાથારી એને ખાટલાહાવોચ હુવાડી દાં આર્તે, કા

જોવે પિતર ચેય, તોવે ચ્યા છાવાડીજ ચ્યાહામાઅને કાદાવોય પોડી જાય.

16 એને ચેરૂસાલેમ શેહેરા આહી-પાહીને શેહેરામાઅને બોજ લોક બિમાર્યાહાન એને બુતહાકોય પીડાલાહાન લેય ચેયન, પ્રેષિતાહા પાય બેગે ઓઅતે આર્તે, એને બોદે હારે કોઇ દેવામાય ચેતે આર્તે.

પ્રેષિતાહાન જેલેમાય કોંડાડના

17 તોવે મહાયાજક એને ચ્યા બોદા હાંગાત્યા જ્યા સાદૂકી ટોળા આતા, પ્રેષિતાહા આરે ઈર્ષ્યા કોઅરા લાગ્યા.

18 એને પ્રેષિતાહાન દોઇન જેલેમાય કોંડાડી દેના.

19 બાકી રાતી પ્રભુ ચોક હોરગા દૂતાય જેલે બાઅણા ઉગાડીન ચ્યાહાલ બાઆ લેય ચેયન આખ્યાં.

20 “જાયા, દેવાળામાય ઉબા રોયન, લોકહાન યા નોવા અનંતજીવના બારામાય આખા.”

21 ઈ વોનાયને પ્રેષિત બોડે હાકાળેહેજ દેવાળામાય ગીયા, જેહેકેન ચ્યાહાન હોરગા દૂતહાકોય આખલા ગીઅલા આતા, એને ચ્યાહાય લોકહાન હિકાડના સુરુ કોઅયા. બાકી મહાયાજક એને ચ્યા હાંગાત્યાહાય ચેયન મોઠી સોબાયેલ એને ઈસરાયેલ્યાહા બોદા વડીલાહાન ચોખઠા કોઅયા, એને જેલેમાય આખી દોવાડયા કા પ્રેષિતાહાન લેય ચેય.

22 બાકી દેવાળા રાખવાળ્યા જેલેમાય પોઅચ્યા તે પ્રેષિત ચ્યાહાન નાંચ મિળ્યાં, એને ફિરી ચેયન ચ્યાહાય આખ્યાં.

23 “આમહાય તે જેલેલ તે બરાબર બંદ કોઅલા, એને જાગલ્યાહાન બાઆ બાઅણા પાય ઉબલા દેખ્યા, બાકી જોવે ખુલ્યા, તે માજે કાદોજ નાંચ મિળ્યો.”

24 જોવે દેવાળા રાખવાળ્યાહા આગેવાન એને મુખ્ય યાજક ઈ ખોબાર વોનાયા, તે ચ્યાહા બારામાય બોજ ચિંતામાય પોડી ગીયા કા યા પરિણામ કાય ઓઅરી.

25 એ સમયે કાદાય તેરુ ચેઇન ચ્યાહાન આખ્યાં, “એઆ, જ્યાહાન તુમહાય જેલેમાય કોંડાડી દેનલા આતા, ચ્યા દેવાળામાય ઉબા રોયન લોકહાન હિકાડી રીઅલા હેય.”

26 જોવે ચ્યા ઈ વોનાયા, તોવે દેવાળા રાખવાળ્યાહા આગેવાન રાખવાળ્યાહા આરે દેવાળામાય ગીયા, એને પ્રેષિતાહાલ મોઠી સોબાયે

હોમ્મે લેય યેના, બાકી બળજબરી કોઈન નાંય, કાહાકા ચ્યા લોકહાન બિચતા આતા, કા લોક ચ્યાહાન દોગડાકોય ઠોકીન ચ્યાહાન માઆઈ ટાકી.

27 જોવે મોઠી સોબાયેમાય ઉબા કોઅયા, તોવે મહાયાજકાય ચ્યાહાન પુછ્યાં.

28 “કાય આમહાય ચેતાવણી દેયન તુમહાન આગના નાંય દેનલી? કા તુમા યા નાંવા બારામાય હિકાડના નાંય, તેરુંબી, તુમહાય બોદા ચેરૂસાલેમ શેહેરામાય તુમહે શિક્ષણ બોઓઈ દેનલા હેય એને યા માઅહાલ માઆઈ ટાકના દોષ બળજબરી કોય આમહાવોય કાહા થોવા માગતાહા.”

29 તોવે પિત્તર એને બિજા પ્રેષિતાહાય જાવાબ દેનો, “માઅહા આગના પાળના કોઅતા પોરમેહેરા આગના પાળના આમે ફરજ હેય.

30 આમહે આગલ્યા ડાયહા પોરમેહેરે ઈસુલ મોઅલા માઅને પાછો જીવતો કોઅયો, જ્યાલ તુમહાય હુળીખાંબાવોય ચોડવીન માઆઈ ટાકલો.

31 ચ્યાલુજ પોરમેહેરે પ્રભુ એને તારણારો ઠોરવ્યો, ચ્યા જમણા આથાકોય ઉચો કોઅયો, કા ઈસરાયેલા લોક ચ્યાહા ખારાબ વિચાર એને વાટી વોયને પોરમેહેરાએછે ફિરે, એને ચ્યાકોય ચ્યાહા પાપહા માફી મિળવે.

32 એને આમા યે વાતહે સાક્ષી હેજે, એને પવિત્ર આત્માબી, જો પોરમેહેરાય ચ્યાહાન દેનલા હેય, જ્યે ચ્યા આગના માનતેહે.”

33 જોવે મોઠી સોબાયે લોક ઈ વોનાયા, એને ખિજવાઈ ગીયા, એને પ્રેષિતાહાન માઆઈ ટાકના વિચાર કોઅતા લાગ્યા.

34 બાકી ગમાલીયેલ નાંવા ચોક પોરૂષી જો મૂસા નિયમ હિકાડનારો એને બોદા લોકહામાય માના-પાનાં આતો, મોઠી સોબાયેમાય ઉબો રોયન પ્રેષિતાહાન થોડીવાચા લોગુ બાઆ લેય જાં આખ્યાં.

35 તોવે ચ્યાય મોઠી સોબાયે સભ્ય આતા ચ્યાહાન આખ્યાં, “ઈસરાયેલ બાહાહાય, જું કાય યા માઅહા આરે કોઅરા માગતાહા, તી વિચાર કોઈન કોઅજા.

36 કાહાકા યા દિહીહયા પેલ્લા થિયુદાસ નાંવા માઅહું યેના, તો ઈ આખે કા તો ચોક મોઠા માઅહું હેય એને લગભગ ચાર હોવ માઅહે

ચ્યા શિષ્ય બોની ગીયે, એને ચ્યાલ માઆઇ ટાક્યો, એને ચ્યાલ માનનારે વિખરાય ગીયે એને ચ્યાહા નાશ ઓઅયા.

37 ચ્યા પાછે લોકહા ગોણત્રી દિહહામાય ગાલીલ ભાગા માઅહું યહૂદા યેનો, એને કોલહાક લોકહાન ચ્યા એછે કોઇ લેદા બાકી તેરુંબી મોઅઇ ગીયો, એને ચ્યાલ માનનારા, બોદા વિખરાય ગીયા.

38 ચાહાટી આમી આંય તુમહાન આખતાહાવ, ચા માઅહા ઇહિને દુર રા એને ચ્યાહાઆરે કાય કામ નાંય રાખતા, કાહાકા જોવે ઈ યોજના ચા કામ માઅહા ઇહિને ઓઅરી તોવે તો નાશ ઓઈ જાય.

39 બાકી જોવે પોરમેહેરા ઇહિને ઓઅરી તોવે તુમા ચ્યાહાન કોદાય મિટાડી નાંય હોકહા, એહેકોય નાંય બોને, કા તુમા પોરમેહેરાઆરે બી લોડનારા બોને.”

40 તોવે ચ્યાહાય ચ્યા વાત માની લેદી, એને પ્રેષિતાહાન હાદિન માર ઠોકાડ્યો, એને ચ્યાહાન ઈ આગના દેની કા આમીને ઈસુ નાવાકોય કાયજ નાંય આખના એને પાછે ચ્યાહાન છોડી દેના.

41 ચ્યા યે વાતે લીદે ખુશ ઓઇન મોઠી સોબાયે હોમ્મેને જાતા રિયા, કા આપા ઈસુ લીદે અપમાનિત ઓઅના લાયકે ઠોર્યા.

42 ચ્યા પાછે પ્રેષિતાહાય દિનેરોજ, દેવાળામાય એને ગોઅહે-ગોઅહે જાયને હિકાડના એને હારી ખોબારે પ્રચાર કોઅના ચાલુ રાખ્યાં કા ઈસુજ ખ્રિસ્ત હેય.

6

હાત સેવકાહાન નિવાડના

1 ચ્યા દિહીહયામાય જોવે ઈસુવોય બોરહો કોઅનારાહા ગોણત્રી વોદતી લાગી, તોવે યુનાની ભાષા બોલનારા શિષ્યહાય હિબ્રુ બોલનારાહા શિષ્યહા વિરુદ્ધ કુરકુર કોઅરા લાગ્યા, “દિનેરોજ ખાઅના-પિઅના માય આમહે વિઘવા બાયહે ખોબાર નાંય લેદલી જાય.”

2 તોવે ચ્યા બારા પ્રેષિતાહાય યેરૂસાલેમ બિજા શિષ્યાહાલ ચ્યાહાપાય હાદિન આખ્યાં, “આમહાન પોરમેહેરા વચન હિકાડના છોડીન ખાઅના-પિઅના સેવાયેમાય રોઅના ઠીક નાંય હેય.

૩ યાહાટી ઓ બાહાહાય, આપહે માઅને હાંત નાવાજલા માટડાહાન જ્યા પવિત્ર આત્માકોય એને બુદ્ધિ કોય બોઆલા રોય, ઓહડાહાલ નિવડી લા, કા આમા ચ્યાહાન યા કામ હોઅપી દેજે.

૪ બાકી આમા તે પ્રાર્થના કોઅનામાય એને વચન પ્રચાર કોઅરા એને હિકાડાં સેવાયેમાય લાગી રાહું.”

૫ ઈ વાત બોદી મંડળીલ હારી ગોમી, એને ચ્યાહાય સ્તેફનુસ નાંવા યોક માટડો જો બોરહો કોઅનામાય એને પવિત્ર આત્માકોય બોઆલો આતો, ફિલિપ, પ્રખરુસ, નીકાનોર, તિમોન, પરમીનાસ એને અન્તાકિયા શેહેરા નીકુલાસાલ, જ્યાહાય યહૂદી ધર્મ સ્વીકાર કોઅય લેદલો આતો. ચ્યાહાય યા લોકહાન નિવડયા.

૬ એને યાહાન પ્રેષિતાહા હામ્મે લેય યેના, એને ચ્યાહાય પ્રાર્થના કોઇન ચ્યા કામાલ કોઅરાહાટી ચ્યાહાન નિવડ કોઅયા.

૭ એને પોરમેહેરા વચન ફેલાતા ગીયા, એને યેરૂસાલેમ શેહેરામાય શિષ્યહા ગોણત્રી બોજ વોદતી ગીયી, એને કોલહાક યહૂદી યાજકાહાય બી ઈસુ ખ્રિસ્તાવોય બોરહો કોઅયો.

સ્તેફનુસાલ દોઅના

૮ સ્તેફનુસ સદા મોયા એને સામર્થ્યાકોય બઆયન લોકહામાય મોઠે-મોઠે અદભુત કામ એને ચિન્હે દેખાડતો આતો.

૯ બાકી કોલહાક લોકહાય સ્તેફનુસા વિરુદ્ધ કોઅયો, ચ્યે ચ્યા સોબાયે ઠિકાણા સભ્ય આર્તે, જ્યાહાલ ગુલામી-છુટકો આખતે આર્તે, ચ્યા લોક કુરેન એને સિકન્દરિયા શેહેરામાઅને કિલિકિયા એને આસિયા વિસ્તારામાઅને બી આર્તે, યા લોક સ્તેફનુસા આરે બોલા-બોલી કોઅરા લાગ્યા.

૧૦ બાકી જી કાય ચ્યાય આખ્યાં ચ્યે ચ્યા કાયજ જોવાબ નાંય દી હોક્યે, કાહાકા પવિત્ર આત્માય ચ્યાલ બોજ બુધિમાની કોય બોલાહાટી મોદાત કોઅયી.

૧૧ તોવે ગુલામી-છુટકા લોકહાય કોલહાક માટડાહાન સ્તેફનુસા બારામાય જુઠા બોલાહાટી ઉસરાવ્યા, “આમહાય યાલ મૂસા એને પોરમેહેરા વિરુદ્ધમાય નિંદા વાતો કોઅતા વોનાયાહા.”

12 ચ્યાહાય સ્તેફનુસા વિરુદ્ધ લોક વડીલ, એને મૂસા નિયમ હિંકાડનારા ગુરુહુલ ઉસરાવ્યા એને ચ્યાહાય યેયન સ્તેફનુસાલ દોઅયો એને મોઠી સોબાયે હામ્મે લેય યેના.

13 એને જુઠા સાક્ષીદાર ઉબા કોઅયા, જ્યાહાય આખ્યાં, “ઈ માઅહું યા પવિત્ર દેવાળા એને મૂસા નિયમાહા વિરુદ્ધ નિંદા કોરાહાટી નાંચ છોડે.

14 કાહાકા આમહાય ચ્યાલ એહેકોય આખતો વોનાયા, કા ઓજ નાજરેત ગાવામાઅને ઈસુ દેવાળાલ પાડી ટાકી, એને ચ્યે રીતીહીન બોદલી ટાકી જ્યો મૂસાય આપહાન હોઅપલ્યો હેય.”

15 તોવે બોદા લોકહાય જ્યા મોઠી સોબાયેમાય બોઠલા આતા, ચ્યાએછે યોકદીઠ એઇન ચ્યા મુંચ હોરગા દૂતા રોકા દેખ્યા.

7

સ્તેફનુસા સંદેશ

1 તોવે મહાયાજકાય પુછ્યાં, “કાય યો વાતો હાચ્યો હેય?”

2 સ્તેફનુસે આખ્યાં, ઓ બાહાહાય, એને ડાયહાય વોનાયા, આપહે આગલ્યો ડાયો આબ્રાહામ હારાન શેહેરામાય વોહતી કોઅરા પેલ્લા, જોવે તો મેસોપોટેમિયા વિસ્તારમાય આતો, તો મહિમામય પોરમેહેરે ચ્યાલ દર્શન દેના.

3 એને ચ્યાલ આખ્યાં, તું તો દેશ એને તો કુટુંબમાઅને નિંગીન ચ્યા દેશામાય જો, જ્યાલ આંચ તુલ દેખાડીહી.

4 તોવે ચ્યાય મેસોપોટેમિયા વિસ્તાર માઅને નિંગીન હારાન શેહેરામાય જાયને વોહતી કોઅયી, એને ચ્યા આબહા મોરણા પાછે પોરમેહેરાય ચ્યાલ તાઅને યા દેશામાય લેય યેયન વોહતી કોઆડયો, જ્યામાય આમી આપા રોતહા,

5 બાકી પોરમેહેરે ચ્યાલ કાયજ ભાગ નાંચ દેનો, ઓલેલુગું કા પાગ થોવે ઓલહો જાગો બી નાંચ દેનો, બાકી ઓ વાયદો કોઅયો કા, “આંચ ઓ દેશ તુલ એને તો પાછે તો પીડીલ દેય દિહી.” એને ચ્યે સમયે ચ્યા કાદો પોહોબી નાંચ આતો.

6 એને પોરમેહેરે એહેકેનબી આખ્યાં, તો પિડયે લોક પારકા દેશા પરદેશા ઓઅરી, એને ચ્યા લોક ચ્યાહાન ગુલામ બોનાવી લી એને ચાર હોવ વોરહે લોગુ ચ્યાહાઆરે ખારાબ વ્યવહાર કોઅરી.

7 પાછી પોરમેહેરે આખ્યાં, જ્યે જાતી ચ્યે ગુલામ બોની, ચ્યાહાન આંચ ડોંડ દિહી, ચ્યા પાછે ચ્યે ચ્યા દેશામાઅને બાઆ ચેયન ચા જાગાવોચ મા ભક્તિ કોઅરી.

8 એને પોરમેહેરે આબ્રાહામાઆરે ફરાર કોઅયો એને ચ્યાલ આખ્યાં કા, “તો ફુટુંબા બોદા માટડાહા ફરારા ચિન્હા રુપામાય સુન્નત કોઆડ,” સુન્નતા નિયમ દેયના ચોકા વોરહા પાછે, ઈસાકા જન્મો જાયો, એને આઠવે દિહી ચ્યા સુન્નત કોઅયા, ઈસાકે ચ્યા પોહા ચાફૂબા સુન્નત કોઅયા એને ચાફૂબે ચ્યા બારા પોહહા સુન્નત કોઅયા. જ્યા આમહે આગલ્યાડાયા આતા.

9 એને ચાફૂબા પોહાહાય ચોસેફા આરે ઈર્ષ્યા કોઇન ચ્યાલ મિસર દેશામાય જાનારાહાલ ગુલામા રુપામાય વેચી દેનો, બાકી પોરમેહેર ચ્યાઆરે આતો.

10 એને પોરમેહેરે ચોસેફાલ બોદી તકલીફ માઅને બોચાડીન મિસર દેશા રાજા ફારુના આગલા મોચા એને બુદ્ધિ દેની, ફારુન રાજાય ચોસેફાલ મિસર દેશાવોચ એને ચ્યા બોદા મેહેલાવોચ પ્રધાન બોનાડયો.

11 જોવે ચોસેફ પ્રધાન આતો, તોવે કા બોદા મિસર દેશામાય એને ક્નાન દેશામાય ઓલો મોઠો દુકાળ પોડયો, જ્યાકોચ બોજ તકલીફ પોડી, એને આપહે આગલ્યા ડાયહાન ખાઅના નાંચ મિળતા આતા.

12 બાકી ચાફૂબાય ઈ વોનાયને, કા મિસર દેશામાય અનાજ હેચ, આપહે આગલ્યાડાયા જાય એને તાઅને અનાજ વેચાતાં લેચ, ચ્યા ચોસેફાલ મિળ્યાં એને અનાજ વેચાતાં લેદા, બાકી ચ્યાહાય ચ્યાલ નાંચ વોળખ્યો.

13 બીજેદા, જોવે ચ્યા અનાજ લા ગીયા, તોવે ચોસેફાય પોતા બાહહાન વોળખાણ દેખાડી એને ફારુન રાજાલ બી ચોસેફા જાત બોબાર પોડી ગીચી.

14 તોવે ચોસેફે ચ્યા આબહા ચાફૂબાલ એને ચ્યા બોદા ફુટુંબાલ, જ્યે પંચોતર માઅહે આતે, મિસર દેશામાય ચાહાટી સંદેશ દોવાડયો.

15 તોવે યાકૂબ મિસર દેશામાય ગીયો, એને કોલહાક સમાયા પાછે યાકૂબ એને આપહે આગલ્યાડાયા મોઅઇ ગીયા.

16 ચ્યાહાય યાકૂબ એને ચ્યાહા પોહહા મોઅલા શરીર મિસર દેશામાઅને આપહે દેશ કનાના શેખેમ શેહેરામાય લી યેના, એને ચ્યાહાય યાકૂબા મોઅલા શરીર ચ્યે કોબાર માય દાટ્યા, જ્યાલ આબ્રાહામાય વેચાતાં લેદેલ, એને ચ્યાહાય યાકૂબા પોહહા મોઅલા શરીર શેખેમ શેહેરા ચ્યે જમીનમાય દાટ્યા, જીં યાકૂબાય હમોરા પોહહા વોઅને વેચાતાં લેદેલ.

17 બાકી જોવે તો વાયદો પુરો ઓઅના સમય પાહે યેનો, જો પોરમેહેરે આબ્રાહામાઆરે કોઅલો આતો, તોવે મિસરમાય ચ્યા લોક વોદતા લાગ્યા, એને બોજ ઓઈ ગીયા.

18 તોવે મિસર દેશામાય બિજો નોવો રાજા જાયો, તો યોસેફાલ નાંચ વોળાખતો આતો.

19 ચ્યાય આપહે જાતી આરે ચાલાકી કોઈન આપહે વાડ-વડીલાહાઆરે ઓલે લોગુ ખારાબ વ્યવહાર કોઅયો, કા આયહે-આબહાલ નોવા જોન્મુલા પોહહાન ટાકી દાં પોડ્યા જ્યેથી ચ્યે મોઅઇ જાય.

20 ચ્યે સમયે મૂસા જન્મો જાયો, એને તો પોરમેહેરા નોજારેમાય બોજ હારો આતો; એને ત્રીન મોયના લોગુ ચ્યા આયહે-આબહાય ગુપ્તરુપમાય દેખભાલ કોઅયી.

21 બાકી જોવે ચ્યે ચ્યાલ દુબાડી નાંચ હોક્યે, તે ચ્યાહાય ચ્યાલ ગોઆ બાઆ થોવી દેનો, તોવે ફારુના પોહયેય ચ્યાલ દત્તાક લેદો, ચ્યે ચ્યા પાલનપોષણ પોતે પોહા રોકા કોઅયા.

22 એને મૂસાલ મિસરીયાહા બોદી વિદ્યા હિકાડી, એને તો વાત એને કામ કોઆ સામર્થ્ય શાલી બોની ગીયો.

23 જોવે મૂસા ચાળહી વોરહા જાયો, તોવે ચ્યાય ઈસરાયેલી બાહહાન મિળાં વિચાર કોઅયો.

24 તાં ચ્યાય યોક મિસરી માઅહાકોય યોકા ઈસરાયેલી માઅહાવોય અન્યાય ઓઅતા દેખ્યો, ચ્યાલ બોચાડ્યો, એને મિસરી માઅહાલ માંઈને ચ્યા બોદલો લેદો.

25 મૂસાય વિચાર કોઅયો, કા ચ્યા જાતવાળે હોમજી કા પોરમેહેર ચ્યા આથાકોય ચ્યાહાલ ગુલામીમાઅને સોડવી, બાકી ચ્યાહાય નાંય હોમજ્યા.

26 બીજે દિહી જોવે ઈસરાયેલી ચ્યાહામાયજ લોડી રિઅલો આતો, તોવે તો તાં જાય પોઅચ્યો, એને ઈ આખીન ચ્યાહાન હોમજી જાંહાટી હોમજાડ્યા, કા ઓ બાહાહાય, તુમા તે બાહા-બાહા હેય, ચોકા બિજાવોય કાહા અન્યાય કોઅતાહા?

27 બાકી જો ચ્યા પડોશીવોય અન્યાય કોઈ રિઅલો આતો, ચ્યાય ઈ આખીન ઘોક્કો દેનો, તુલ કુંયે આમહાવોય પ્રધાન એને ન્યાય કોઅનારો ઠોરવ્યોહો?

28 કાય જેહેકેન તુયે કાલે મિસરી માઅહાલ માઆઇ ટાક્યો તેહેકેન માન બી માઆઇ ટાકાં માગતોહો કા?

29 ઈ વાત વોનાઈન મૂસા ગાબરાય ગીયો એને તો મિસર દેશ છોડીન નાહી પોડયો, એને મિદ્યાન દેશામાય પારદેશી બોનીન રા લાગ્યો, એને તાં ચ્યા બેન પાહહા જન્મો જાયો.

30 મિદ્યાન દેશામાય મૂસા ચાળહી વોરહે રિયો તોવે, ચોક હોરગા દૂતાય સીનાય ડોગા ઉજાડ જાગામાય ચ્યાલ બોળતા જેખરાહા માજે દર્શન દેના.

31 જોવે મૂસાય બોળતા જાડાલ દેખ્યા જીં ભસ્મ નાંય ઓઈ રીઅલા આતા, તે મૂસાલ નોવાય લાગી. એને તી એરાહાટી તો પાહાય જાતો લાગ્યો, તોલાહામાય તો પ્રભુ આવાજ વોનાયો.

32 “આંય તો આગલ્યા ડાયાહા પોરમેહેર, આબ્રાહામા પોરમેહેર, ઈસાકા એને ચાફૂબા પોરમેહેર હેતાંવ.” તોવે મૂસા ગાબરાયને કાપતો લાગ્યો, ઓલે લોગુ કા ચ્યાલ એઅના ઈમાત નાંય જાયી.

33 તોવે પ્રભુય ચ્યાલ આખ્યાં, મા પ્રતિ આદર દેખાડાં હાટી તો પાગહા માઅને વાઅણો કાડી લે, કાહાકા તું જાં ઉબો હેય, તો જાગો પવિત્ર હેય.

34 માયે હાચ્યાંજ મા લોકહા ખારાબ દશા જ્યા મિસર દેશામાય હેય, દેખહી, ચ્યાહા હુંઅકા એને ચ્યાહા રોડના માયે વોનાય લેદલા હેય, ચાહાટી ચ્યાહાન બોચાવાં હાટી આંય ઉતી યેનહો, આમી યે, આંય તુલ મિસર દેશામાય દોવાડુહુ.

35 ઓ તોજ મૂસા હેય જ્યાલ ઈસરાયેલ્યાહાય નાકાર કોઇ દેનલો આતો, એને જ્યાહાય આખલા આતા, તુલ કુંયે આમહે પ્રધાન એને ન્યાય કોઅનારો બોનાડયોહો? ઓ તોજ હેય જ્યાલ પોરમેહેરાય આ હોરગા દૂતાકોય, જો આહાટી જાડયેમાય પ્રગટ ઓઅલો આતો, શાસક એને તારણ દેનારો ઓઅરાહાટી દોવાડયો.

36 ઈ માઅહું મિસર દેશ એને લાલ દોરિયામાય એને ઉજાડ જાગામાય ચાળહી વોરહે લોગુ અદભુત કામ એને ચિન્હ દેખાડી-દેખાડી આહાન કાડી લેય યેનો.

37 ઓ તોજ મૂસા હેય, જ્યાંય ઈસરાયેલી લોકહાન આખ્યાં, પોરમેહેર તુમહે બાહાહા માઅને તુમહેહાટી મા રોકો યોક ભવિષ્યવક્તા ઉબો કોઅરી.

38 ઓજ મૂસા યોક ભવિષ્યવક્તા રુપામાય આપહે આગલ્યા ડાયહા આરે આતો જોવે ચ્યે ઉજાડ જાગામાય હોરગા દૂતા આરે યોકહાતે બેગે આર્તે, તાં સીનાય ડોગાવોય મૂસાલ જીવન દેનારા વચન મિળ્યાં એને આય આપહે લોગુ પોઅચાડી દેના.

39 બાકી આપહે આગલ્યા ડાયહાય ચ્યાલ નાંય માન્યા, બાકી ચ્યાલ ઠકરાવીન ચ્યાહા મોનાકોય મિસર દેશામાય પાછા ફિરી જાં માગતા આતા.

40 એને મૂસા બાહા હાડનાલ આખ્યાં, આમહેહાટી ઓહડી દેવતા બોનાડ, જું મિસર દેશ માય પાછા ફિરી જાંહાટી આમહે આગલા-આગલા ચાલે, કાહાકા આમા નાંય જાંઆજે કા ચ્યા મૂસા કાય જાયા, જો આમહાન મિસર દેશામાઅને છોડાવીન લેય યેનો.

41 એને ચ્યે સમયે ચ્યાહાય યોક વાછડા મુર્તિ બોનાવી, એને તી મુર્તિલ બલિદાન ચોડાવ્યા, એને ચ્યાહા આથા કામહાકોય ખુશ ઓઅરા લોગ્યા.

42 ચાહાટી પોરમેહેરે ચ્યાહાન આકાશામાઅને દિહી, ચાંદ એને ચાંદાલાહાન દેવતાહા રુપામાય ભક્તિ કોઅરાહાટી છોડી દેના. જેહેકેન ભવિષ્યવક્તાહા ચોપડયેમાય પોરમેહેરાય આખ્યાં, “ઓ ઈસરાયેલી લોકહાય, તુમા ઉજાડ જાગામાય ચાળહી વોરહા લોગુ માન જોનાવરહા બલિદાન એને અન્નબલી નાંય ચોડવ્યા બાકી તુમહાય ચ્યાહાન બિજા દેવતાહાન ચોડવ્યા.

43 તુમહાય ય્યા માંડવાલ બોનાડયો જ્યામાય મોલોક દેવતા મુર્તિ એને રીફાન દેવતા તારા ચિત્ર આતા, તી મુર્તિહિલ તુમહાય ભક્તિ કોઅરાહાટી બોનાડયો, યાહાટી આંય તુમહાન બાબેલ દેશામાય લેય જાયને થોવહી.”

44 સાક્ષી માંડવો ઉજાડ જાગામાય આપહે આગલ્યા ડાયહા વોચમાય આતો, જેહેકેન પોરમેહેરે ઠોરવ્યો, જ્યાંય મૂસાલ આખ્યેલ, જો માપ તુયે દેખલો હેય, ય્યાનુસાર ચાલ બોનાડ.

45 બોજ વોરહા પાછે તો માંડવો આપહે આગલ્યા ડાયહાય ય્યાલ મીળવીન યહોશુવા આરે ઈહી લેય ચેના, જ્યે સમયે કા ય્યાહાય ય્યા ગેર યહૂદીયાવોય ઓદિકાર મેળાવ્યો, જ્યાહાલ પોરમેહેરાય આપહે આગલ્યા ડાયહા હામ્મેને કાડી દેના, એને તો માંડવો દાઉદ રાજા સોમાયા લોગુ રિયો.

46 દાઉદ રાજાવોય પોરમેહેરાય સદા મોયા કોઅયી, એને દાઉદ રાજાય યાફૂબા પોરમેહેરાહાટી રોઅના માંડવો બોનાડા વિનાંતી કોઅયી.

47 બાકી ય્યા પોહો સુલેમાને ય્યાહાટી ચોક દેવાળા બોનાવ્યાં.

48 બાકી પુરમપ્રધાન પોરમેહેર આથહા કોઇન બાંદલા દેવાળામાય નાંય રોય, જેહેકેન યશાયા ભવિષ્યવક્તા ચોપડીમાય લોખલાં હેય.

49 પોરમેહેર આખહે, હોરગા મા રાજગાદી એને દોરતી મા પાગ થોવના જાગો હેય, મા હાટી તુમા કોહોડે રીતે દેવાળા બોનાડાહા? એને મા આરામ કોઅના કોઅહો જાગો રોય?

50 કાહાકા માયે પોતે હોરગા એને દોરતી બેની જાગામાય બોદા કાય બોનાડલા હેય.

51 ઓ કોઠણ લોકહાય, તુમા ય્યા વાત માના એને વોનાયા નાકાર કોઅતાહા, તુમા કાયામ પવિત્ર આત્મા વિરુદ્ધ કોઅતાહા, જેહેકેન તુમહે આગલ્યાડાયા કોઅતા આતા, તેહેકેન તુમાબી કોઅતાહા.

52 તુમહે આગલ્યા ડાયહાય બોદા ભવિષ્યવક્તાહા આરે ખારાબ કોઅયા જ્યાહાલ પોરમેહેરાય દોવાડલા આતા, ય્યાહાય ય્યા ભવિષ્યવક્તાહાલ માઆઇ ટાક્યા જ્યાહાન ખ્રિસ્ત જો ન્યાયી હેય ય્યા ચેયના ભવિષ્યવાણી કોઅયેલ, એને આમી તુમા ય્યાલ દોઅનારા એને માઆઇ ટાકનારા બોન્યા.

53 તુમહાન હોરગા દૂતહાકોય પોરમેહેરા નિયમ મિથ્યાં, તેરુંબી તુમહાય ચ્યા પાલન નાંય કોઅયા.

સ્તેફ્નુસા હત્યા

54 યો વાતો વોનાઈન યહૂદી આગેવાન બોજ ખિજવાય ગીયા એને સ્તેફ્નુસાવોય દાત કોકડાવા લાગ્યા.

55 બાકી ચ્યાય પવિત્ર આત્માકોય બોઆયને હોરગા એછે એઅયા, એને ચ્યે પોરમેહેરા મહિમા એને ઈસુવાલ પોરમેહેરા જમણા આથા એછે સન્માના જાગાવોય ઉબો રિઅલો દેખ્યો.

56 એને આખ્યાં, “એઆ, આંય હોરગાલ ઉગડી ગીઅલાં, એને માઅહા પોહાલ પોરમેહેરા જમણા આથા એછે સન્માના જાગાવોય ઉબો રિઅલો એઅતાહાવ.”

57 તોવે ચ્યાહાય મોઠેરે બોબલીન કાન ડુકી લેદા, એને યોખદા ઓઇન ચ્યાવોય ટુટી પોડ્યા.

58 એને ચ્યાલ યેરૂસાલેમ શેહેરા બાઆ લેય જાયને દોગડાટા લાગ્યા, યે સમયે જ્યાહાય સ્તેફ્નુસાવોય દોષ લાવલો આતો ચ્યાહાય ચ્યાહા ઉપર્યે ડોગલે શાઉલ નાંવા યોક જુવાન્યાપાય થોવી દેને, કા તો ચ્યાહા રાખવાળી કોએ.

59 એને ચ્યે સ્તેફ્નુસાલ દોગડાટતે રિયે, એને તો ઈ આખીન પ્રાર્થના કોઅતો રિયો, “ઓ પ્રભુ ઈસુ, મા આત્માલ સ્વીકાર કોઓ.”

60 પાછે માંડયે પોડીન મોઠેરે બોબલ્યો, “ઓ પ્રભુ, યા પાપાહાટી તું ચ્યાહાન માફ કોઇ દે.” એહેકોય આખીન તો મોઅઇ ગીયો.

8

શાઉલા વિસ્વાસ્યાહાવોય સતાવણી

1 શાઉલ પુરીરીતે સ્તેફ્નુસા મોરણા સહમત આતો. એજ દિહી યેરૂસાલેમ શેહેરા મંડળીવોય મોઠી સતાવણી શુરવાત જાયી એને પ્રેષિત છોડીન બિજા બોદા ને બોદા યહૂદીયા વિસ્તાર એને સમરૂન ભાગામાય વિખરાય ગીયા.

2 એને કોલહાક પોરમેહેરા આદર કોઅનારા માટડાહાંય સ્તેફ્નુસાલ કોબારેમાય દાટ્યો, એને ચ્યાહાટી તે બોજ શોક કોઅયો.

૩ બાકી શાઉલ મંડળીલ સતાવતો આતો, એને ગોઅહે-ગોઅહે જ્ઞાયને વિસ્વાસી માટડાહાલ એને થેઅયેહેલ ગોહલી-ગોહલી જેલેમાય કોડતો આતો.

સમરૂનમાય ફિલિપ

૪ બાકી જ્યા વિસ્વાસી વિખરાય ગીઅલા આતા, ય્યા હારી ખોબાર આખતા ફિર્યા.

૫ ફિલિપ નાંવા યોક વિસ્વાસી યેરૂસાલેમ શેહેરામાઅને એને સમરૂન ભાગા યોકા શેહેરામાય જાયને લોકહાન ખ્રિસ્તા હારી ખોબારે પ્રચાર કોઅરા લાગ્યો.

૬ જ્યો વાતો ફિલિપે આખ્યો ય્યો લોકહાય વોનાયને એને જ્યા ચમત્કાર તો દેખાડતો આતો ય્યા એઇન, યોક જીવ ઓઇન મોન લાવ્યાં.

૭ કાહાકા જોવે ફિલીપાય હુકુમ કોઅયો તોવે બોજ જાંઅહા માઅને બુતા આત્મે મોઠેરે બોંબલીન નિંગી ગીયા, એને બોજ લખવા બિમારી એને લેંગડે બી હારે કોઅલે ગીયે.

૮ એને ય્યા શેહેરા બોજ લોક બોજ ખુશ જાયા.

સિમોન જાદુગાર

૯ ય્યા શેહેરામાય સિમોન નાંવા યોક માઅહું આતા, જો જાદુગારી કોઇન સમરૂન માઅને લોકહા બોજ નોવાય કોઅતો આતો એને પોતાલ યોક મોઠો માટડો આખાડતો આતો.

૧૦ એને બોદા વાહનાહા પાયને તે મોઠહા લોગુ ય્યા ઈજ્જત કોઇન આખતે આર્તે, “ઈ માઅહું ઈશ્વરા તી શક્તિ હેય, જું મહાશક્તિ આખાયેહે.”

૧૧ ય્યેય બોજ દિહહાથી ય્યાહાન ય્યા જાદુગારી કામહાકોય નોવાય પામાડી દેનલે આર્તે, યાહાટી લોક ય્યાલ બોજ માનેત.

૧૨ બાકી જોવે લોકહાય પોરમેહેરા રાજ્યા એને ઈસુ ખ્રિસ્તા નાંવા હારી ખોબારેવોય ફિલિપા સંદેશ વોનાયને બોરહો કોઅયો, તોવે બોદે થેઅયો એને માટડાહાંય બાપતિસ્મા લેદા.

૧૩ તોવે સિમોનાય પોતેબી ફિલિપા સંદેશાવોય બોરહો કોઅયો એને બાપતિસ્મા લેઈને ફિલિપા આરે રા લાગ્યા, તો ચિન્હ એને મોઠે-મોઠે સામથ્યા કામે ઓઅતા દેખીન નોવાય પામતો આતો.

સમરૂની લોકહા પવિત્ર આત્મા પામના

14 જોવે પ્રેષિત ચેરૂસાલેમ શેહેરમાય ઈ વોનાયા, સમરૂન માઅને લોકહાય પોરમેહેરા વચન માની લેદહા તોવે પિત્તરાલ એને ચોહાનાલ ચ્યાહાપાય દોવાડયા.

15 ચ્યાહાય તાં જાયને ચ્યાહાટી પ્રાર્થના કોઅચી કા ચ્યા પવિત્ર આત્મા મેળવી લેય.

16 કાહાકા પવિત્ર આત્મા આમી લોગુ ચ્યાહામાઅને કાદાવોય નાંચ ચેનેલ, કાહાકા ચ્યાહાય તે પ્રભુ ઈસુ નાવામાય બાપતિસ્મા લેદલા આતા.

17 તોવે પિત્તર એને ચોહાને ચ્યાહાવોય આથ થોવ્યા એને ચ્યાહાલ પવિત્ર આત્મા મિળ્યાં.

સિમોના પાપ

18 જોવે સિમોનાય દેખ્યાં કા પ્રેષિતાહા આથ થોવવાથી પવિત્ર આત્મા દેનલા જાહે, તોવે ચ્યાય પોયહા લેય ચેયન આખ્યાં.

19 “ઈ શક્તિ માન બી દા, કા આંચ કાદાવોય આથ થોવુ, તો પવિત્ર આત્મા પામે.”

20 પિત્તરે સિમોનાલ આખ્યાં, “તું એને તો પોયહા નાશ ઓઈ જાય, કાહાકા તુયે પોરમેહેરા દાન પોયહાકોય વેચાતાં લેયના વિચાર કોઅયા.

21 ચે સેવાચેમાય નાંચ તો હિસ્સો હેય, નાંચ તો ભાગ હેય, કાહાકા તો મોન પોરમેહેરા આગલા હાચ્યાં નાંચ હેય.

22 ચાહાટી તું પાપ કોઅના બંદ કોઈન પ્રભુલ પ્રાર્થના કોઓ, ઓઈ હોકહે પોરમેહેર તો ખારાબ વિચારાહાલ માફ કોઈ દેય.

23 તું ખારાબ વિચારાહા પાઅને ફિર, કાહાકા આંચ એઅતાહાવ, કા તું પિત્ત હારકો માણો એને પાપા ગુલામીમાય હેય.”

24 સિમોનાય જોવાબ દેના, “તુમા માચેહાટી પ્રભુ પાય પ્રાર્થના કોઆ કા જીં વાત તુયે આખી, ચ્યેહેમાઅને કોઅહિબી માચેવોય નાંચ ચી પોડે.”

25 તોવે પિત્તર એને ચોહાનાય સાક્ષી દેયન એને પ્રભુ ઈસુ વચન આખીન ચેરૂસાલેમ શેહેરમાય પાછા ફિરતા સમચે ચ્યા સમરૂન ભાગા બોજ ગાવહામાય હારી ખોબારે પ્રચાર કોઅતા ગીયા.

કુશ દેશા નપુસકાલ ફિલિપુસા ઉપદેશ

26 પાછે પ્રભુ ચોક હોરગા દૂતાય ચેયન ફિલિપાલ આખ્યાં, “ઉઠ એને દક્ષીણ એછે ચ્યે વાટેવોય જો, જું વાટ ચેરૂસાલેમ શેહેરાઇની ગાજા શેહેરા એછે જાહે” ઈ રેઅટાવાળી વાટ હેય.

27 તો ઉઠીન ગીયો, એને અચાનક ઈથોપિયા દેશા ચોક માઅહું ચ્યાલ મિથ્યો, જો ચોક નપુસક આતો, તો ચોક મહત્વપૂર્ણ ઓદિકારી આતો જો ઈથોપિયા દેશા રાણી બોદા ખજાના દેખભાલ કોઅતો આતો, એને ભક્તિ કોઅરાહાટી ચેરૂસાલેમ શેહેરમાય ચેનલો.

28 તો ચ્યા રથા વોય બોહીન ચ્યા દેશાલ પાછો જાય રિઅલો આતો, એને તો યશાયા ભવિષ્યવક્તા ચોપડી જોર-જોરમાય વાયતો જાય રિઅલો આતો.

29 તોવે પવિત્ર આત્માય ફિલિપાલ આખ્યાં, “પાહાય જાયને યા રથાહાતે ચાલા લાગ.”

30 ફિલિપ દાંહદીન રથાપાય જાય પોઅચ્યો એને ચ્યાલ યશાયા ભવિષ્યવક્તા ચોપડી વાયતો વોનાયો, એને પુછ્યાં, “તું જું વાયતહો કાય ચ્યાલ હુમાજતહો બી?”

31 ચ્યેય આખ્યાં, “જાવ લોગુ કાદો માન નાંચ હુમજાડે તાંવ આંચ કેહેકેન હોમજુ?” એને ચ્યેય ફિલિપાલ વિનાંતી કોઅચી, કા રથવોય ચોડીન ચ્યાપાય બોહે, એને ફિલિપ તાં ચોડીન બોહી ગીયો.

32 એને પવિત્રશાસ્ત્ર માઅને જો અધ્યાય તો વાયતો આતો, તો ઓ આતો; “તો ગેટા રોકો વદ કોઅરા ચ્યાલ લેય ગીયા, એને જેહેકેન ગેટા બુરાં કાતારનારાહા હામ્મે ઠાવકા રોહે, તેહેકેન તોબી ઠાવકોજ રિયો.

33 ચ્યા નિંદા કોઅચી એને ચ્યાલ ન્યાય નાંચ મિથ્યો, કોદાય કાદોબી ચ્યા વંશા બારામાય આખી નાંચ હોકે, કાહાકા ચ્યા વંશ ઓઅરા પેલ્લા ચ્યાલ માઆઇ ટાક્યો.”

34 યાહાટી નપુસકાય ફિલિપાલ પુછ્યાં, “આંચ તુલ વિનાંતી કોઅતાહાંવ, ઈ આખ કા ભવિષ્યવક્તા ઈ કા બારામાય આખહે, પોતા બારામાય કા બિજા કાદા બારામાય?”

35 તોવે ફિલિપે બોલના સુરુ કોઅચા, એને યાજ પવિત્રશાસ્ત્રા માઅને સુરુ કોઇન ચ્યાલ ઈસુવા હારી ખોબારે બારામાય આખ્યાં, યાહાટી તો ઓદિકારી હોમજુ ગીયો એને ઈસુવોય બોરહો કોઅયો.

36 વાટે ચાલતા-ચાલતા ચ્યા ચોકા તોળાવા પાહી પોઅચ્યા, તોવે નપુસકે આખ્યાં કા, “દેખ ઈહીં તોળાવા હેય, આમી માન બાપતિસ્મા લેયના કાય વાંદો હેય”

37 ફિલિપે આખ્યાં, “જોવે તું પુરાં મોનાકોય બોરહો કોઅતોહો તે લેય હોકતોહો” ચ્યાય જોવાબ દેનો, “આંય બોરહો કોઅતાહાંવ કા ઈસુ ખ્રિસ્ત પોરમેહેરા પોહો હેય.”

38 તોવે ચ્યેય રથ ઉબો કોઆ આગના કોઅયી, ફિલિપ એને નપુસક બેની જાંઆ તોળાવામાય ઉતી પોડ્યા, એને ફિલિપે નપુસકાલ બાપતિસ્મા દેના.

39 જોવે ચ્યા તોળાવામાઅને બાઆ ચેના, તોવે પ્રભુ આત્મા ફિલિપાલ ઉઠાવી લેય ગીયો, એને નપુસકે ચ્યાલ પાછો નાંચ દેખ્યો, એને નપુસકાલ પોરમેહેરાય બોચાવી લેદો યાહાટી આનંદ કોઅતો તો ચ્યા દેશામાય પાછો જાતો રિયો.

40 બાકી ફિલિપ અશદોદ શેહેરમાય ચેનો, એને તો ચોકે જાગેને બીજે જાગે ચ્યા મુસાફરી કોઅતો રિયો એને કૈસરીયા શેહેરામાય પોઅચ્યો તાંવ લોગુ બોદા શેહેરાહામાય હારી ખોબારે પ્રચાર કોઅતો રિયો.

9

શાઉલ રુદ્ધ બોદાલના

1 શાઉલ જો આમી લોગુ પ્રભુ ઈસુવા શિષ્યહાન દોમકાડતો ને માઆઇ ટાકના વિચારા માય આતો, મહાયાજકાપાય ગીયો.

2 એને ચ્યાપાઅને દમસ્ક શેહેરા સોબાયે ઠિકાણા નાવાવોય મંજુર્યે કાગળાં માગ્યાં, કા જ્યા માટડા કા થેઅયો જ્યા પ્રભુ ઈસુ વાટે ચાલનારેં મીળે ચ્યાહાન બાંદિન ચેરૂસાલેમ શેહેરમાય લેય ચેય.

3 બાકી જોવે શાઉલ એને ચ્યા હાંગાત્યા દમસ્ક શેહેરા પાહી પોઅચ્યા, તો અચાનક આકાશમાય ચારીચોમખી ઉજવાડો ચોમક્યો.

4 તોવે તો દોરતીવોય પોડી ગીયો, એને પ્રભુ પોરમેહેરા આવાજ વોનાયો, “ઓ શાઉલ, ઓ શાઉલ તું માન કાહા સતાવી રોયહો?”

5 શાઉલે પુછ્યાં, “ઓ પ્રભુ, તું કું હેય?” ચ્યેય આખ્યાં, “આંય ઈસુ હેય, જ્યાલ તું સતાવતોહો.

6 બાકી આમી ઉઠીન શેહેરામાય જો, કાદો તુલ આખી દી કા તુલ કાય કોઅના હેય.”

7 જ્યે માઅહે ચ્યાઆરે આર્તે, ચ્યે ઠાઅકે રોય ગીયે; કાહાકા આવાજ તો ચ્યે વનાતે આર્તે, બાકી કાદાલ દેખાતા નાંય આતા.

8 તોવે શાઉલ દોરત્યેવોયને ઉઠ્યો, એને જોવે ડોળા ઉગાડયા તોવે ચ્યાલ કાંઈજ દેખાયાં નાંય, એને ચ્યે ચ્યા આથાલ દોઇન દમસ્ક શેહેરામાય લેય ગીયા.

9 એને તો ત્રીન દિહી લોગુ દેખી નાંય હોક્યો, એને નાંય ખાદાં એને નાંય પિદાં.

શાઉલા બાપતિસ્મા

10 દમસ્ક શેહેરામાય હનાન્યા નાંવા યોક શિષ્ય આતો, ચ્યાલ પ્રભુ ઈસુય દર્શનામાય આખ્યાં, “ઓ હનાન્યા!” ચ્યાય આખ્યાં, “હાં, પ્રભુ”

11 તોવે પ્રભુ ઈસુય ચ્યાલ આખ્યાં, “ઉઠીન સીધી નાંવા હેરીમાય જો, એને યહૂદા ગોઅમે શાઉલ નાંવા યોક તારસુસમાય રોનારાલ હોદ; કાહાકા તો પ્રાર્થના કોઇ રિઅલો હેય.

12 એને ચ્યાય હનાન્યા નાંવા યોક માઅહું માજે યેયન ચ્યાવોય આથ થોવતો દેખાયો; કા પાછો દેખતો ઓઈ જાય.”

13 હનાન્યાય જોવાબ દેનો, “ઓ પ્રભુ, માયે યા માઅહા બારામાય બોજ જાંઅહા પાયને વનાયહો કા યાય યેરૂસાલેમ શેહેરામાય તો પવિત્ર લોકાહાઆરે મોઠયો-મોઠયો બુલો કોઅયોહો.

14 એને ઈહીંબી ચ્યાલ મુખ્ય યાજકાહા પાયને ઓદિકાર મિબ્યહો કા જ્યા લોક તોવોય બોરહો કોઅતાહા, ચ્યા બોદહાલ યેરૂસાલેમ શેહેરામાય બાંદી લેય જાય.”

15 બાકી પ્રભુ ઈસુય ચ્યાલ આખ્યાં, “તું જો; કાહાકા ઓ તે ગેર યહૂદી એને રાજહા, એને ઈસરાયેલહયા હામ્મે મા બારામાય પ્રચાર કોઅરાહાટી માયે ચ્યાલ મા સેવા કોઅરાહાટી નિવાડલો હેય.

16 એને આંય ચ્યાલ આખહી, કા લોકહાન મા બારામાય આખના લીદે કાય-કાય દુઃખ ઉઠાવાં પોડી.”

17 તોવે હનાન્યા ચ્યે ગોઅમે ગીયો, જાં શાઉલ આતો, એને ચ્યા ઉપે આથ થોવિન આખ્યાં, “ઓ બાહા શાઉલ, પ્રભુ ઈસુ, જો ચ્યે વાટેમાય,

જ્યેવોઅને તું એનો તુલ દેખાયો, એય માન દોવાડલો હેય, કા તું પાછો એઇ હોકે એને પવિત્ર આત્માકોય બાઆય જાય.”

18 એને તારાતુજ આ ડોળાહાઉપરે માછલા બિંગડાહા હારકે છાલર્દે જેહે પોડયે એને તો એઅરા લાગ્યો, એને ઉઠીન બાપતિસ્મા લેદા.

19 પાછા ખાઅના ખાયન તાકાત મેળવી. તો કોલહાક દિહી દમસ્ક શેહેરા શિષ્યહાઆરે રિયો.

શાઉલ થી ઈસુ ખ્રિસ્તા હારી ખોબાર

20 એને તો તારાત દમસ્ક શેહેરા સોબાયે ઠિકાણે તો ઈસુવા પ્રચાર કોઅરા લાગ્યો કા ઈસુજ પોરમેહેરા પોહો હેય.

21 એને બોદા વોનાનારા નોવાય પામીન આખા લાગ્યા, “કાય ઓ તોજ માઅહું નાંય હેય જો યેરૂસાલેમ શેહેરામાય જ્યા ઈસુવોય બોરહો કોઅે આહાન તો માઆઇ ટાકે, એને ઈહીંબી આ હાટીજ યેનલો આતો, કા આહાન બાંદિન મુખ્ય યાજકાહાપાય લી જાય?”

22 બાકી શાઉલાય આજુ વોદારે શક્તિશાળી રુપાકોય પ્રચાર કોઅના સુરુ કોઇ દેના, એને યે વાતે સાબિતી દેય-દેયને કા ઈસુ ઓજ ખ્રિસ્ત હેય, દમસ્ક શેહેરામાય રોનારા યહૂદીયાહા બોલના બંદ કોઅતો રિયો.

23 જોવે શાઉલ દમસ્ક શેહેરામાય રોયન બોજ દિહી ઓઈ ગીયા, તોવે યહૂદીયાહાય મિળીન આલ માઆઇ ટાકના યુક્તિ કોઅયી.

24 બાકી આહા યુક્તિ શાઉલાલ માલુમ પોડી ગીયી, આ તે આલ માઆઇ ટાકાંહાટી રાત દિહી ફાટાકેહે પાય દોબી રોતા આતા.

25 બાકી ચોક રાતી શિષ્યહાય આલ ઉચે દિવાલ વોય લેય ગીયે, જું શેહેરા ચોમખી આતી, તોવે આહાય આસડાકોય ચોક મોઠા ટોપલા બાંદિન ટોપલા કોય નિચે ઉતાડી દેનો, એહેકેન તો દમસ્ક શેહેરામાઅને બોચીન જાતો રિયો.

યેરૂસાલેમમાય શાઉલ

26 શાઉલ યેરૂસાલેમ શેહેરામાય જાય પોઅઅયો તોવે એય શિષ્યહાઆરે મિળી જાઅના કોશિશ કોઅયી બાકી બોદા આલ બિઅતા આતા, કાહાકા આહાન બોરહો નાંય ઓઅતો આતો, કા તોબી શિષ્ય બોની ગીયહો.

27 બાકી બારનાબાસે ચ્યાલ પોતાના આરે પ્રેષિતાહા પાય લેય જાયને ચ્યાહાન આખ્યાં, કા યાય કેહેકેન દમસ્ક શહેરા એછ જાયના વાટેમાય પ્રભુ ઈસુલ દેખ્યો, એને ઈસુવે ચ્યાઆરે વાતો કોઅયો, પાછે ઈમાત રાખીન કેહેકેન દમસ્ક શહેરામાય ઈસુવા નાંવા પ્રચાર કોઅયો.

28 પ્રેષિતાહાય બર્નાબાસાવોય બોરહો કોઅયો, યાહાટી શાઉલ યેરૂસાલેમ શહેરામાય રોય ગીયો, ચ્યાહાઆરે યેરૂસાલેમ શહેરામાય બોદે જાગે જાયને બિક વગર ઈસુ બારામાય પ્રચાર કોઅતો આતો.

29 એને બિક વોગાર પ્રભુ ઈસુ નાંવા પ્રચાર કોઅતો આતો; એને યુનાની ભાષા બોલનારાહાલ યહૂદીયાહા આરે વાતો કોઅતો આતો એને બોલાબોલી કોઅતો આતો; બાકી ચ્યા ચ્યાલ માઆઇ ટાકના યુક્તિ કોઅતા લાગ્યા.

30 ઈ જાઇન વિસ્વાસી બાહા ચ્યાલ કૈસરીયા શહેરામાય લેય યેના, એને જાહાજા માય ચ્યાલ તારસુસ દોવાડી દેનો જું ચ્યા વોતની શહેર આતા.

31 યે પરમાણે બોદા યહૂદીયા વિસ્તાર, ગાલીલ ભાગ, એને સમરૂનમાય મંડળીદોલ આરામ મિળ્યો, એને ચ્યેહે ઉન્નતી ઓઅતી ગીયી એને તી મંડળી પ્રભુ ઈસુ બિકમાય એને પવિત્ર આત્મા મોદાતેમાય ચાલતી એને બોજ લોક વિસ્વાસી બોની ગીયા.

એનિયાસા હારાં ઓઅના

32 પાછે એહેકેન જાયા કા પિત્તર બોદા વિસ્તારમાય બોદે જાગે ફિરતો રિયો, એને ચ્યા પવિત્ર લોકહાપાંય બી ગીયો જ્યા લુદા શહેરામાય રોતા આતા.

33 તાં ચ્યાલ એનિયાસ નાંવા લખવા રોગી માઅહું મિળ્યો, જો આઠ વોરહાથી ખાટલે પોડી રોઅલો આતો.

34 પિત્તરે ચ્યાલ આખ્યાં, “ઓ એનિયાસ! ઈસુ ખ્રિસ્ત તુલ હારો કોઅહે, ઉઠ, તો પાથારી લેય લે” તોવે તો તારાત ઉઠીન ઉબો રિયો.

35 એને લુદા એને શારોન શહેરા રોનારા બોજ લોક ચ્યાલ દેખીન પ્રભુ ઈસુવોય બોરહો કોઅયો.

દરકાસાલ જીવનદાન

36 યાફા શહેરામાય તબીથા નાંવા ચોક વિસ્વાસી બાય આતી, યુનાની ભાષામાય ચ્યે નાંવ દરકાસ હેય, તબીથા એને દરકાસ યા બેની નાંવહા

મતલબ “હરણી હેય”, તી બોજ હારે-હારે કામે એને મોદાત કોઅતી આતી.

³⁷ જોવે પિત્તર લુદા શેહેરામાય આતો, આ દિહહામાય તી બિમાર પોડીન મોઅઇ ગિઇ, એને આહાય એલ આંગળાવીન ખોલીમાય થોવી દેનેલ.

³⁸ લુદા શેહેર યાફા શેહેરા પાહે આતા, શિષ્યહાય ઈ વોનાઈન કા પિત્તર તાં હેય, બેન માઅહે દોવાડીન આલ વિનાંતી કોઅયી, “જલદીથી જલદી આમાહાપાય યેય જો.”

³⁹ તોવે પિત્તર ઉઠીન આહાઆરે ગીયો, એને જોવે તાં પોઅઆ, તોવે એ આલ ખોલીમાય લેય ગીયા, એને બોધો વિધવા બાયો રોડત્યોજ, આ પાહી યેયન ઉબ્યો રિયો, એને જો જબ્બો એને ફાડકે દરકાસ એહેઆરે રોતી વોખાત બોનાવલે આર્તે, એ દેખાડાં લાગ્યો.

⁴⁰ તોવે પિત્તરે બોદહાલ બાઆ કાડી દેના, એને માંડયે પોડીન પ્રાર્થના કોઅયી, એને કુડયે એછે એઇન આખ્યાં, “ઓ તબીથા, ઉઠ” તોવે એય એ ડોળા ઉગડાવ્યા, એને પિત્તરાલ દેખીન ઉઠી બોઠી.

⁴¹ આય આથ દેયને એલ ઉઠાડયા, એને વિસ્વાસી લોકહાન એને વિધવા બાયહેલ હાદિન આહાન જીવતી દેખાડી દેની.

⁴² ઈ વાત બોદા યાફા શેહેરામાય ફેલાય ગીયી; એને બોજ લોકહાય પ્રભુ ઈસુ બોરહો કોઅયો.

⁴³ એને પિત્તર યાફા શેહેરામાય સિમોન નાંવા ચામડા ઘંદો કોઅનારા પાય બોજ દિહી રિયો.

10

કરનેલીયુસા દર્શન

¹ કૈસરીયા શેહેરામાય કરનેલીયુસ નાંવા ચોક માઅહું આતો, જો ઈતાલીયા નાંવા સૈનિકા ટુકડી સુબેદાર આતો.

² તો એને આ બોદા ગોર્યા પોરમેહેરા ભક્તિ કોઅતા આતા, એને પોરમેહેરાલ બીઈન ચાલતો આતો, એને ગરીબ યહૂદી લોકહાન બોજ દાન દેતો આતો, એને પોરમેહેરાલ બરાબર પ્રાર્થના કોઅતો આતો.

3 ચોક દિહી તીન વાગ્યા સમયે દર્શનામાય ચોખ્ખેરીતે દેખ્યાં કા પોરમેહેરા ચોક હોરગા દૂત ચ્યા પાહાય ચેયન આખ્યાં, “ઓ કરનેલીયુસ.”

4 કરનેલીયુસાય હોરગા દૂતાલ આખ્યાં, “ઓ માલિક, કાય હેય?” ચ્યાય ચ્યાલ આખ્યાં, “તો પ્રાર્થના એને તો દાન યાદગીરીહાટી પોરમેહેરા હામ્મે પોઅચ્યાહા.

5 એને આમી યાફા શેહેરામાય માઅહે દોવાડીન સિમોનાલ, જ્યાલ પિત્તર આખતાહા, ચ્યાલ હાદી લે.

6 તો સિમોન, ચામડાહા ઘંદો કોઅનારા પાય રોચ રિયહો, જ્યા ગુઉ દોરિયા મેરે હેય.”

7 જોવે તો હોરગા દૂત જ્યાંય ચ્યાઆરે વાતો કોઅયો તો ચાલ્યો ગીયો, તોવે ચ્યેય બેન ચાકાર, એને જ્યા ચ્યા પાહી રિયા કોઅતા આતા ચ્યાહામાઅને ચોક પોરમેહેરા ભક્તિ કોઅનારા સીપાડાલ હાદ્યા.

8 એને ચ્યાહાન બોદોજ વાતો આખીન યાફા શેહેરામાય પિત્તરાલ લા દોવાડયા.

પિત્તરા દર્શન

9 બીજે દિહી જોવે કરનેલીયુસા કોચ દોવાડલા તીન માટડા ચાલતા-ચાલતા શેહેરા પાહી બોપરા સમયે પોઅચ્યા. ચ્યે સમયે પિત્તર ગોઆ દાબાવોચ પ્રાર્થના કોઅરા ચોડ્યો.

10 ચ્યાલ બુખ લાગી એને કાય ખાઅના ઇચ્છા આતી, બાકી જોવે ચ્યા ખાઅના તિયારી કોઅતા આતા તોવે તો દર્શન એરા લાગ્યો.

11 એને ચ્યેય દેખ્યાં, આકાશ ઉગડી ગીયા; એને ચોક મોઠા ચારસા હારકી વસ્તુ ચારી ખૂણાહાથી નિચે ઉતાડલી જાય રીયહી.

12 જ્યામાય દોરત્યેવોઅને બોદ્યે જાત્યે ચાર પાગાવાળે જોનાવારે એને દોરત્યેવોઅને બુકા થી હોપાલનારે જોનાવારે એને આકાશામાય ઉડનારે ચિડે આર્તે. જ્યાહા બારામાય મૂસા નિયમશાસ્ત્રામાય આખ્યાં કા ચ્યે અશુદ્ધ એને અપવિત્ર હેય, એને યહૂદી લોકહાન ખાંહાટી મોનાઈ હેય.

13 એને ચ્યાલ ચોક ઓહડો આવાજ વોનાયા ચેનો, “ઓ પિત્તર ઉઠ, માંઈને ખો.”

14 બાકી પિત્તરે આખ્યાં, “નાંય પ્રભુ, બિલકુલ નાંય; કાહાકા માયે કોદહીજ અપવિત્ર એને અશુદ્ધ વસ્તુ નાંય ખાદલી હેય.”

15 પાછા બીજી વોખાતે ચ્યાલ આવાજ વોનાયા યેનો, “જું કાય પોરમેહેરે શુદ્ધ કોઅયાહાં, ચ્યાલ તું અશુદ્ધ મા આખહે.”

16 ત્રીન વોખાત એહકોયજ જાયા; તોવે તારાત ત્રી ચારસા આકાશ માય ઉઠાવી લેદા.

કરનેલીયુસા ગોઓ પિત્તર

17 જોવે પિત્તર ચ્યા પોતે મોનામાય બેન વિચારાહા માય આતો, કા યા દર્શના કાય મતલબ ઓઈ હોકહે, તોવે ચ્યે માઅહે જ્યાહાન કરનેલીયુસાય દોવાડલે આર્તે, સિમોના ગોઆ ખોબાર કાડીન બાઅણા પાય યેય પોઅચ્યા.

18 એને બોબલીન પુછ્યાં, “કાય સિમોન જો પિત્તર આખાયેહે, તો ઈહીજ ગાંવારો હેય કા?”

19 પિત્તર તે ચ્યા દર્શના બારામાય વિચાર કોઅતો આતો, તોવે પવિત્ર આત્માય ચ્યાલ આખ્યાં, “એએ, ત્રીન માઅહે તો હોદ કોઈ રીઅલે હેય.

20 ઉઠીન નિચે જો, ભલે ચ્યે ગેર યહૂદી હેય ચ્યાહાઆરે શંકા કોઅયા વોગાર જો, કાહાકા માર્યેજ ચ્યાહાન દોવાડલા હેય.”

21 તોવે પિત્તરાય નિચે ઉતીન ચ્યા માઅહાલ આખ્યાં, “એઆ, જ્યા હોદ તુમા કોઈ રીયહા, તો આંયજ હેતાંવ, તુમહે યેઅના કાય કારણ હેય?”

22 ચ્યાહાય આખ્યાં, “આમહાન હોવ સૈનિકાહા સુબેદાર કરનેલીયુસાય દોવાડયાહા, તો ન્યાયી એને બોરહો થોવનારો એને પોરમેહેરાલ બીઅનારો એને બોદી યહૂદી જાત્યે લોકહામાય હારાં માઅહું હેય, ચ્યેય ચોક પવિત્ર હોરગા દૂત થી ઈ હોમજણ મેળવ્યા, કા તુલ પોતાના ગોઓ હાદિન તોપાઅને વચન વોનાયે.”

23 તોવે ચ્યેય માજા હાદિન ચ્યાહાન રા જાગો દેનો.

એને બીજે દિહે, તો ચ્યાહાઆરે ગીયો, એને યાફા શહેરા વિસ્વાસી બાહાહા માઅને કોલહાક ચ્યાઆરે ગીયા.

24 બીજે દિહી ચ્યા કૈસરીયા શહેર પોઅચ્યા, એને કરનેલીયુસ ચ્યા હોગવાડયાહાલ એને ચ્યા દોસ્તારાહાન ચોકઠા કોઈન ચ્યા વાટ જોવતો આતો.

25 જોવે પિત્તર માજા યેય રિઅલો આતો, તોવે કરનેલીયુસ ચ્યાલ મિથ્યો, તે ચ્યા પાગે પોડીન નમસ્કાર કોઅયો.

26 બાકી પિત્તરાય ચ્યાલ ઉઠાડીન આખ્યાં, “ઉબો રોય જો, આંયબી તે માઅહું હેય.”

27 એને વાતો કોઅતો ચ્યાઆરે માજા ગીયો, એને બોજ લોકહાન ચોકકા દેખ્યા.

28 તોવે પિત્તરે ચ્યાહાન આખ્યાં, “તુમા જાંઅતાહા કા ગેર ચહૂદી લોકહાન મિળના એને ચ્યાહા ઈહીં જાયના આમે ચહૂદી લોકહાહાટી ચહૂદી નિયમા વિરુદ્ધ હેય, બાકી પોરમેહેરે માન આખ્યાં કા કાદા માઅહાલ અપવિત્ર એને અશુદ્ધ નાંય આખું.

29 યાહાટી કા માન જોવે હાધો તોવે કાયજ નાંય આખ્યાં વોગાર આમી આંય યેનો, આમી આંય પૂછતાહાવ કા માન કોઅહા કામાહાટી હાદલો હેય?”

30 કરનેલીયુસાય પિત્તરાલ આખ્યાં, ચાર દિહી પેલ્લા, યેજ સમયે, આંય ગોઅમે બોપરેહે ત્રીન વાગ્યે પ્રાર્થના કોઈ રિઅલો આતો, કા ચોક માટડો ઉજળે ફાડકે પોવીન, મા હામ્મે યેયન ઉબો રિયો.

31 એને આખ્યાં, “ઓ કરનેલીયુસ, તો પ્રાર્થના વોનાય લેદહી એને તો દાન પોરમેહેરે માન્ય કોઅવામાય યેના.

32 યાહાટી યાફા શેહેરમાય માઅહે દોવાડીન સિમોનાલ જ્યાલ પિત્તર આખાયેહે, ચ્યાલ હાદિલે, તો દોરિયા મેરાવોય સિમોન જો, ચામડાહા ઘંદો કોઅનારા ગોઅમે રોય રિઅલો હેય, જોવે તો યેઅરી, તોવે તો તુમહાન પોરમેહેરાઈહીને ચોક સંદેશ આખી.

33 તોવે માયે તારાત તોપાય માઅહે દોવાડયે, એને તુયે હારાં કોઅયા કા યેનો, આમી આમા બોદે ઈહીં પોરમેહેરા હામ્મે હેજે, કા જું કાય પોરમેહેરે તુલ આખ્યાહા ચ્યાલ આખ.”

કરનેલીયુસા ગોઓ પિત્તરા ઉપદેશ

34 તોવે પિત્તરે બોલના સુરુ કોઅયા, “આમી માન ખાત્રી જાયી, કા પોરમેહેર કાદાજ પક્ષપાત નાંય કોઅે.

35 બાકી બોદ્યે જાત્યેમાય જો પોરમેહેરા ભક્તિ કોઅહે એને યોગ્ય કામ કોઅહે, તો ચ્યાલ સ્વીકાર કોઅહે.

36 તુમા ય્યા સંદેશાલ જાંઅતેહે, પોરમેહેરાય આમહાન એટલે ઈસરાયેલી લોકહાન દોવાડયો, ય્યાય શાંતી બારામાય હારી ખોબાર આખી, જું લોકહાન ઈસુ ખ્રિસ્ત વોય બોરહો કોઅવાથી મિળી હોકહે, તો બોદહા પોરમેહેર હેય.

37 તુમા ય્યો મહાન ઘટના જાંઅતાહા, જું ચોહાન બાપતિસ્મા દેનારા બાપતિસ્મા પ્રચાર પાછે ગાલીલ ભાગાથી શુરવાત ઓઇન બોદા યહૂદીયા વિસ્તારમાય ફેલાય ગીયો.

38 પોરમેહેરે કેહેકેન નાજરેત ગાવા ઈસુલ પવિત્ર આત્માકોય એને સામથ્યાકોય અભિષેક કોઅયો, તો હારે કામે કોઅતો એને ય્યા બોદા લોકહાન જ્યા સૈતાનાકોય પીડાલા આતા, ય્યાહાન હારાં કોઅતો ફિર્યો, કાહાકા પોરમેહેર ય્યાઆરે આતો.

39 એને આમા ય્યા બોદા કામહા સાક્ષી હેજે, જું ય્યાય યહૂદી લોકહા બોદા વિસ્તારમાય એને યેરૂસાલેમ શેહેરામાયબી કોઅયે, એને યેરૂસાલેમ શેહેરામાય ય્યાહાય ય્યા ઈસુલ હુળીખાંબાવોય ટાંઅગીન માઆઇ ટાક્યો.

40 બાકી ય્યાલ પોરમેહેરે તીજે દિહી પાછો મોઅલા માઅને જીવતો કોઅયો, એને આમહાન પોતે દેખાડ્યાં.

41 બોદા લોકહાય ય્યાલ નાંચ દેખ્યો, બાકી ય્યાહાય આમહાન એટલે પ્રેષિતાહાન જ્યાહાન પોરમેહેરાય સુરુવાતપાઅને નિવડી લેદલા આતા, જ્યાહાય ય્યા મોઅલા માઅને પાછો જીવતો ઓઅના પાછે ય્યાઆરે ખાદાં એને પિદાં.

42 એને ય્યાય આમહાન આગના દેની કા બોદા લોકહામાય પ્રચાર કોઆ એને સાક્ષી દા, કા ઈસુ તોજ હેય જ્યાલ પોરમેહેરાય જીવતાહા એને મોઅઇ ગીઅલા ન્યાયી ઠોરાવલો હેય.

43 જ્યા બોદાજ ભવિષ્યવક્તા સાક્ષી દેતહા કા જો કાદો ય્યાવોય બોરહો કોઅહે, ય્યાલ ઈસુ નાવામાય પાપાહા માફી મિળી જાય.”

ગેર યહૂદીયાવોય પવિત્ર આત્મા ઉતના

44 પિત્તર યો વાતો આખી રિઅલો આતો કા વચન વોનાનારાહાવોય પવિત્ર આત્મા ઉતી યેના.

45 એને જ્યા સુન્નત કોઅલા યહૂદી વિસ્વાસી લોક પિત્તરા આરે યેનલા આતા, આ બોદાજ નોવાય પામ્યા કા ગેર યહૂદી લોકબી પવિત્ર આત્માકોય બાઆય ગીયા.

46 કાહાકા આહાય આહાન જુદી-જુદી ભાષા બોલતા એને પોરમેહેરા સ્તુતિ કોઅતા વોનાયા, તોવે પિત્તરે આખ્યાં,

47 “આમહે રોકા પોરમેહેરા પાઅને પવિત્ર આત્મા પામ્યાહા તે આમી કાદોબી યાહાન પાઆયાકોય બાપતિસ્મા લાહાટી રોકી હોકહે કા તો બાપતિસ્મા નાંય લેય, જ્યાહાય આમહે રોકા પવિત્ર આત્મા પોરમેહેરાપાઅને મેળવ્યાહાં?”

48 એને પિત્તરે આહાન આગના દેની કા આહાન ઈસુ ખ્રિસ્તા નાવામાય બાપતિસ્મા દેનલા જાય, તોવે આહાય આલ વિનાંતી કોઅયી કા આજુ કોલહાક દિહી આમહે આરે રોય, યાહાટી આ કોલહાક દિહી રુકાય ગીયા.

11

પિત્તરા યેરૂસાલેમમાય પાછા યેયના

1 એને પ્રેષિતાહાય એને વિસ્વાસ્યાહાય જ્યે યહૂદીયા વિસ્તારમાય આર્તે વોનાયે, કા ગેર યહૂદી લોકહાયબી પોરમેહેરા વચન માની લેદલા હેય.

2 જોવે પિત્તર યેરૂસાલેમ શેહેરામાય યેનો, તોવે સુન્નત કોઅલા યહૂદી લોક આઆરે બોલા-બોલી કોઅતા લાગ્યા.

3 “તુયે ગેર યહૂદી લોકહા ગોઅ જાયને આહાઆરે ખાદાં.”

4 તોવે પિત્તર કરનેલીયુસા ગોઅમે જું વાત બોની તી સુરુવાતપાઅને આખી દેખાડી.

5 આંય યાફા શેહેરામાય પ્રાર્થના કોઇ રિઅલો આતો, તોવે દર્શન દેખ્યાકા યોક મોઠા યારસા હારકી વસ્તુ ચારી ખૂણહાથી આકાશમાઅને નિચે ઉતાડલી જાય રીયલી આતી.

6 જોવે માયે આવોય દિયાન કોઅયા, તે દોરતી વોયને ચાર પાગાવાળે જોનાવરે એને જંગલી જોનાવરે, એને હોઅપલીન ચાલનારે જંતુ એને આકાશમાય ઉડનારે ચિડે દેખ્યે.

7 એને ઓ આવાજબી વોનાયો, “ઓ પિત્તર, ઉઠ એને માઆઇન ખો.”

8 માયે આખ્યાં, નાંય પ્રભુ, નાંય, કાહાકા કોઅહીજ અપવિત્ર એને અશુદ્ધ વસ્તુ માયે નાંય ખાદહી.

9 ચ્યા જવાબામાય આકાશામાઅને પાછો આવાજ યેનો, “જું કાય પોરમેહેરે શુદ્ધ કોઅયા, ચ્યાલ તું અશુદ્ધ નાંય આખતો.”

10 એહેકેન તીનદા બોન્યાં, એને પાછે બોદા કાય પાછા આકાશામાય ખેચી લેદા.

11 તોવે તારાત તીન માઅહે કૈસરીયા શેહેરામાઅને કરનેલીયુસાય દોવાડલે આર્તે, ચ્યે ગોઅમે જાં આંય આતો, યેયન ઉબા રિયા.

12 તોવે પવિત્ર આત્માય માન ચ્યાહાઆરે શંકા કોઅયા વોગાર જાં આખ્યાં, એને યા છ બાહા બી મા આરે કૈસરીયા શેહેરામાય આરે યેના, એને આમા કરનેલીયુસા ગોઅો ગીયા.

13 એને ચ્યેય આમહાન આખ્યાં કા, માયે ચોક હોરગા દૂતાલ મા ગોઅમે યેઇન ઉબો રોઅલો દેખ્યો, જ્યાંય માન આખ્યાં, યાફા શેહેરામાય માઅહે દોવાડીન સિમોન જ્યાલ પિત્તર આખતેહે, ચ્યાલ હાદી લે.

14 તો તુલ ઓહડી વાત આખરી, જ્યાકોય તું એને તો બોદા કુટુંબ તારણ પામી.

15 જોવે માયે બોલના શુરવાત કોઅયી, તે પવિત્ર આત્મા ચ્યાહાવોય ચ્યે રીતે ઉત્યા, જ્યે રીતે પોચાસમાં દિહા દિહી આમહેવોય ઉતલાં.

16 તોવે માન પ્રભુ ઈસુ વચન યાદ યેના, જું ચ્યાય આખ્યેલ, યોહાનાય પાઅયા કોઇન બાપતિસ્મા દેના બાકી તુમા પવિત્ર આત્માકોય બાપતિસ્મા પામહા.

17 યાહાટી ઈ નોકકી હેય કા પોરમેહેરે ચ્યાહાનબી તી દાન દેનહા, જું આપહાન પ્રભુ ઈસુ ખ્રિસ્તાવોય બોરહો કોઅનાકોય મિવ્યાં, તોવે આંય કું હેતાઉ જો પોરમેહેરાલ ઓટકાડુ?

18 ઈ વોનાઈન યહૂદી વિસ્વાસી ઠાવકાજ રિયા, એને પોરમેહેરા સ્તુતિ કોઇન આખ્યાં, “તોવે તો ગેર યહૂદીયાહાલ બી પોરમેહેરે અનંતજીવનાહાટી પાપ કોઅના બંદ કોઅના એને ઈસુ ખ્રિસ્ત વોય બોરહો કોઅરા દાન દેનલા હેય.”

અન્તાકિયામાય શાઉલ એને બારનાબાસ

19 સ્તેફનુસાલ માઆઇ ટાક્યો પાછે, કોલહાક વિસ્વાસી યેરૂસાલેમ શેહેર છોડી દેના, ચ્યા ફિરતા-ફિરતા ફીનીકે વિસ્તાર એને સાઇપ્રસ બેટ એને સિરીયા વિસ્તારા અન્તાકિયા શેહેરામાય પોઅચ્યા, બાકી ચ્યાહાય યહૂદી લોકહાનુજ ઈસુ બારામાય હારી ખોબારે પ્રચાર કોઅયો.

20 બાકી ચ્યાહામાઅને કોલાહાક સાઇપ્રસ એને કુરેની આર્તે, જોવે ચ્યે અન્તાકિયા શેહેરામાય પોઅચ્યે, તોવે ચ્યાહાય યુનાની લોકહાનબી પ્રભુ ઈસુ હારી ખોબારે સંદેશ આપ્યો.

21 એને પ્રભુ સામર્થ્ય ચ્યાહાવોય આતા, એને બોજ ગેર યહૂદી લોક ચ્યાહા સંદેશ માની ગીયે એને પ્રભુ ઈસુવોય બોરહો કોઅયો.

22 જોવે યેરૂસાલેમ શેહેરા મંડળ્યે વિસ્વાસ્યાહાન ઈ ખોબાર પોડી, તોવે ચ્યાહાય બારનાબાસાલ અન્તાકિયા શેહેરામાય દોવાડ્યો.

23 તો તાં પોઅચીન, એને પોરમેહેરા સદા મોયા એઇન ખુશ જાયો, એને બોદહાન આપ્યાં કા તનમન લાવીન પ્રભુમાંય બોની રા.

24 બર્નાબાસ હારો માઅહું આતો, બોરહો કોઅના એને પવિત્ર આત્માકોય બોઆલો આતો, એને બોજ લોક પ્રભુમાંય યેના.

25 તોવે બારનાબાસ અન્તાકિયા શેહેરામાઅને શાઉલાલ હોદાહાટી તારસુસ શેહેર જાતો રિયો.

26 એને જોવે ચ્યાલ મિળ્યો તોવે ચ્યાલ અન્તાકિયા શેહેર લેય યેનો, એને એહેકેન જાયા કા શાઉલ એને બારનાબાસ યોક વોરહા લોગુ મંડળીઆરે મિળતા એને બોજ લોકહાન ઈસુ ખ્રિસ્તા બારામાય હિકાડતા રિયા, એને શિષ્ય બોદહા પેલ્લા અન્તાકિયા શેહેરામાય ખ્રિસ્તી આખાયા.

27 ચ્યા દિહીહામાય કોલહાક વિસ્વાસી ભવિષ્યવક્તા આતા, ચ્યા યેરૂસાલેમ શેહેરામાઅને અન્તાકિયા શેહેરામાય યેના.

28 ચ્યાહામાઅને અગાબુસ નાંવા યોક ભવિષ્યવક્તાય ઉબો રોયન પવિત્ર આત્મા અગુવાઈકોય ઈ આપ્યાં, કા બોદા દુનિયામાય મોઠો દુકાળ પોડી, એને તો દુકાળ સમ્રાટ ક્લોદિયુસ સમયે પોડ્યો.

29 તોવે અન્તાકિયા વિસ્વાસ્યાહાય એહેકેન નોક્કી કોઅયા બોદા જાંઆ જ્યા-ચ્યાહા કામાણી નુસાર યહૂદીયા વિસ્તારમાય રોનારા વિસ્વાસ્યાહાલ મોદાત કોઅરાહાટી પોયહા દોવાડે.

30 એને ચ્યાહાય પોયહા યોખઠા કોઅયા, એને બારનાબાસ એને શાઉલા આથામાય દેયન આગેવાનાહાપાય પોયહા લેય દોવાડયા.

12

હેરોદ રાજા સતાવણી

1 ચ્યે સમયે હેરોદ રાજાય મંડળ્યે કોલાહાક માઅહાલ સતાવાહાટી દોઇન કોન્ડી દેના.

2 ચ્યેય પ્રેષિત યોહાના બાહા યાકૂબાલ તારવાયે કોઇન માઆઇ ટાકાડયો.

3 જોવે ચ્યાય ઈ દેખ્યાકા યહૂદી લોક યાકોય ખુશ ઓઅતાહા, તોવે પિત્તરાલ બી દોઈ લેદો, ઓ પાસ્કા બાખ્યે સણા સમય આતો.

4 હેરોદ રાજાય પિત્તરાલ જેલેમાય કોડી દેનો, એને ચાર-ચાર સીપાહાહાલ ચાર પાહારા માય થોવ્યો, યા વિચારાકોય કા પાસ્કા સણા પાછે લોકહા હામ્મે ચ્યા ન્યાય કોઅે.

જેલેમાઅને છુટકો

5 જેલેમાય પિત્તરા રાખવાળી બોજ દિહહા કોય ઓઈ રિઅલી આતી, બાકી મંડળી ચ્યાહાટી કાયમ પોરમેહરાલ પ્રાર્થના કોઅતી રોયી.

6 એને જોવે હેરોદ રાજા ચ્યા ન્યાય કોઅરાહાટી લોકહા હામ્મે લેય યેનારો આતો, ચ્યા ચોક રાત પેલ્લા પિત્તર બેન બેડયેહ કોય બાંદલો આતો, બેન સિપાહાહા વોચમાય હૂવી રિઅલો આતો, એને જાગલ્યા બાઆણાઈહી જેલે રાખવાળી કોઈ રીઅલા આતા.

7 અચાનક પ્રભુ ચોક હોરગા દૂત પિત્તરા ઈહીં ઉબો જાયો, એને ચ્યે ખોલીમાય ઉજવાડો ચોમક્યો, એને ચ્યાય પિત્તરા ખોવા વોય આથ લાવીન ચ્યાલ ઉઠાડયો, એને આખ્યાં, “માહારી ઉઠ, ઉતવાળ કોઅો,” એને ચ્યા આથહા વોચને બેડયો ટુટી ગીયો.

8 તોવે હોરગા દૂતાય ચ્યાલ આખ્યાં, “તિચાર ઓઅો, એને વાઆણે પોવી લે” પિત્તરે તેહેકેન કોઅયા, હોરગા દૂતાય પાછા ચ્યાલ આખ્યાં, “ઝોબો પોવી લે, એને મા પાહલા ચાલ.”

9 પિત્તર ચ્યા પાહલા ચાલા લાગ્યો, બાકી ઈ નાંચ જાંઅતો આતો કા જીં કાય હોરગા દૂત કોઈ રિઅલો હેય, તી હાચ્યાં હેય, બાકી ઈ હોમજ્યો કા આંચ હોપનાં એઈ રિઅહો.

10 તોવે આ પેલ્લા એને બિજા પાહારા ઇહને નિંગીન આ લોખંડા ફાટકા પાય પોઅચ્ચા, જો શેહરા એછ જાયના વાટે હેય, તી ફાટકા આહાહાટી આમેજેજ ખુલી ગીયા, એને આ નિંગીન ચોક્કેજ વાટેમાય ચાલતા લાગ્યા, ઓલહામાય હોરગા દૂત આલ છોડીન જાતો રિયો.

11 તોવે પિત્તર ભાનમાય યેનો એને આય આખ્યાં, “આમી માયે જાઈ લેદા કા પ્રભુય આ હોરગા દૂતાલ દોવાડીન માન હેરોદા કોબજા માઅને સોડાવી લેદલો હેય એને ચહૂદી આગેવાનહા બોદી આશા તોડી દેનલી હેય.”

12 ઈ જાઇન કા પોરમેહેરાય પિત્તરાલ બોચાવી લેદહો, તોવે તો મરિયમે ગોઓ ગીયો, મરિયમ ચોહાન જો માર્ક આખાયેહે આ આયહો આતી, તાં બોજ વિસ્વાસી બેગે ઓઇન પ્રાર્થના કોઇ રીઅલે આર્તે.

13 જોવે પિત્તરે ફાટક ખોકડાવ્યાં તોવે રોદા નાંવા ચોક દાસી ફાટક ઉગાડા યેની.

14 એને પિત્તરા આવાજ વોળખીન, ચ્યેય ખુશીકોય બાઉ નાંચ ઉગાડયા, બાકી દાંહદીન માજા ગિઇ, એને બોદહાન આખ્યાં કા પિત્તર બાઆઇહી ઉબો હેય.

15 આહાય ચ્યેલ આખ્યાં, “તું ગાંડવાઈ ગીયહી” બાકી ચ્યેય ખાત્રીકોય આખ્યાં કા ઓ પિત્તર હેય, તોવે આહાય આખ્યાં, “આ હોરગા દૂત ઓઅરી.”

16 બાકી પિત્તર બાઆવા ખોકડાવતોજ રિયો, તોવે આહાય બાઉ ઉગાડયા એને આલ દેખીન બોજ નોવાય પામી ગીયા.

17 તોવે આય આહાન આથા કોઇન ઈશારો કોઇન ઠાવકાજ રા આખ્યાં, એને આહાન આખ્યાં કા પ્રભુ કેહેકેન આલ જલેમાઅને છોડવી લેય યેનો, પાછી આખ્યાં, “ચાફૂબ એને બિજા બાહહાન ઈ વાત આખી દેજા” તોવે નિંગીન બીજે જાગે જાતો રિયો.

18 હાફાળેહે જેલે રાખવાળી કોઅનારા સીપાડા બોજ ગાબરાઈ ગીયા કા પિત્તર કેઇ ગીયો?

19 જોવે હેરોદ રાજાય પિત્તરાલ હોદી કાડના આગના કોઅયી, બાકી તો નાંચ મિખ્યો, તોવે ચ્યેય જાગલ્યાહાન સાવાલ પુછા એને જોવે આ જાવાબ નાંચ દી હોક્યા તોવે આહાન માઆઇ ટાકના સજા કોઅયી. આ પાછે હેરોદ રાજા ચહૂદીયા વિસ્તાર છોડીન કેસરીયા શેહરામાય જાયને કોલહોક સમયાહાટી તાં રા લાગ્યો.

હેરોદ રાજા મોરણ

20 હેરોદ રાજા સોર એને સિદ્ધોન શેહેરા લોકહાઉપે બોજ ખિજવાઈ ગીયેલ, આહાટી આલ મિળાહાટી આ યેના, એને બલાસ્તુસ જો રાજા યોક કર્મચારી આતો, આલ મોનાવીન હોમજાં કોશિશ કોઅયી, કાહાકા રાજા દેશામાઅને આહા દેશાહાન અનાજ મિળતા આતા.

21 જ્યે દિહે હેરોદ રાજાય આહાઆરે મિળના નોકકી કોઅયા, એ દિહી રાજા ડોગલે પોવીન રાજગાદેવોય બોહી ગીયો, એને આહાન સંદેશ દાં લાગ્યો.

22 તોવે લોક બોબલી ઉઠયા, “ઓ તો માઅહા નાંય હેય ઈશ્વરા શબ્દ હેય.”

23 એજ સમયે પ્રભુ યોક હોરગા દૂતાય આલ ઠોક્યાં, કાહાકા એ પોરમેહેરાલ મહિમા નાંય કોઅયી એને આ શરીરામાય કિડે પોડ્યે એને તો મોઓઈ ગીયો.

24 બાકી પોરમેહેરા વચન ફેલાતા ગીયા એને વિસ્વાસ્યાહા ગોણત્રી વોદતી ગિઇ.

25 યહૂદીયા ભાગામાય યહૂદી વિસ્વાસીયા મોદાત કોઅરાહાટી પોયહા દેઅના પાછે, બારનાબાસ એને શાઉલ યેરૂસાલેમ શેહેરામાઅને અન્તાકિયા શેહેરામાય પાછા ફિરી યેના, એને યોહાન જ્યાલ માર્ક બી આખતેહે આહાઆરે આતો.

13

બારનાબાસ એને શાઉલાલ દોવાડના

1 અન્તાકિયા શેહેરા મંડળીમાય કોલહાક ભવિષ્યવક્તા એને શિક્ષક આતા, બારનાબાસ, સિમોન જ્યા બિજા નાંવ નીગર આતા, કુરેન શેહેરા લુકીયુસ, હેરોદ રાજા બાહા મનાહેમ એને શાઉલ.

2 જોવે આ ઉપહા કોઇન પ્રભુ ભક્તિ કોઇ રીઅલા આતા, તોવે પવિત્ર આત્માય આહાન આખ્યાં, “મા હાટી બારનાબાસ એને શાઉલાલ મા સેવા કોઅરાહાટી આલાગ કોઆ, જ્યાહાટી માયે આહાન હાદલા હેય.”

3 તોવે આહાય ઉપહા એને પ્રાર્થના કોઇન આહાય આહાવોય આથ થોવિન આહાન પોરમેહેરા કામ કોઅરા દોવાડયા.

પાઉલા પેલ્લા પ્રચારાલ જાઅના

4 બારનાબાસ એને શાઉલ પવિત્ર આત્માકોય દોવાડલા અન્તાક્રિયા શેહેરાઇહીને સીલૂકીયા શેહેર લોગુ ગીયા, એને તાઅને આ સાઈપ્રસ બેટા સલમીસ શેહેરામાય જાંહાટી જાહાજાકોય ગીયા.

5 સલમીસ પોઅચીન પોરમેહેરા વચન યહૂદીયાહા સોબાયે ઠિકાણામાય આખ્યાં, એને યોહાન, જ્યાલ માર્ક આખતેહે તો આહા મોદાત કોઅરાહાટી આહાઆરે આતો.

6 આ પાછે આહાય બોદા બેટા વોઅને ફિરતા, પાકુસ શેહેરા લોગુ પોઅચ્યા, તાં આહાન બાર-યેશુ નાંવા યોક જાદુગાર મિળ્યો, જો યહૂદી એને જુઠો ભવિષ્યવક્તા આતો.

7 તો આ બેટા શાસક સિરગીયુસ પાઉલા આરે આતો, તો યોક બુદ્ધિમાન માઅહું આતો, શાસકાય બારનાબાસ એને શાઉલાલ હાદિન પોરમેહેરા વચન વોનાયા માગ્યાં.

8 બાકી બાર-યેશુય, જ્યા ઉપનાંવ એલિમાસ એટલે જાદુગાર આતાં, આય શાઉલ એને બારનાબાસા વિરુદ્ધ કોઇન, શાસકાલ ઈસુવોય બોરહો કોઅનાકોય હારકા કોશિશ કોઅચી.

9 તોવે શાઉલ જ્યા નાંવ પાઉલ બી હેય, પવિત્ર આત્મા કોયન બોઆયને બાર-યેશુ એછે યોકદીઠ એઇન આખ્યાં.

10 “ઓ બોજ ખારાબ એને બોજ જુઠાકોય બાઆલા સૈતાના પોહા, બોદા હારાં કામહા દુશ્માન, કાય તું પ્રભુ હિદી વાટહયેન વાકડી કોઅના નાંય સોડહે?”

11 આમી એએ, પ્રભુ તુલ ડોંડ દેનારો હેય, એને તું કોલહાક સોમાયા લોગુ આંદળો બોની જાહે એને દિહી નાંય એઅહે,” તોવે એલુમાસાલ તારાત જાખાં એને આંદારાં ઓઈ ગીયા, એને તો ઈહીં-તાં યાફાલતો લાગ્યો કા આ આથ દોઇન મોદાત કોએ.

12 તોવે શાસકાય જી કાય જાયા, દેખીન એને પ્રભુ શિક્ષણા બારામાય નોવાય પામીન આય ઈસુવોય બોરહો કોઅયો.

પિસીદિયા અન્તાક્રિયામાય પાઉલા ઉપદેશ

13 પાઉલ એને આ હાંગાત્યા પાકુસ શેહેરા દોરિયામાઅને મુસાફરી સુરુ કોઅચી, એને પંકૂલિયા વિસ્તારા પિરગા શેહેરામાય પોઅચ્યા, તાં યોહાન માર્ક આહાન છોડીન યેરૂસાલેમ શેહેરામાય પાછો ફિરી યેનો.

14 એને પિરગા શેહેરાઈને આગલા જાયને, ગલાતી વિસ્તારા પીસદીયા ભાગા પાહે અન્તાકિયા શેહેરામાય પોઅચ્યા, એને આરામા દિહી સોબાયે ઠિકાણામાય જાયને બોઠા.

15 મૂસા નિયમશાસ્ત્ર એને ભવિષ્યવક્તાહા ચોપડીમાઅને વાચ્યા પાછે સોબાયે ઠિકાણા આગેવાનહાય ચ્યાહાન આખી દોવાડયા, “ઓ બાહાહાય, જો લોકહાન પ્રોત્સાહાના હાટી તુમા કાય આખા માગતાહા, તે આખા.”

16 તોવે પાઉલાય ઉબો રોઇન એને લોકહાન ઠાવકાજ રાંહાટી આથા કોઇન ઈશારો કોઇન આખ્યાં, ઓ ઈસરાયેલી લોકહાય, એને પોરમેહેરો બિક રાખનારા ગેર ચહૂદી લોકહાય, વોનાયા.

17 ચા ઈસરાયેલા લોકહા પોરમેહેરે આપહે આગલ્યા ડાયહાન નિવૂડી લેદા, એને જોવે મિસર દેશામાય પારદેશી ઓઇન રા આતા, તોવે ચ્યાહાન વોદાડયા, એને પરાક્રમી સામથ્યા કોઇન ચ્યાહાન તાઅને કાડી લેદા.

18 એને ચાળહી વોરહા લોગુ ચ્યે ઉજાડ જાગામાય ચ્યાહાન સહન કોઅતો રિયો, જોવે ચ્યાહાય ગેડી-ગેડી આગના તોડી.

19 એને ચ્યાય કુનાન દેશા હાંત જાતહયેન નાશ કોયન ચ્યાહા જમીન ચ્યા લોકહા ઓદિકારામાય દેય દેની. ચે બોદયે પ્રકીયામાય લગભગ ચારસો પોચહા વોરહે લાગ્યે.

20 ચ્યા પાછે ચ્યાય શમુએલ ભવિષ્યવક્તા લોગુ ન્યાયી ઠોરાવ્યા.

21 શમુએલ ભવિષ્યવક્તા આજુ આગેવાન આતો, તોવે ચ્યાહાય રાજા માગ્યો, એને પોરમેહેરે બિન્યામીના કુળામાઅને કિશા પોહો શાઉલાલ રાજા બોનાડયો એને ચ્યાય ચાળહી વોરહા લોગુ ઈસરાયેલી લોકહાવોય રાજ્ય કોઅયા.

22 પાછે પોરમેહેરે શાઉલાલ રાજા પદા વોઅને ઓટાડીન ચ્યા જાગાવોય દાઉદાલ રાજા બોનાડયો, જ્યા બારામાય પોરમેહેરે ઓહડી સાક્ષી દેની, માન ચોક માઅહું, યિશૈ પોહો દાઉદ, મા મોના રોકો મિળી ગીયહો, તો મા બોદી મોરજી પુરી કોઅરી.

23 ચ્યા કુળામાઅને પોરમેહેરે ચ્યા વાયદા પરમાણે ઈસરાયેલી લોકહા પાહી ચોક તારણ કોઅનારો, એટલે ઈસુલ દોવાડયો.

24 ઈસુ યેયના પેલ્લા યોહાને બોદા ઈસરાયેલી લોકહાન પાપ કોઅના બંદ કોઅના એને બાપતિસ્મા લેઅના પ્રચાર કોઅયો.

25 એને જોવે યોહાન આ સેવા પુરી કોઅનાવોય આતો, તોવે આય આખ્યાં, તુમા માન કાય હુમાજતાહા? આંય ખ્રિસ્ત નાંય હેય, બાકી એઆ, મા પાછે ચોક યેનારો હેય, તો મા કોઅતો મહાન હેય આંય આ ચાકાર બોનીન બુટા હુતળી છોડાબી લાયકે નાંય હેય.

26 “ઓ બાહાહાય, તુમા જ્યા આબ્રાહામા પીડી હેતા, એને પોરમેહેરા બિક રાખનારા ગેર ચહૂદી લોકહાય, પોરમેહેરાય આપહે પાહી ઈસુ બારામાય ઓ સંદેશ દોવાડલો હેય જો લોકહાન બોચાડેહે.

27 યેરૂસાલેમ શેહેરામાય રોનારા એને આહા આગેવાનાહાય, ખ્રિસ્ત ઈસુલ નાંય વોળખ્યો, એને નાંય ભવિષ્યવક્તા વાતો હોમજ્યા, જ્યો દર આરામા દિહે વાયલી જાહે, યાહાટી આલ દોષી ઠોરવીન ભવિષ્યવાણી વાતો પુર્યો કોઅયો.

28 આલ માઆઇ ટાકના લાયકે કાયજ દોષ નાંય મિલ્યો, તેરુંબી પિલાત રાજાલ વિનાંતી કોઅયી, કા આલ માઆઇ ટાકલો જાય.

29 એને આહાય તી બોદા કોઅયા જું પવિત્રશાસ્ત્રમાય આ બારામાય આખલા આતા, આહાય આલ ચોકા હુળીખાંબાવોય ખીલા ઠોકીન માઆઇ ટાક્યો, એને આલ હુળીખાંબાવોયને ઉતાડીન કોબારેમાય થોવ્યો.

30 બાકી પોરમેહેરે આલ મોઅલા માઅને પાછો જીવતો કોઅયો.

31 એને તો આહાન જ્યે આઆરે ગાલીલ ભાગામાઅને યેરૂસાલેમ શેહેરામાય યેનલે આર્તે. તો બોજ દિહી લોગુ આ શિષ્યહાન દેખાતો રિયો, લોકહા હામ્મે જ્યાહાય આલ દેખ્યહો એજ આ સાક્ષી હેય.

32 આમા તુમહાન ઈ હારી ખોબાર આખજેહે કા પોરમેહેરે આપહે આગલ્યા ડાયહા આરે જો વાયદો કોઅલો આતો,

33 યા વાયદાલ પોરમેહેરાય ઈસુલ મોઅલા માઅને પાછો જીવતો કોઇન તી વાયદો આપહે પોહાહા હાટી પુરો કોઅયો. જેહેકેન ગીતશાસ્ત્રમાય લોખલાં હેય, તું મા પ્રિય પોહો હેય, આંય તો આબહો બોની ગીઅલો હેતાંવ.

34 પોરમેહેરાય ચ્યાલ મોઅલાહામાઅને પાછો જીવતો કોઅયો એને આમી પાછા ચ્યા શરીર હોડી નાંચ યે વાતે સાબિત્યે હાટી પોરમેહેરાય આખ્યાં, ‘આંચ દાઉદ રાજાવોય કોઅલી પવિત્ર એને કાયામ રોનારી બોરકાત તુમહાવોય કોઅહી.’

35 ચાહાટી દાઉદ રાજાય ઈ વાત બિજા ગીત શાસ્ત્રામાય આખહે, ‘તું તો પવિત્ર જનહાલ હોડા નાંચ દેહે.’

36 ચાહાટી દાઉદ રાજા તે પોરમેહેરા મોરજી પરમાણે ચ્યા સોમાયામાય સેવા કોઇન મોઅઇ ગીયો, એને ચ્યા આગલ્યા ડાયહા આરે દાટાયો.

37 બાકી ઈસુલ પોરમેહેરે મોઅલા માઅને પાછો જીવતો કોઅયો, ચ્યા શરીર નાંચ હોડયા.

38 ચ્યાહાટી, ઓ બાહાહાય, તુમા જાઈલા કા ઈસુકોય પાપહા માફી ખોબાર તુમહાન દેનલી જાહે.

39 એને જ્યે વાતહેકોય તુમા મૂસા નિયમશાસ્ત્રાકોય નિર્દોષ નાંચ ઠોરી હોકે, ચ્યા બોદા બારામાય હર કાદો બોરહો કોઅનારો ઈસુકોય નિર્દોષ ઠોરહે.

40 ચ્યાહાટી તુમા હાયવીન રા, એહેકેન નાંચ ઓએ, કા જી ભવિષ્યવક્તાહા ચોપડયેમાય લોખલાં હેય, તી તુમહાવોય ચી પોડે.

41 ઓ નિંદા કોઅનારાહાય, એઆ, એને નોવાય પામા, એને મોઅઇ જાં, કાહાકા આંચ તુમહે દિહીહામાય ચોક કામ કોઅહી, ઓહડા કામ, કા જોવે કાદો તુમહાન આખે, તો તુમા કોદહી બોરહો નાંચ કોઅહા.”

અન્તાક્રિયામાય પાઉલ એને બારનાબાસ

42 જોવે પાઉલ એને બારનાબાસ સોબાયે ઠિકાણા માઅને બાઆ જાતા આતા, તોવે લોકહાય ચ્યાહાલ વિનાંતી કોઅયી, કા આગલે આરામા દિહે આમહાન ચો વાતો પાછા આખે.

43 એને જોવે સોબાયે ઠિકાણેને છુટ્યા પાછે ચહૂદી એને પોરમેહેરા બિક રાખનારા ગેર ચહૂદી લોક પોરમેહેરા ભક્તિ કોઅનારા પાઉલ એને બારનાબાસાઆરે ઓઈ ગીયા, એને પાઉલ એને બારનાબાસે ચ્યાહાઆરે વાત કોઇન હોમજાડ્યા, કા પોરમેહેરા સદા મોયામાય બોની રોય.

44 આગલે આરામા દિહે શેહેરા લગભગ બોદા લોક પોરમેહેરા વચન વોનાયા હાટી બેગા જાયા.

45 બાકી યહૂદી આગેવાનહાય ગીરદી દેખીન ઈર્ષ્યા કોય બાઆય ગીયા, એને નિંદા કોઇન પાઉલા વાતહે વિરુદ્ધમાય બોલા લાગ્યા.

46 તોવે પાઉલ એને બારનાબાસે બિક વોગાર આખ્યાં, “જરૂરી આતા, કા પોરમેહેરા વચન પેલ્લા તુમહાન આખલા આતા, બાકી જોવે તુમહાય નાકાર કોઇ દેના, એને પોતાલ અનંતજીવના લાયકે નાંચ ઠોરાવે, તો આમી, આમા ગેર યહૂદી લોકહાપાંચ જાતહા.

47 કાહાકા પોરમેહેરે આમહાન ઓહડી આગના દેનલી હેય, માયે તુલ ગેર યહૂદી લોકહાહાટી ઉજવાડા હારકો ઠોરાવલો હેય, તુલ દુનિયા બોદે જાગે લોકહાન તારણ કોઅનારા બારામાય આખના હેય.”

48 ઈ વોનાઈન ગેર યહૂદી લોક બોજ ખુશ ઓઅઇ ગીયા, એને પોરમેહેરા વચના સ્તુતિ કોઅરા લાગ્યા, એને જોલે અનંતજીવનાહાટી નિવાડલે, આ બોદહાય બોરહો કોઅયો.

49 તોવે પ્રભુવા વચન બોદે દેશામાય ફેલાયા લાગ્યા.

50 બાકી યહૂદી આગેવાનહાય એને કુલીન થેએયો એને શેહેરા મુખ્ય માટડાહાન ઉસરાવ્યા, એને પાઉલ એને બારનાબાસા વિરોદ્ધ કોઆડીન આહાલ ગાવા હિવે બારે કાડી દેના.

51 તોવે પાઉલ એને બારનાબાસ આહા હામ્મે પાગહા બુપટા* ખેખરીન ઈફુનિયુમ શેહેરામાય જાતા રિયા.

52 એને અન્તાકિયા શેહેરામાય શિષ્ય આનંદ એને પવિત્ર આત્માકોય બોઆતા ગીયા.

14

પાઉલ એને બારનાબાસા ઈફુનિયુમમાય વિરુદ્ધ

1 ઈફુનિયુમ શેહેરામાય એહેકેન જાયા કા પાઉલ એને બારનાબાસ યહૂદી લોકહા સોબાયે ઠિકાણે આરે-આરે ગીયા, એને એહેકેન વાત

* 13:51 બુપટા આહાન ઈ દેખાડાહાટી કા પોરમેહેરાય આહાન અસ્વીકાર કોઅય દેનલા હેય એને આહાન ડોંડ દેઅરી.

કોઅયી, કા યહૂદી એને ગેર યહૂદી લોક બેન્યાહા માઅને બોજ જાઅહાય બોરહો કોઅયો.

² બાકી બોરહો નાંય કોઅનારા યહૂદી લોકહાય ગેર યહૂદી લોકહાન વિસ્વાસી લોકહા વિરુદ્ધમાય ઉસરાવ્યા, એને દુશ્માની પૈદા કોઇ દેની.

³ એને પાઉલ એને બારનાબાસ આ બોજ દિહયા લોગુ તાં રિયા, એને પ્રભુ બોરહાવોય ઇમાતથી વાતો કોઅતા રિયા, એને પોરમેહેરાય આહાકોય ચિનહ એને નોવાયે કામે કોઆડીન સાબિત કોઅયા કા યા સદા મોયાબારામાય આહા સંદેશ હાઅયો આતો.

⁴ બાકી શેહેરા લોકહામાય કુટ પોડી ગીયી, આકોય કોલહાક લોક યહૂદીહાઆરે એને કોલહાક પ્રેષિતાહા આરે ઓઅય ગીયા.

⁵ જોવે ગેર યહૂદી એને યહૂદી આહા નિંદા એને આહાવોય દોગડાટાહાટી આગેવાનહા આરે આહાપાય યેના.

⁶ તોવે આ ઈ વાત જાઅાય ગીયા, એને લુકાઉનિયા વિસ્તારા લુસ્ત્રા એને દિરબે શેહેરામાય, એને આ આહે-પાહે ભાગામાય નાહી ગીયા.

⁷ એને તાં હારી ખોબાર આખા લાગ્યા.

લુસ્ત્રામાય ચોક લેંગડા માઅહા હારાં ઓઅના

⁸ લુસ્ત્રા શેહેરમાય ચોક માઅહું આતા, જો પાગા પાંગવ્યો આતો, તો જન્માથીજ લેંગડયો આતો, એને કોવેજ નાંય ચાલલો આતો.

⁹ તો પાઉલાલ વાતો કોઅતા વોનાય રિઅલો આતો, એને પાઉલે આઅેછે ચોકદીઠ એઅયા કા ચાલ હારાં ઓઅના બોરહો હેય.

¹⁰ એને બોંબલીન આખ્યાં, “તો પાગહાવોય હિંદો ઉબો ઓઅય જો” તોવે તો કુદીન ચાલા-ફિરા લાગ્યો.

¹¹ લોકહાય પાઉલા ઈ કામ એઅઇન લુકાઉનિયા ભાષામાય બોંબલીન આખ્યાં, “દેવતા માઅહા રુપ લેઈને આપહેપાય ઉતી યેનલા હેય.”

¹² આહાય બારનાબાસાલ યુનાની દેવતા જ્યૂસ નાંવ દેના એને પાઉલાલ હિર્મેસ નાંવ દેના, કાહાકા તો મુખ્ય સંદેશ દેનારો આતો.

¹³ શેહેરા બાઆ ચોક જ્યૂસ દેવતા મંદિર આતાં, આ મંદિરા પુંજારો ડોર્બે એને કુલહા આર્યો લેય યેયન શેહેરા મોઠા ફાટકાલોગુ યેય ગીયો, તો આ લોકહાઆરે મિળીન બલિદાન કોઅરા માગતો આતો.

14 બાકી બારનાબાસ એને પાઉલ પ્રેષિતાહાય જોવે વોનાયા, તોવે ચ્યા બોજ હેરાન ઓઅય ગીયા એને ગીરદેમાય દાહુદી ગીયા, એને બોંબલીન આખા લાગ્યા,

15 “ઓ લોકહાય, તુમા કાય કોઇ રીઅલા હેય? આમા બી તે તુમહે હારકે દુઃખ-સુખ બોગાવનારે માઅહે હેય, એને તુમહાન હારી ખોબાર આખજેહે કા તુમા યે નોકામ્યે વસ્તુહુથી આલાગ ઓઇન જીવતા પોરમેહેરાઅછે યા, જ્યાંય આકાશ એને દોરતી એને દોરિયો એને જીં કાય ચ્યામાય હેય બોનાડ્યા.

16 ચ્યાય નિંગી ગીઅલા સમયામાય બોદી જાતહીંન ચ્યાહા-ચ્યાહા મોનાકોય ચાલા દેના.

17 તેરંબી ભલા કોઇન આકાશ માઅને પાઆઈ એને ફળ દેનારો ચોમાહા તુમહાન દેયને, એને ખાઅના એને આનાંદા કોય તુમહાન તૃપ્ત કોઇન ચ્યા પોરમેહેરે પોતાના બારામાય સાક્ષી દેની.”

18 ઈ આખીન બી ચ્યાહાય બોજ મોઠી મુશ્કેલથી રોક્યા કા ચ્યાહાહાટી બલિદાન નાંય કોઅે.

19 બાકી કોલહાક યહૂદી લોક અન્તાકિયા એને ઈફુનિયુમ શેહેરામાઅને યેયન લોકહાન ચ્યાહા અછે કોઇ લેદા, એને પાઉલાવોય દોગાડઝોડ કોઅયી, એને મોઅલો હોમજીન ચ્યાલ શેહેરા બાઆ ગોહલીન લેય ગીયે.

20 બાકી જોવે શિષ્ય ચ્યા ચારીચોમખી યેયન ઉબા રિયા, તોવે પાઉલ ઉઠીન શેહેરામાય ગીયો. એને બીજે દિહી બારનાબાસાઆરે દિરબે શેહેરામાય ગીયા.

સિરીયા અન્તાકિયામાય પાછા વોળના

21 એને પાઉલ એને બારનાબાસ ચ્યા શેહેરા લોકહાન હારી ખોબાર આખીન, બોજ શિષ્ય બોનાડીન, ફિરી યેતા સમયે ચ્યા લુસ્ત્રા શેહેરામાય ગીયા પાછે ચ્યા ઈફુનિયુમ શેહેરામાય ગીયા, એને પાછે ચ્યા પિસીદિયા વિસ્તારા અન્તાકિયા શેહેરામાય ગીયા.

22 એને બોદા શેહેરાહામાય શિષ્યહા મન સ્થિર કોઅતા રિયા, એને ઈ હિકાડતા આતા કા બોરાહામાંય બોની રા, એને ઈ આખતા આતા, આપહાન મોઠા દુઃખ ઉચકીન પોરમેહેરા રાજ્યામાય પ્રવેશ કોઅરા પોડી.

23 એને પાઉલ એને બારનાબાસે બોદી મંડળ્યેહેમાય વિસ્વાસ્યાહાહાટી વડીલ નિવડયા, એને ઉપહા હાતે પ્રાર્થના કોઇન પ્રભુ ઈસુલ હોઅધ્યા, જ્યાવોય ચ્યાહાય બોરહો કોઅલો આતો.

24 તોવે પિસીદિયા વિસ્તારામાઅને ઓઇન ચ્યા પંકૂલિયા વિસ્તારામાય પોઅચ્યા.

25 પિરગા શેહેરામાય વચન આખીન અત્તાલિયા શેહેરામાય યેના.

26 એને તાઅને જાહાજાકોય અન્તાકિયા શેહેરામાય પાછા ફિરી યેના, જાઅને ચ્યાહાલ પોરમેહેરા સદા મોયામાય હોઅપીન ચ્યા કામાહાટી દોવાડલા આતા, જ્યાલ ચ્યા આમી પુરાં કોઇન ફિરી યેનલા આતા.

27 અન્તાકિયા શેહેર પોઅચીન ચ્યાહાય મંડળ્યેલ યોકૂઠી કોઅચી એને આખ્યાં, પોરમેહેરાય ચ્યાહાઆરે રોયન કેહેકેન મોઠ-મોઠ કામે કોઅચે, એને કેહેકેન પોરમેહેરાય ગેર યહૂદી લોકહાન ખ્રિસ્ત ઈસુવોય બોરહો કોઅરા લાયકે બોનાડ્યા.

28 એને પાઉલ એને બારનાબાસ શિષ્યહાઆરે બોજ દિહી લોગુ રિયા.

15

યેરૂસાલેમા સબા

1 કોલહાક યહૂદી બોરહો કોઅનારા યહૂદીયા વિસ્તારામાઅને અન્તાકિયા શેહેરામાય યેના એને વિસ્વાસ્યાહાલ હિકાડાં લાગ્યા કા: “જોવે મૂસા રીતીકોય તુમહે સુન્નત નાંચ ઓઅે તે તુમા બોચી નાંચ હોકહા.”

2 જોવે પાઉલ એને બારનાબાસ ચ્યાહાઆરે બોજ મતભેદ એને કોલહાક બોલા-બોલી ઓઅચા તોવે ઈ નિશ્ચય કોઅચા કા પાઉલ એને બારનાબાસ, અન્તાકિયા કોલહાક લોકહાઆરે યેરૂસાલેમા શેહેરામાય જાય એને યા સવાલાવોય પ્રેષિત એને વડીલાહાઆરે ચર્યા કોઅરી.

3 પાછે મંડળી લોકહાય ચ્યાહાલ વાટેહાટી પોયહા એને ખાઅના દેયને દોવાડી દેના, એને ચ્યા ફીનીકે એને સમરૂન વિસ્તારામાઅને ગીયા, એને તાઅને વિસ્વાસ્યાહા આરે વાત કોઅચી કા, ગેર યહૂદી લોક કેહેકેન હારી ખોબાર વોનાયને ખ્રિસ્તાવોય બોરહો કોઅચ રીઅલા હેય, ઈ આખીન ચ્યાહાય બોદા વિસ્વાસી બાહહાલ બોજ આનંદિત કોઅચા.

4 જોવે ચ્યા ચેરસાલેમ શેહેરમાય પોઅચ્યા, તોવે મંડળી લોક એને પ્રેષિત એને વડીલ ચ્યાહાન આનંદકોય મિળ્યાં, એને પાઉલ એને બારનાબાસે આપ્યાં કા પોરમેહેરાય ચ્યાહાઆરે રોઇન કોહડે-કોહડે કામ કોઅલે આતે.

5 બાકી પોરૂષીયાહા ટોળામાઅને જ્યાહાય બોરહો કોઅલો આતો, ચ્યાહામાઅને કોલહાક જાઅહાય ઉઠીન આપ્યાં, “ગેર ચહૂદીયાહાલ સુન્નત કોઅના એને મૂસા નિયમ માનના આગના દાં જોજે.”

6 તોવે પ્રેષિત એને વડીલ ચે વાતહેબારામાય વિચાર કોઅરાહાટી ચોકહા જાયા.

7 તોવે પિત્તરાય બોજ બોલા-બોલી ઓઅઇ ગીયા પાછે ઉઠીન ચ્યાહાન આપ્યાં, “ઓ બાહાહાય, તુમા જાંઅતાહા, કા બોજ દિહાહા પેલ્લા જાયા, કા પોરમેહેરે તુમહેમાઅને માન નિવડી લેદહો, કા માપાયને ગેર ચહૂદી લોક હારી ખોબાર વોનાઈન બોરહો કોઅે.

8 એને મન પારાખનારા પોરમેહેરાય ચ્યાહાનબી આમે હારકા પવિત્ર આત્મા દેયને ચ્યેય દેખાડ્યાં કા ચ્યાય ગેર ચહૂદી લોકહાન પોતાના લોકહા હારકા માની લેદા.

9 એને બોરહો કોઅવાથી ચ્યાહા મન શુદ્ધ કોઇન આમહા માય એને ચ્યાહામાય કાયબી ભેદ નાંચ રાખ્યો.

10 તે આમી તુમા ઈ આખીન કાહા પોરમેહેરા પરીક્ષા કોઅતાહા, કા મૂસા નિયમ એને આમહે ચહૂદી રીતરીવાજાહાન પાળાહાટી યા ગેર ચહૂદી વિસ્વાસ્યાહાવોય વોદારે વોજો થોવા, જ્યાલ નાંચ આમહે વડીલ ઉઠાવી હોક્યા એને નાંચ આમા ઉઠાવી હોકજે.

11 એહેકોય કોઅના ઠીક નાંચ હેય, આમી ઓ નિર્ણય હેય કા જેહેકેન પ્રભુ ઈસુ સદા મોયાકોય આમહાન તારણ મિળ્યાં, ચ્યેજ રીતીકોય ચ્યાહાનબી મિળી.”

12 તોવે બોદી સબ્બા ઠાવકાજ રોયન બારનાબાસ એને પાઉલા વોનાયા લાગ્યા, કા પોરમેહેરાય ચ્યાહાકોય ગેર ચહૂદી લોકહામાય કોહડે-કોહડે મોઠે ચિન્હે, એને ચમત્કારા કામે દેખાડ્યે.

ચાફૂબા નિર્ણય

13 જોવે ચ્યા બોલી ચુક્યા તોવે ચાફૂબ આખા લાગ્યો.

“ઓ બાહાહાય, મા વોનાયા.

14 સિમોન પિત્તરાય હોમજાડ્યા, કા પોરમેહેરાય પેલ્લાને-પેલ્લા કેહેકેને ગેર ચહૂદીયાહાવોય કોહડી કૃપા કોઅયી કા આહામાઅને કોલહાક લોકહાન પોતાના લોક બોના નિવડયા.

15 એને યાકોઈન ભવિષ્યવક્તાહા વાતોબી મિળત્યોહો, જેહેકોય લિખલાં હેય,

16 ‘ચા પાછે આંય પાછો યેયન દાઉદા રાજ્યા જીં આ દુશ્માનાહાય નાશ કોઅઇ દેનેલ આલ આંય પાછો બોનાડીહી, એને પોડલો માંડવો પાછે આંય બોનાડીહી, એને આલ ઉબો કોઅહી,

17 યાહાટી કા બાકી બોદાજ લોક, બોદા ગેર ચહૂદીયાહા હાતે, જ્યાહાલ માયે પોતાના લોક બોનાહાટી નિવડયાહા, પ્રભુલ હોદે,

18 ઓ તોજ પ્રભુ આખહે જો દુનિયા શુરવાત પાઅને યે વાતહે ખોબાર દેતો યેનહો.’

19 યાહાટી મા વિચાર ઓ હેય, કા ગેર ચહૂદીયાહા માઅને જ્યા લોક પોરમેહેરાપાય યેતહા, આહાન ઈ આખીન દુઃખ મા દાહા, કા મૂસા નિયમ એને આમહે ચહૂદી રીતિરીવાજાહાલ માનના જરૂર હેય.

20 બાકી આહાન યોક ચિઠ્ઠી લોખી દોવાડા, ઈ આખાહાટી કા આ માહાં નાંય ખાય જીં લોકહાય મુર્તિહયેલ ચોડાવ્યાહા, વ્યબિચારાથી દુર રોય, ગોગી દાબીન માઅલા જોનાવરા માહાં નાંય ખાય એને જોનાવરહા લોય નાંય પિયે.

21 કાહાકા પેલ્લા સમયથી શેહેરાહામાય મૂસા નિયમા પ્રચાર કોઅનારા ચાલી યેનહા, એને તી બોદાજ આરામા દિહાલ સોબાયે ઠિકાણામાય વાચવામાય યેહે.”

ગેર ચહૂદી વિસ્વાસ્યાહાલ પત્ર

22 તોવે ચેરૂસાલેમ શેહેરામાય પ્રેષિત એને વડીલાહાય બોદી મંડળીઆરે આપહે માઅને કોલહાક માટડાહાલ નિવાડના નોક્કી કોઅયા, આહાય ચહૂદા, જો બારનાબાસ આખવામાય યેહે, એને સિલાસાલ નિવડયા, યા બેની વિસ્વાસ્યાહામાય બોજ માનાપાના આતા. આહાન પાઉલ એને બારનાબાસાઆરે અન્તાકિયા શેહેરમાય દોવાડી દેના.

23 એને ચ્યાહાય તી ચિઠ્ઠી ચ્યાહાઆરે લેય દોવાડયા જ્યામાય લોખાલા આતા, “અન્તાકિયા શેહેર, એને સિરીયા એને કિલિકિયા વિસ્તારામાય રોનારા ગેર યહૂદી વિસ્વાસ્યાહાલ, પ્રેષિત એને વડીલાહા સલામ.

24 આમા વોનાયાહા, કા આમહામાને કોલહાક લોક તુમહેપાય ચેનલા હેય, એને ચ્યાહાય તુમાહાલ ચ્યાહા વાતહેકોય ગાબરાવી દેના, એને તુમહે મન ઉલટાવી દેનહે બાકી આમહાય ચ્યાહાલ આગના નાંય દેનલી આતી.

25 યાહાટી આમહાય ચોક મોનાકોય હાચ્યાં હોમજ્યા, એને આમાહાય કોલહાક માટડાહાલ નિવાડના નોક્કી કોઅયા એને ચ્યાહાન બારનાબાસ એને પાઉલા આરે તુમહેપાય દોવાડજે.

26 ચે તે ઓહડે માઅહે હેય, જ્યાહાય પોતાનો જીવ આંય પ્રભુ ઈસુ ખ્રિસ્તા નાંવા કોય મુશ્કીલમાય ટાક્યોહો.

27 યાહાટી આમા તુમહાન ઈ આખાહાટી યહૂદા એને સિલાસાલ દોવાડી રીઅલા હેય કા આમહાય તુમહે સાવાલા બારામાય કાય નિર્ણય લેદલો હેય.

28 પવિત્ર આત્માલ, એને આમહાનબી ઠીક માલુમ પોડ્યા કા ચે જરુરી વાતહેલ છોડીન, તુમહાવોય આજુ વોજો નાંય ટાકે;

29 તુમા ચ્યા માહાલ નાંય ખાઅના જી લોકહાય મૂર્તિહયેન બેટ ચોડાવ્યાહા, વ્યબિચારાથી દુર રોજા, ગોગી દાબીન માઅલા જોનાવરહા માહાં નાંય ખાઅના એને જોનાવરહા લોય નાંય પીયના, જોવે તુમા ચો વાતો માની લાહા તે તુમહે ભલા ઓઅરી, તુમા શાંત્યેથી રા.”

30 પાછે ચ્યા છુટા પોડીન અન્તાકિયા શેહેરામાય પોઅચ્યા, એને સોબાયેલ બેગી કોયન ચ્યા પત્રાન ચ્યાહાન દી દેના.

31 એને ચે તી પત્ર વાચીન ચ્યા ઉપદેશા વાતહેકોય બોજ આનંદિત જાયે.

32 એને યહૂદા એને સિલાસ જ્યા પોતેબી ભવિષ્યવક્તા આતા, ચ્યાહાય બોજ વાતહેકોય વિસ્વાસ્યાહાલ ઉપદેશ દેયન સ્થિર કોઅયા.

33 ચ્યા કોલહાક દિહી તાં રોયા, પાછે વિસ્વાસ્યાહાય ચ્યાહાન શાંત્યેથી વિદાય ઓઅના બોરકાત દેયને ચેરૂસાલેમ મંડવ્યેમાય પાછા દોવાડી દેના.

34 બાકી સિલાસે અન્તાકિયા શેહેરામાય રોઅના નોક્કી કોઅયા, ચ્યાહાટી યહૂદા યોખલોજ યેરૂસાલેમમાય પાછો જાતો રિયો.

35 એને પાઉલ એને બારનાબાસ અન્તાકિયામાય રોય ગીયા, એને આજુ બિજા બોજ લોકહાઆરે પ્રભુ ઈસુ વચના સંદેશ દેતા એને હારી ખોબાર આખતા રિયા.

પાઉલ એને બારનાબાસા બોલા-બોલી

36 કોલહાક દિહાકોય પાઉલાય બારનાબાસાલ આખ્યાં, “જ્યા-જ્યા શેહેરામાય આમહાય પ્રભુ વચન વોનાડલા આતા, યા, પાછે ચ્યામાય ચાલીન પોતાના વિસ્વાસ્યાહાલ એએ કા ચ્યા કોહડા હેય.”

37 તોવે બારનાબાસે યોહાનાલ જો માર્ક આખવામાય યેહે, આરે લેઅના વિચાર કોઅયો.

38 બાકી પાઉલ ચ્યાલ જો પંફૂલિયા વિસ્તારામાય ચ્યાહાથી આલાગ ઓઈ ગીયેલ, એને કામાવોય ચ્યાઆરે નાંય ગીયો, ચ્યાલ આરે લેય જાયના હારાં નાંય હોમજ્યા.

39 પાછે ઓહડી બોલા-બોલી ઓઅયી કા પાઉલ એને બારનાબાસ ચ્યા બેની યોકબિજાથી આલાગ ઓઈ ગીયા, એને બારનાબાસ, માર્કાલ લેઈને ઉડીવોય બોહીન સાઈપ્રસ બેટા એછે જાતો રિયો.

પાઉલા સિલાસા હાતે બીજયેવાર સંદેશા મુસાફરી

40 પાઉલાય સિલાસાલ નિવડી લેદો, એને અન્તાકિયા શેહેરા વિસ્વાસ્યાહાલ પોરમેહેરા સદા મોયામાય હોઅપી દેના એને તો અન્તાકિયા શેહેરામાઅને જાતો રિયો.

41 એને મંડવ્યેહે વિસ્વાસ્યાહાલ મજબુત કોઅતા, સિરીયા એને કિલિકિયા વિસ્તારામાઅને રોયન ગીયા.

16

પાઉલ એને તિમોથી

1 પાછા પાઉલ એને સિલાસ દિરબે એને લુસ્ત્રા શેહેરામાયબી ગીયા, એને ચ્યા તિમોથી નાંવા યોક શિષ્ય આતો, ચ્યા આયહો યહૂદી વિસ્વાસી આતી, બાકી ચ્યા આબહો ગેર યહૂદી યુનાન દેશા રોનારો આતો.

2 તે લુસ્ત્રા એને ઈકુનિયામ શેહેરાહા વિસ્વાસીયાહા માય ચ્યા સાક્ષી હારી આતી.

૩ પાઉલા ઇચ્છા આતી કા તો ચ્યાઆરે જાય, એને જ્યા ગેર યહૂદી લોક ચ્યા જાગામાય આતા ચ્યાહા લીદે ચ્યાલ લેયને ચ્યા સુન્નત કોઅયી, કાહાકા ચ્યે બોદે જાંઅતે આર્તે, ચ્યાહા આબહો યુનાન દેશા રોનારો આતો.

૪ પાઉલ એને ચ્યા હાંગાત્યા શેહેર-શેહેર જાતા ચ્યે વિદેહેન જ્યો યેરૂસાલેમ શેહેરમાય પ્રેષિત એને વડીલાહાય ઠોરાવલી આતી, માનાહાટી વિસ્વાસ્યાહાન પોઅચ્યાડવામાય જાતે આર્તે.

૫ યેજપરમાણો મંડળ્યો બોરહામાય મજબુત ઓઅત્યો ગીયો એને સંખ્યામાય રોજદીને વોદત્યો ગીયો.

પાઉલા દર્શન

૬ એને પાઉલ, સિલાસ એને તિમોથી ચ્યા કુગીયા એને ગલાતીયા વિસ્તારામાઅને રોયન ગીયા, કાહાકા પવિત્ર આત્માય ચ્યાહાન આસિયા વિસ્તારામાય વચન પ્રચાર કોઅના મોનાય કોઅયી.

૭ એને ચ્યાહાય મુસીયા વિસ્તારા પાહી પોઅચીન, બિથુનિયા વિસ્તારામાય જાયના વિચાર્યા, બાકી ઈસુ આત્માય ચ્યાહાન જાં નાંચ દેના.

૮ પાછે ચ્યા મુસીયા વિસ્તારામાઅને ઓઇન ત્રોઆસ શેહેરામાય યેના.

૯ તાં પાઉલે રાતી ચોક દર્શન એઅચા કા ચોક મોકોદુનિયા વિસ્તારામાય રોનારા ચોક માઅહું ઉબા આતા, એને તો ચ્યાલ વિનાંતી કોઇન આખહે કા, “દોરિયા ચ્યે કાની ઉતીન મોકોદુનિયા માય યે, એને આમે મોદાત કોઅો.”

૧૦ ચ્યા ઈ દર્શન દેખીન આમહાય તારાતુજ મોકોદુનિયા વિસ્તારામાય જાઅના વિચાર્યા, ઈ હોમજીન કા પોરમેહેરાય આમહાન ચ્યાહાન હારી ખોબારે સંદેશ દાંહાટી હાધાહા.

૧૧ યાહાટી ત્રોઆસ શેહેરામાઅને જાહાજા માય બોહીન આમા હિદા સુમાત્રા બેટવોય એને બીજે દિહી નિયાપુલિસ શેહેરામાય યેના.

૧૨ તાઅને આમા ફિલિપ્પી શેહેરામાય પોઅચ્યા, જું મોકોદુનિયા વિસ્તાર માઅને શેહેર, એને રોમ્યાહા વોહતી હેય, એને આમા ચ્યા શેહેરામાય કોલહાક દિહીહુદુ રિયા.

13 આરામા દિહે આમા શેહેરા ફાટકે બારે નોયે મેરે ઈ હોમજીન ગીયા કા તાં યહૂદીયાહા પ્રાર્થના કોઅના જાગો ઓરી, એને બોહીન ચ્યે થેઅયેહેઆરે જ્યો યકઠયો જાયલ્યો આત્યો, વાતો કોઅરા લાગ્યા.

યુરોપા પેલ્લી બોરહાવાળી

14 એને લુદીયા નાંવા થુવાતીર શેહેરા જાંબળા રોંગા ડોગલેં વેચનારી ચોક પોરમેહેરા આરાધના કોઅનારી થેઅે વોનાય રીયલી આતી, એને પ્રભુય ચ્યે મોન ખુલ્યા, કા પાઉલા વાતેહેવોય ધ્યાન દેય.

15 એને જોવે ચ્યેય ચ્યે કુટુંબ હાતે બાપતિસ્મા લેદા, તોવે ચ્યેય વિનાંતી કોઅયી, “જો તું માન પ્રભુવા વિસ્વાસીની હોમાજતોહો, તે ચાલીન મા ગોઆમાય રા,” એને તી આમહાન માનાડી લેય ગીયી.

બુતા પાઅને છુટકો

16 જોવે આમા પ્રાર્થના કોઅના જાગાવોય જાય રીઅલે આર્તે, તોવે આમહાન ચોક દાસી મિળી, જ્યેમાય ચોક ઓહડો બુત આતો, ચ્યા મોદાતકોય તી ભવિષ્ય પ્રગટ કોઅઇ દેતી આતી, એને તી ભવિષ્ય પ્રગટ કોઅવાથી ચ્યે માલિકાહા હાટી ઘોણા કાય કામાવી લેય યા આતી.

17 તી પાઉલા એને આમહે પાહલા યેઇન બોંબલા લાગી, “યે માઅહે પરમપ્રધાન પોરમેહેરા દાસ હેય, જ્યા તુમાહાલ તારણા વાટ દેખાડતાહા.”

18 તી બોજ દિહી લોગુ એહકોયજ કોઅતી રિયી, બાકી પાઉલ હેરાન જાયો, એને ફિરીન ચ્યા બુતાલ આખ્યાં, “આંય તુલ ઈસુ ખ્રિસ્તા નાંવા કોઅઇ આગના દેતહાવ, કા ચ્યેમાઅને નિંગી જો એને તી ચ્યેજ ગેડી નિંગી ગીયા.”

19 જોવે ચ્યે માલિકાહાય દેખ્યા, કા આમહે કામાણ્યે આશા જાતી રીયહી, તોવે પાઉલાલ એને સિલાસાલ દોઇન ચોકામાય પ્રધાનાહા પાય ખેચી લી ગીયે.

20 એને ચ્યાહાન ન્યાય કોઅનારા ઓદિકાર્યાહા પાય લી જાયને આખ્યાં, “યે માઅહે જ્યે યહૂદી હેય, આમહે શેહેરામાય બોજ ગરબડ કોઅઇ રીયહે.

21 એને ઓહડયો રીત્યો આખી રીયહે, જ્યાહાલ ગ્રહણ કોઅના કા માનના આમા રોમી નાગરીકાહા હાટી ઠીક નાંય હેય.”

પાઉલ એને સિલાસ જેલેમાય

22 તોવે ટોળા લોક પાઉલ એને સિલાસા વિરુદ્ધમાય ચોકઠા ઓઇન ચ્યાહાપાય યેના, એને ન્યાય કોઅનારા ઓદિકારી લોકહાય ચ્યાહા ડોગલે ફાડીન કાડી ટાક્યે, એને ચ્યાહાન ફટકાથી ઠોકના આગના દેની.

23 એને બોજ ફટકાથી ઠોકીન ચ્યાહાય ચ્યાહાન જેલેમાય કોડી દેના એને દ્વારપાલાલ આગના દેની કા ચ્યાહાવોય નોજાર રાખે.

24 ચ્યાય ઓહડી આગના વોનાયને ચ્યાહાન માજેને ખોલ્યેમાય રાખ્યાં એને ચ્યાહા પાગહાલ લાકડા બેડયેહે માય બાંદો દેના.

પાઉલા એને સિલાસા જેલેમાઅને છુટકો

25 આરદી રાતી લગભગ પાઉલ એને સિલાસ પ્રાર્થના કોઅતા પોરમેહેરા સ્તુતિ ગીતે આખતા આતા, એને જેલ્યા ચ્યાહા વોનાય રીયલા આતા.

26 કા ઓલહામાય ચોકદાજ ચોક મોઠો દોરતીકંપ જાયો, ઓલે હુદુ કા જેલે પાયો બી આલી ગીયો, એને તારાત બોદા દરવાજા ખુલી ગીયા, એને બોદહા બંધન ખુલી ગીયે.

27 એને દ્વારપાળ જાગી ઉઠયો, એને જેલે દરવાજા ખુલ્લાં દેખીન હોમજ્યો કા જેલ્યા નાહી ગીયા, તોવે ચ્યાય પોતે તારવાય લેઈને પોતાનાલ માઆઇ ટાકના વિચાર્યા.

28 બાકી પાઉલે ઉચા આવાજા કોય બોંબલીન આખ્યાં, “પોતે પોતાલ કાય નુકસાન નાંય કોઅના, કાહાકા આમા બોદા ઈહીંજ હેજે.”

29 તોવે તો દિવો માગીન માજે દાંહાદી ગીયો, એને કાપતોજ પાઉલ એને સિલાસા આગલા પોડયો.

દ્વારપાળા રુદ્યા બોદલાણ

30 એને ચ્યાહાન બારે લેય ચેયન આખ્યાં, “ઓ સાયબાહાય, તારણાહાટી આંય કાય કોઉ?”

31 ચ્યાહાય આખ્યાં, “પ્રભુ ઈસુ ખ્રિસ્તાવોય બોરહો કોઓ, તોવે તું એને તો ગોર્યાહા તારણ ઓઅરી.”

32 એને ચ્યાહાય ચ્યાલ એને ચ્યા બોદા ગોઅને લોકહાન પ્રભુ વચન વોનાડયા.

33 એને રાતી ચ્યેજ ગેડી ચ્યે ચ્યાહાન ગોઓ લેય જાયને ચ્યાહા જ્યા ઘાવ આતા ચ્યા દોવ્યા, એને ચ્યાય પોતાના બોદા ગોર્યાહા હાતે તારાત બાપતિસ્મા લેદા.

34 એને ય્યાય ય્યાહાન પોતાના ગોઆમાય લેય જાયન, ય્યાહાન ખાઅના ખાવાડ્યા, એને બોદા ગોર્યાહા આરે પોરમેહેરાવોય બોરહો કોઇન બોજ આનંદ કોઅયો.

35 બિજો દિહી જાયો તોવે ન્યાય કોઅનારા ઓદિકાર્યાહાય જેલે સીપાડાલ આખી દોવાડ્યા કા ય્યા માઅહાલ છોડી દા.

36 દ્વારપાળે યો વાતો પાઉલાલ આખી દેખાડ્યો, “ન્યાય કોઅનારા ઓદિકાર્યાહાય તુમહાન છોડી દેયના આગના દોવાડી દેનલી હેય, યાહાટી આમી નિંગીન શાંતિથી જાતા રા.”

37 બાકી પાઉલે ય્યાહાન આખ્યાં, “ચ્યાહાય આમહાન જ્યા રોમ દેશા રોનારે માઅહે હેય, દોષી ઠોરાવ્યા વોગાર લોકહા હામ્મે ઠોક્યાં એને જેલેમાય ટાક્યા, આમી કાય આમહાન દોબીન દોવાડી રીયહે? એહેકોય નાંય, બાકી ય્યા પોતે યેયન આમહાન બારે લેય જાય.”

38 સીપાડાહાય યો વાતો ન્યાય કોઅનારા ઓદિકાર્યાહાન આખી દેન્યો, એને ય્યા ઈ વોનાઇન કા પાઉલ એને સિલાસ રોમ દેશા રોનારા હેતા, બિઇ ગીયા,

39 એને યેયન ચ્યાહાય ચ્યાહાપાય માફી માગી, એને બારે લી જાયના વિનાંતી કોઅયી, કા શેહેરામાઅને જાતા રા.

40 પાઉલ એને સિલાસ જેલેમાઅને નિંગીન લુદીયા ગોઓ ગીયા, એને વિસ્વાસ્યાહાલ મિળીન ય્યાહાન ઉત્તેજન દેયને તાઅને જાતા રિયા.

17

થેસ્સાલોનિકા શેહેરમાય પાઉલ એને સિલાસ

1 પાછે પાઉલ એને સિલાસ અમ્પિપુલીસ શેહેર એને અપ્પુલોનિયા શેહેરમાઅને થેસ્સાલોનિકા શેહેરમાય યેના, જાં યહૂદીયાહા યોક સોબાયે ઠિકાણ આતા.

2 એને પાઉલ ય્યા કાયમની આદાતે પરમાણે ચ્યાહાપાય ગીયો, તીન આરામા દિહીહુદુ ચ્યાહાઆરે પવિત્રશાસ્ત્રા માઅને વાતહેકોય બોલા-બોલી કોઅઇ.

3 એને હોમજાડી રિઅલો આતો એને સાબિત કોઅય રિઅલો આતો કા ખ્રિસ્તા દુઃખ વેઠના, એને મોઅલા માઅને જીવી ઉઠના, નોક્કીજ આતા, “ઓ ઈસુ જ્યા બારામાય આંય તુમહાન સંદેશ આખતાહાવ, તો ખ્રિસ્ત હેય.”

4 ચ્યાહામાઅને કોલાહાક યહૂદીયાહાય, એને પોરમેહેરા બિક રાખનારા યુનાની લોક, એને બોજ બોદયે પ્રમુખ થેઅયેહેયબી બોરહો કોઅયો એને ચ્યે પાઉલા એને સિલાસા આરે મિળી ગીયે.

5 બાકી યહૂદીયાહાય બિજવાઈન આટામાઅને લોકહાન કોલહાક ખારાબ માઅહાલ ચ્યાહાઆરે લેદા, એને લોકહાન ટોળો કોઇન શેહેરામાય દંગો કોઅરા લાગ્યા, એને ચ્યાહાય પાઉલા એને સિલાસાલ હોદાહાટી યાસોના ગોઆવોય હમલો કોઇન પાઉલા એને સિલાસાલ લોકહા હામ્મે લેય યેયના વિચાર્યા.

6 એને ચ્યાહાન નાંચ મિળ્યાં, ચ્યા ઈ બોબાલતાજ યાસોન એને કોલહાક વિસ્વાસ્યાહાલ શેહેરા ન્યાય કોઅનારા ઓદિકાર્યાહા હામ્મે ખેચી લેય યેના, “ચા લોક જ્યાહાય બોદેજ જાગે પરેશાની ફેલાડી દેનહી, ઈહીબી યેનહા.

7 એને યાસોને ચ્યાહાન ચ્યા ગોઓ રોઅના જાગો દેનહો, એને યા બોદા લોક કૈસરા કાયદાહા વિરોદ કોઅતાહા એને આખતેહે કા ઈસુ નાંવા બિજો કાદો રાજા હેય.”

8 જોવે લોકહા ગીરદી એને શેહેરા ન્યાય કોઅનારા ઓદિકારી યો વાતો વોનાયા, તોવે ચ્યા બિજવાય ગીયા.

9 એને ચ્યાહાય યાસોન એને બિજા લોકહાન જામીન વોય છોડી દેના.

બિરીયા શેહેરામાય પાઉલ એને સિલાસ

10 વિસ્વાસ્યાહાય તારાત રાતીન-રાતી પાઉલાલ એને સિલાસાલ બિરીયા શેહેરમાય દોવાડી દેના, એને ચ્યા તાં પોઅચ્યા પાછે યહૂદીયાહા સોબાયે ઠિકાણામાય ગીયા.

11 યા લોક તે થેસ્સાલોનિક શેહેરા યહૂદીયાહાથી વદારે હારાં આતા, એને ચ્યાહાય હાચ્યે મોનાકોય વચન વોનાય લેદેલ, એને રોજ દિને પવિત્રશાસ્ત્રામાય હોદતા રિયા કા યો વાતો એહકોયજ હેત્યો કા નાંચ.

12 યાહાટી ચ્યાહામાઅને બોજ જાઅહાય એને યુનાની આબરૂદાર થેઅયેહે માઅને એને માટડાહામાઅનેબી બોજ જાઅહાય બોરહો કોઅયો.

13 બાકી જોવે થેસ્સાલોનિક શેહેરા યહૂદી લોક જાંઆય ગીયા કા પાઉલ બિરીયા શેહેરમાયબી પોરમેહેરા વચન આખહે, તે તાં બી યેયન લોકહાન ઉસરાવાં એને ભરમાવા લાગ્યા.

14 તોવે વિસ્વાસ્યાહાય પાઉલાલ તારાતુજ દોવાડી દેનો કા દોરિયા મેરે જાતો રોય, બાકી સિલાસ એને તિમોથી બિરીયામાયજ રોય ગીયા.

15 આ લોક જ્યા પાઉલાલ લેય જાય રીઅલા આતા આ હાતે એથેન્સ શેહેરા લોગુ ગીયા, એને પાઉલા યે આગનાયે હાતે આ બિરીયા ફિરી ગીયા કા સિલાસ એને તિમોથીલ જલદી આપાય દોવાડી દેય.

એથેન્સ શેહેરામાય પાઉલ

16 જોવે પાઉલ એથેન્સ શેહેરામાય આહા વાટ જોવતો આતો, તોવે શેહેરાલ મુર્તિહીથી બોઆલા દેખીન આ આત્મામાય બોજ દુઃખી જાયો.

17 યાહાટી તો સોબાયે ઠિકાણામાય ચહૂદીયા એને પોરમેહેરા બિક રાખનારા ગેર ચહૂદી લોકહાન એને બાજારામાય જ્યા લોક મિળતા આતા, આહા હાતે દિનેરોજ બોલા-બોલી કોઅયા કોઅતો આતો.

18 તોવે આ પુંજારા જ્યા ઈપિકુરી એને સ્તોઈકી કોય જાંઅતાહા આ હિકાડનારા માસ્તાર ગોણવામાય ચેત આહામાઅને કોલહાક આ હાતે બોલા લાગ્યા, એને કોલહાક લોકહાય આખ્યાં, “ઓ બકવાસ્યો કાય આખા માગહે?” બાકી બીજહાંય આખ્યાં, “તો પારકા દેવતાહા પ્રયાર કોઅનારો માલુમ પોડહે,” આહાય ઈ યાહાટી આખ્યાં કાહાકા તો ઈસુવા એને આ મોઅલા માઅને પાછા જીવી ઉઠના બારામાય હારી ખોબાર વોનાડતો આતો.

19 તોવે આ આલ આહાજ આરે અરિયુપગુસ નાંવા સોબાયે ઠિકાણે લેય ગીયા એને પુછ્યાં, “કાય આમા જાંઆય હોકજેહે, કા ઓ નોવો સંદેશ જો તું વોનાડતોહો, કાય હેય?”

20 કાહાકા તું નોવાયે વાતો આમહાન વોનાડતોહો, યાહાટી આમા જાંઅરા માગતાહા કા યા મોતલાબ કાય હેય?”

21 (યાહાટી કા બોદા એથેન્સમાંય રોનારા એને પારદેશી જ્યે તાં રોતે આર્તે આહાન આહા બોદો સમય નવી-નવી વાતો આખના એને વોનાયા હાટી વિતાવના પોસંદ હેય.)

અરિયુપગુસા માય પાઉલા સંદેશ

22 તોવે પાઉલે અરિયુપગુસ નાંવા ચોક સોબાયે ઠિકાણા વોચમાય ઉબો રોયન આખ્યાં, ઓ એથેન્સના લોકહાય, આંય એઅતાહાવ કા તુમા બોદયે વાતહેમાય દેવતાહાલ વોદારે માનનારે હેર્તે.

23 કાહાકા આંય ફિઅત્યે વેળે તુમહે પૂજા કોઅના વાનાહાલ આંય એઅતો આતો, તોવે માયે ચોક ઓહડી વેદિબી દેખી, જ્યેવોય લોખલાં આતા, ઓજાણ્યા દેવાહાટી, યાહાટી જ્યા તુમા જાંઅયા વોગાર આરાધના કોઅતાહા, આંય તુમહાન આ બારામાય હારી ખોબાર આખતાહાવ.

24 જ્યા પોરમેહેરાય દોરતી એને અ્યેવોયને બોદ્યે વસ્તુહુલ બોનાડયાહા, તો હોરગ્યા એને દોરત્યે માલિક ઓઇન આથેકોય બોનાવલા મંદિરામાય નાંય રોય.

25 નાંય કાદીબી વસ્તુહુ ગોરજેહાટી આલ માઅહા મોદાતે આલ ગોરાજ નાંય હેય, કાહાકા તો પોતેજ બોદહાલ જીવન એને શ્વાછ એને બોદાંજ કાય દેહે.

26 આય ચોકુજ માઅહાથી માઅહા બોદી જાત્યો બોદ્યે દોરત્યેવોય રાંહાટી બોનાડીહી, એને આ ઠરાવલા સમય એને રોઅના હોદ યાહાટી બાંદહી,

27 પોરમેહેરે એહેકેન યાહાટી કોઅયા કા લોક આલ હોદે, એને બોની હોકે આ આપાય પોઅચી હોકે, એને તેરુંબી તો આમહે માઅને કાદાથી દુર નાંય હેય.

28 કાહાકા આમા આમાય જીવતા રોતહા, એને ચાલતાહા-ફિરતાહા, એને આમાય મજબુત રોજહે. ઠીક તેહેકોયજ જેહેકોય તુમહે કોલાહાક કવી લોકહાયબી આખ્યાહા, “આમા તે આજ કુળા બી હેજે.”

29 કાહાકા આમા પોરમેહેરા પોહું હેજે યાહાટી આમહાન ઈ કોયદિહી વિચાર નાંય કોઅરા જોજે કા પોરમેહેર, હોના કા ચાંધે કા દોગાડા હારકો હેય, જીં માઅહા આથાકોય એને વિચારાહાકોયન બોનાડયાહા.

30 આમી લોગુ પોરમેહેરે લોકહા અજ્ઞાનતાના સમાયાવોય દિયાન નાંય દેના, બાકી આમી બોદે જાગે બોદાજ માઅહાલ પાપ કોઅના બંદ કોઅના આગના દેહે.

31 કાહાકા આય ચોક દિહી નોક્કી ઠોરવ્યોહો, આમાય તો આખા દુનિયા ન્યાય કોઅરી, પોરમેહેરે આલ મોઅલા માઅને પાછો જીવતો ઉઠાડીન બોદા લોકહાન યે વાતે સાબિતી દેય દેનહી.

32 મોઅલા માઅને પાછા જીવી ઉઠના વાત હાંબળીન કોલાહાક તે મશ્કરી કોઅરા લાગ્યા, એને બીજહાંચ આખ્યાં, “ઈ વાત આમા તોપાઅને પાછા કોવેતેબી વોનાયુહું.”

33 યાવોય પાઉલ ચ્યાહા વોચમાઅને નિંગી ગીયો.

34 બાકી કોલાહાક લોક ચ્યાઆરે મિળી ગીયા, એને ચ્યાહાય બોરહો કોઅયો, જ્યામાય દિયુનુસીયુસ જો અરિયુપગુસા સભ્ય આતો, એને દમરિસ નાંવા યોક થેએ આતી, એને ચ્યાઆરે બીજાબી કોલહાક લોક આતા.

18

કરિંથમાય પાઉલ

1 યા પાછે પાઉલ એથેન્સ શેહેર છોડીન કરિંથ શેહેરામાય યેનો.

2 એને તાં અફુલાસ નાંવા યોક ચહૂદી મિળ્યો, જ્યા જન્મો પુનુસ વિસ્તારામાય ઓઅયેલ, તો ચ્યા થેએ પ્રિસ્કીલા આરે ઇટલી વિસ્તારામાઅને આમહીજ યેનલો આતો, કાહાકા સમ્રાટ કલોદિયુસ બોદા ચહૂદીયાહાલ દંગો કોઅવાથી રોમમાઅને કાડી દેનેલ, યા લીદે ચ્યા કરિંથ શેહેરામાય યેના.

3 પાઉલ ચ્યાહાન મિળાં ગીયો કાહાકા ચે ચ્યા હારકાજ માંડવા બોનાડનારે આતે, ચ્યાહાટી તો ચ્યાહાઆરે રોચન કામ કોઅરા લાગ્યો.

4 એને પાઉલ બોદાંજ આરામા દિહાલ સોબાયે ઠિકાણાહામાય બોલા-બોલી કોઇન ચહૂદીયાહાલ એને યુનાન્યાહાલબી ઈસુ ખ્રિસ્તાવોય બોરહો કોઅરાહાટી હુમજાડતો આતો.

5 જોવે સિલાસ એને તિમોથી મોકોદુનિયા વિસ્તારામાઅને યેના, તોવે પાઉલે માંડવા બોનાડના બંદ કોઅઇ દેના એને તો વચન હુમજાડના દુંદમાય લાગીન ચહૂદીયાહાલ સાક્ષી દેતો આતો કા ઈસુ ઓજ ખ્રિસ્ત હેય.

6 બાકી જોવે ચહૂદી પાઉલા વિરુદ્ધ એને નિંદા કોઅરા લાગ્યા, તોવે ચ્યાય પોતાના ફાડકે ઝટકિન ચ્યાહાન આખ્યાં, “ચા ડોંડ તુમાંજ બોગવાહા, આંચ તે નિર્દોષ હેતાંવ, આમીને આંચ ગેર ચહૂદી લોકહામાય પોરમેહેરા સંદેશ પ્રચાર કોઅહી.”

7 એને સોબાયેહે ઠિકાણા માઅને નિંગીન તો તીતુસ યુસ્તસ નાંવા પોરમેહેરા ચોક ભક્તિ કોઅનારા ગોઅમે ગેર યહૂદી લોકહાન હિકાડાં યેનો, જ્યા ગુઉ સોબાયે ઠિકાણાલ લાગલા આતા.

8 તોવે સોબાયે ઠિકાણા આગેવાન ક્રિસપુસે આ પુરાં ગોર્યાહા હાતે પ્રભુવોય બોરહો કોઅયો, એને બોજ કરિંથ માયનાહાય વોનાયને બોરહો થોવ્યો એને બાપતિસ્મા લેદા.

9 એને પ્રભુય રાતી દર્શન દેયને પાઉલાલ આખ્યાં, “બીયહે મા, બાકી જો આખતો રો એને ઠાવકો મા રોહે.

10 કાહાકા આંય તોઆરે હેય, એને કાદોબી તોવોય હમલો કોઇન તો નુકસાન નાંય કોઅરી, કાહાકા યા શેઅરામાંય બોજ લોક હેતા જ્યા માયેવોય બોરહો કોઅરી.”

11 યાહાટી પાઉલ આહામાય પોરમેહેરા વચન હિકાડતો ડોડ વોરહા હુદી રિયો.

12 જોવે ગાલીયો આખાયા વિસ્તારા ઓદિકારી આતો, તોવે યહૂદી લોક એકી કોઇન પાઉલા વિરુદ્ધ ઓઅઇ ગીયા, એને આલ ન્યાય દેઅના જાગા હામ્મે લેય યેયન આખા લાગ્યા.

13 “ઓ લોકહાન હુમજાડેહે, કા પોરમેહેરા ભક્તિ ઓહડયે રીતે કોઅયા, જું મૂસા નિયમાહા ઉલટાં હેય.”

14 જોવે પાઉલ આજુ બોલના તિયારીમાય આતો, તોવે ગાલીયેય યહૂદીયાહાલ આખ્યાં, “ઓ યહૂદીયાહાય, જો ઈ તે કાય અન્યાય કા ખારાબ વાત ઓઅતી તોવે યોગ્ય આતા કા આંય તુમહે વોનાતો.

15 બાકી જો ઈ બોલાબોલી શબ્દા, એને નાંવહા, એને તુમહે ઇહિને મૂસા નિયમાહા બારામાય હેય, તે તુમાંજ જાંઆ, કાહાકા આંય યે વાતહે ન્યાયી બોના નાંય માગુ.”

16 એને ગાલીયેય આહાન ન્યાય કોઅના જાગા ઇહિને બારે કાડી દેવાડયા.

17 તોવે બોદા લોકહાય સોબાયેહે ઠિકાણા આગેવાન સોસ્થેનેસાલ દોઇન ન્યાયા જાગા હામ્મે ઠોક્યાં, બાકી ગાલીયાય યે વાતે કાયજ ચિંતા નાંય કોઅયી.

અન્તાકિયામાય પાછા યેઅના

18 પાઉલ બોજ દિહાહા હુદી કરિંથ શેહેરામાય રિયો. પાછે વિસ્વાસ્યાહાથી છુટો પોડીન કિખિયા શેહેરામાય જાતો રિયો, ચ્યા શેહેરામાય પાઉલે ચ્યા ટોલપી ટાલી કોઆડી લેદી. કાહાકા ચ્યાય ચોક માનતા લેદલા આતા, પાછે દોરિયામાઅને સિરીયા વિસ્તારા એછે જાતો રિયો, ચ્યાઆરે પ્રિસ્કીલા એને અકુલાસબી આર્તે.

19 જોવે ચ્યે એફેસુસ શેહેરામાય ગીયે તાં પાઉલાય પ્રિસ્કીલા એને અકુલાસાલ છોડયે, જોવે પાઉલ તાં આતો તોવે તો સોબાયે ઠિકાણામાય જાયને યહૂદીયાહા આરે વાત કોઅરા લાગ્યો.

20 જોવે ચ્યાય મોનાય કોઅય દેના તોવે લોકહાય ચ્યાલ વિનાંતી કોઅઈ, “આમહ આરે આજુ કોલહાક દિહી રો.” તોવે તો નાંચ માન્યો.

21 બાકી ઈ આખીન ચ્યાહા પાઅને નિંગી ગીયો, “જો પોરમેહેરા મોરજી ઓરીતે આંચ તુમહાપાય પાછો યીહી,” તોવે તો એફેસુસ શેહેરા જાહાજા માય બોહીન જાતો રિયો.

22 એને કેસરીયા શેહેરામાય ઉતીન (યેરૂસાલેમ શેહેરામાય) ગીયો એને ચ્યે મંડળીલ મિળીન અન્તાકિયા શેહેરામાય યેનો.

પાઉલા તીજેદા સંદેશા મુસાફરી શુરવાત

23 પાછા કોલહાક દિહી અન્તાકિયા શેહેરામાય રોયન તાઅને જાતો રિયો, એને આજુ ચોક્યેકાનીને ગલાતીયા ભાગામાય એને કુગીયા વિસ્તારા બોદા શિષ્યાહાન મજબુત કોઅતો ફિર્યો.

અપુલ્લોસ નાંવા બોજ જાઅનારાં માઅહું

24 ચ્યે સમયે અપુલ્લોસ નાંવા ચોક યહૂદી જ્યા જન્મો સિકન્દરિયા શેહેરામાય ઓઅયેલ, જો બોજ જાંઆનારો માઅહું આતો, એને પવિત્રશાસ્ત્રાલ હારે રીતે જાંઅતો આતો, તો એફેસુસ શેહેરામાય યેનો.

25 ચ્યાય પ્રભુવા વાટે બારામાય શિક્ષણ મેળાવલા આતા, એને મોન લાવીન ઈસુવા બારામાય ઠીક-ઠીક વોનાડતો એને હિકાડતો આતો, બાકી તો ખાલી ચોહાના બાપતિસ્મા વાત જાંઅતો આતો.

26 તો સોબાયે ઠિકાણામાય બિક વોગાર બોલા લાગ્યો, જોવે પ્રિસ્કીલા એને અકુલાસ ચ્યા વાતો વોનાયને ચ્યાલ ચ્યાહા ગોઅો લેય યેને એને પોરમેહેરા વાટે બારામાય ચ્યાહાય આજુ વદારી ઉંડેથી હમજાડયા.

27 એને જોવે અપુલ્લોસાય નોકકી કોઅયા કા આખાયા વિસ્તારામાય જાય તોવે વિસ્વાસ્યાહાય ચ્યાલ ઈમાત દેયન શિષ્યાહાન લોખ્યાં કા ચ્યા ચ્યાલ હારેરીતે મીળે, એને તો તાં પોઅચીન ચ્યા લોકહા બોજ મોદાત કોઅચી, જ્યાહાય ચ્યા સદા મોયા લીદે બોરહો કોઅલો આતો.

28 અપુલ્લોસાય ચ્યા તાકાત એને ઈમાતથી ચહૂદીહાન જાહીર રુપામાય બોલતા બંદ કોઅઇ દેના, પવિત્રશાસ્ત્રા માઅને સાબિતી દેય-દેયન કા ઈસુ ઓજ ખ્રિસ્ત હેય.

19

એફેસમાય પાઉલ

1 જોવે અપુલ્લોસ કરિંથ શેહેરામાય આતો, તોવે પાઉલ આંદારન્યા વિસ્તારામાઅને મુસાફીરી કોઇન એફેસુસ શેહેરામાય યેનો, એને તાં કોલહાક શિષ્યાહાન મિળ્યો.

2 ચ્યાય આખ્યાં, “કાય તુમહાય બોરહો કોઅયો તોવે પવિત્ર આત્મા મિળ્યાં?” ચ્યાહાય ચ્યાલ આખ્યાં કા, “આમહાય તે પવિત્ર આત્મા બારામાય વાત બી નાંચ વોનાયાહા.”

3 પાઉલે ચ્યાહાન આખ્યાં, “તે પાછે તુમહાય કોઅયેહે રીત્યેકોય બાપતિસ્મા લેદા?” ચ્યાહાય આખ્યાં, “આમહાય તી બાપતિસ્મા લેદા જું યોહાન દેતો આતો.”

4 પાઉલે આખ્યાં, “ચોહાને ચ્યા લોકહાન બાપતિસ્મા દેના જ્યાહાય પાપ કોઅના બંદ કોઅય દેના એને પોરમેહેરાએછે ફિર્યા, બાકી ચ્યાય ઈસરાયેલ લોકહાન આખ્યાં કા ચ્યા ઈસુવોય બોરહો કોઅે જો ચ્યા પાછે યેનારો હેય, જો ખ્રિસ્ત હેય.”

5 ઈ વોનાયને ચ્યાહાય પ્રભુ ઈસુવા નાવામાય બાપતિસ્મા લેદા.

6 એને જોવે પાઉલે ચ્યાહાવોય આથ થોવ્યા, તોવે ચ્યાહાન પવિત્ર આત્મા મિળ્યાં, એને ચ્યા આલાગ-આલાગ ભાષા બોલા એને ભવિષ્યવાણી કોઅરા લાગ્યા.

7 ચ્યા બોદા બારા માટડા આતા.

8 એને તોવે પાઉલ સોબાયે ઠિકાણામાય જાયને તીન મોયના લોગુ બિઅયા વોગાર બોલતો રિયો, એને પોરમેહેરા રાજ્યા બારામાય બોલા-બોલી કોઅતો એને હુમજાડતો રિયો.

9 બાકી કોલહાક લોકહાય કોઠાણ મોના ઓઇન બોરહો કોઅના નાકાર કોઅઇ દેના, બાકી લોકહા હામ્મે પ્રભુવા વાટે બારામાય ખારાબ આખા લાગ્યા, તોવે ચ્યાય ચ્યાહાલ તાંજ છોડીન શિષ્યાહાન આલાગ કોઅઇ લેદા, એને દિનેરોજ તુરેનુસ શાળેમાય હિકાડયાં કોઅતો આતો.

10 બેન વોરહા હુદુ ઈજ ઓઅતા રોયા, ઓલે હુદુ કા આસિયા વિસ્તારામાય રોનારા કાય ચહૂદી, કાય ગેર ચહૂદી બોદહાય પ્રભુ વચન વોનાય લેદા.

એફેસમાય સામથ્યા નોવાયે કામે

11 એને પોરમેહેર પાઉલા દ્વારા સામથ્યા ગોત્યેવાળે કામે દેખાડતો આતો.

12 ઓલે લોગુ કા રુંબાળ એને ફાડકો ચ્યાહા આંગાલ લાવીન બીમાર્યાહાવોય ટાકતા આતા, એને ચ્યે ચ્યાહા બીમાર્યેહેથી હારાં ઓઅઇ જાતે આતે, એને બુતડે નિંગી જાયા કોઅતે આતે.

13 બાકી કોલહાક ચહૂદી જ્યા બુતડે કાડતા ફિરતા આતા, ચ્યા ઈ કોઅરા લાગ્યા કા જ્યાહામાય બુતડે રોતે આતે ચ્યાહાન પ્રભુ ઈસુવા નાવાકોય ઈ આખીન કાડા લાગ્યા, “જ્યા ઈસુવા પ્રચાર પાઉલ કોઅહે, આમા તુમહાન બારે યા આગના દેજહે.”

14 એને સ્કેવા નાંવા ચોક ચહૂદી મુખ્ય યાજકા હાંત પોહા આતા, ચ્યાબી એહેકોયન કોઅતા આતા.

15 ચોક દિહી બુતે ચ્યાહાલ આખ્યાં, “ઈસુવાલ આંય જાંઅતાહાંવ, એને પાઉલાલબી વોળખુહુ, બાકી તુમા કું હેતાં?”

16 એને ચ્યે માઅહે જ્યામાય બુત આતો, ચ્યાહાવોય તૂટી પોડીન, એને ચ્યાહાન કોબજામાય લેયને, ચ્યાહાલ ઓહડો માર દેનો કા ચ્યા નાગા એને ઘાયાલ ઓઇન ચ્યા ગોઆમાઅને દાહુદતા નિંગી નાઠા.

17 એને ઈ વાત એફેસુસ શેહેરામાય રોનારા ચહૂદી એને ગેર ચહૂદી બી બોદા જાંઆઈ ગીયા, એને ચ્યા બોદહાવોય બિક બોઆય ગીયી, એને પ્રભુ ઈસુવા નાંવા મહિમા કોઅયી.

18 એને ચ્યાહાય બોરહો રાખ્યેલ, ચ્યાહામાઅને બોજ લોકહાય યેઇન પોતપોતાના ખારાબ કામાંહાલ ખુલ્લી રીતે માની લેદા.

19 એને મેલી વિદ્યા કોઅનારાહા માઅને બોજ જાઅહાય પોતપોતાના ચોપડે ચોકઠે કોઇન બોદહા હામ્મે બાળી ટાક્યે, એને જોવે ચ્યાહા ઇસાબ કોઅયો તે પચહા ઓજાર ચાંદે સિસ્કાહા (૧ ચાંદે સિસ્કો એટલે ચોક દિહા કાંબારાં) બોરાબર નિંગ્યા.

20 ચેજપરમાણે પ્રભુ વચના સામથ્યા થી ફેલાતા ગીયા એને મજબુત ઓઅતા ગીયા.

21 જોવે યો વાતો ઓઅઇ ચુક્યો તોવે પાઉલે મોકોદુનિયા એને આખાયા વિસ્તારા વિસ્વાસ્યાહાલ મિળ્યાં પાછે ચેરસાલેમ શેહેરામાય જાયના નોક્કી કોઅયા, એને આખ્યાં, “તાં જાઅના પાછે માન રોમ શેહેર બી એઅના જરુરી હેય.”

22 ચાહાટી આપહે સેવા કોઅનારા માઅને તિમોથી એને એરાસ્તુસાલ મોકોદુનિયા વિસ્તારામાય ચ્યાહાલ આપહે આગલા દોવાડી દેના એને પોતે તાં કોલહાક દિહી આસિયા વિસ્તારા એફેસ શેહેરામાય રોઅઇ ગીયો.

એફેસમાય મુશીબાત

23 ચ્યે સમાયે તાં પ્રભુવા વાટે બારામાય બોજ મોઠી ચળવળ જાયી.

24 તાં દેમેત્રિયસ નાંવા ચોક હોનાર્યા અરતીમાસ નાંવા યુનાની દેવી મંદિરા ચાંદે નમુના બોનાડીન એને ચ્યાહાન વેચિન કારીગીરાહાલ બોજ ફાયદો કોઆડતો આતો.

25 દેમેત્રિયસ ચ્યા કારીગીરાહાલ એને ઓહડા કામ કોઅનારા બિજા કારીગીરાહાલબી ચોકઠા કોઇન ચ્યાહાન આખ્યાં, “ઓ માઅહાય, તુમા જાંઅતાહા કા ચા કામાકોય આમહાન કોલહા પોચહા મિળતાહા.

26 એને તુમા એઅતાહા એને વોનાતાહા કા ચોખલા એફેસુસ શેહેરામાયજ નાંચ, બાકી આસિયા વિસ્તારા બોદા ગાવાહામાય ઈ આખી-આખીન ચા પાઉલે બોજ લોકહાન હોમજાડલાં એને ભરમાવલાં બી હેય, કા જી આથા કારાગીરી હેય, ચ્યા દેવ નાંચ.

27 એને આમી ખાલી ચે વાતે બિક નાંચ કા આમે ચા દોંદા બંદ પોડી, ઈ કા મોઠી દેવી અરતીમાસ મંદિર નોકામ્યો ગોણવામાય ચી, એને જ્યે દેવી ભક્તિ બોદા આસિયા વિસ્તારામાય એને આખા દુનિયા ભક્તિ કોઅહે ચ્યા મહત્વ બી જાતો રોય.”

28 બોદા કારાગીર ઈ વોનાઈન ગુસ્સાથી બોરાય ગીયા, એને બોંબલી-બોંબલી આખા લાગ્યા, “એફેસીયાહા અરતીમાસ દેવી, મહાન હેય.”

29 એને બોદાજ શેઅરામાંય મોઠો ઘાંદલ મચી ગીયો, એને લોકહાય ગયુસ એને અરિસ્તર્ખુસ, મોકોદુનિયા નિવાસી એને જ્યા પાઉલુસા આર્યા મુસાફરી આતા, દોઅઇ લેય યેના, એને ચોકહાતે ઓઇન રંગશાળેમાય દાંહાદી ગીયા.

30 જોવે પાઉલ બી રંગશાળેમાય આંદાર જાયને લોકહા હાતે વાત કોઅરા માગતો આતો, બાકી શિષ્યહાય ચ્યાલ જાં નાંય દેનો.

31 આસિયા ઓદિકાર્યાહા માઅને બી ચ્યા કોલહાક દોસ્તારાહાય ચ્યાપાય આખો દોવાડયા એને વિનાંતી કોઅયી, કા ચ્યાલ રંગશાળેમાય આંદાર જાયને પોતાનો જીવ મુશીબાતે માય નાંય ટાકાં જોજે.

32 રંગશાળેમાય આંદાર, બોદા લોક બોંબલી રીયલા આતા, કાદો ચોક વસ્તુ એને કાદા કાય એને બોદાજ કાય ગરબડ આતા, એને બો બોદા લોક તે ઈ જાંઅતાબી નાંય આતા કા ચ્યે કાહા ચોકઠે ઓઅયેહે.

33 તોવે ગીરથેમાઅને કોલહાક યહૂદી લોકહાય સિકાંદરાલ ગીરથે હામ્મે ડેકલી દેના, ગીરથેમાઅને આગલા વોદાડયો, એને સિકંદરાય લોકહાન ઠાવકા રાંહાટી આથા ઈશારો કોઅયો એને હોમજાડના કોશિશ કોઅયી કા કાય ઓઅઇ રીયલા આતા.

34 બાકી જોવે ચ્યાહાન ખોબાર પોડી કા તો યહૂદી હેય, (યહૂદી લોક ખ્રિસ્તા લોકહા હારકા મુર્તિપુજા નાંય કોઅેત), તે બોદા ને બોદા ચોકે આવાજથી કાદો બેન કોલાક લોગુ બોંબાલતા રિયા, “એફેસીયાહા અરતીમાસ દેવી, મહાન હેય.”

35 તોવે શેહેરા, મોંતર્યાય લોકહાન ઠાવકા રાખીન આખ્યાં, “ઓ એફેસમાય રોનારા લોકહાય, બોદા જાંઅતાહા કા એફેસ શેહેરા લોક મહાન દેવી અરતીમાસ મંદિરા દેખભાલ કોઅઇ રીયાહા, એને તી મુર્તિ આકાશ માઅને પોડલી આતી.

36 આમી જોવેકા યે વાતહે નાકારબી નાંય ઓઈ હોકે, તે ઠીક હેય, કા તુમા ઠાવકા રા, એને વોગાર હોમજી-વિચારી કાયજ મા કોઅતા.

37 કાહાકા તુમા યા માઅહાલ લેય યેનાહા, જ્યા નાંય મંદિરાલ લૂટનારા હેય, એને નાંય આમહે દેવી નિંદા કોઅનારા હેય.

38 યાહાટી દેમેત્રિયસ એને ચ્યા હાંગાત્યા કારીગીરાહાલ કાદાહાતે જગડો ઓરીતે, ચ્યા કોચર્યમાય જાય હોકતાહા, એને ચ્યાહા ન્યાય કોઅરાહાટી ન્યાય કોઅનારા ઓદિકારીબી હેતા, તાં ચ્યા લોક ચોકબીજાવોય ગુનો લાવી હોકતાહા.

39 બાકી તુમા કાય બીજી વાતે બારામાય પુછા કોઅતાહા, તે નોકકી પંચ લોકહા સોબાયેમાય નિર્ણય કોઅવામાય ચી.

40 કાહાકા માન બિક હેય કા રોમ સરકારથી દંગો સુરુ કોઅના દોષ લાવલો જાઅના મુશીબાતે માય હેય, યાહાટી કા ચા કાય કારણ નાંચ, આમી આમા યે ગીરદે ચોકઠા ઓઅના કાયજ જાવાબ નાંચ દેય હોકડુ.”

41 એને ઈ આખીન ચ્યાય સોબાયેલ દોવાડી દેના.

20

મોકોદુનિયા, યુનાન એને ત્રોઆસમાય પાઉલ

1 જોવે દામાલ બૉદ ઓઈગીયો તે પાઉલે શિષ્યાહાન હાદિન ચ્યાહાન ઈમાત દેની એને ચ્યાહા ઇહિને રજા લેયને મોકોદુનિયા વિસ્તારા એછે ચાલ પોડયો.

2 ચ્યા બોદા વિસ્તારામાઅને ઓઈન એને શિષ્યાહાન બોજ ઈમાત દેયન તો યુનાન વિસ્તારમાય ચેનો.

3 જોવે ત્રીન મોયના રોયન તો તાઅને જાહાજેમાય બોહીન સિરીયા વિસ્તારા એછે જાં આતો, તોવે ચ્યાય ઈ વોનાયને કા કોલહાક ચહૂદી આગેવાન ચ્યાલ જાહાજેમાય માઆઇ ટાકાં યોજના કોય રીયહા એને યાહાટી ચ્યાય મોકોદુનિયા વિસ્તારામાઅને ઓઈન સિરીયા વિસ્તારામાય જાઅના નોકકી કોઅયા.

4 યે મુસાફિર્યમાય બીરીયામાય રોનારો પિરહુસા પોહો સોપાત્રુસ એને થેરસાલોનિક શેહેરામાઅને અરિસ્તર્ખુસ એને સીકુંદસ એને દિરબે શેહેરા ગાયુસ, એને લુસા શેહેરા તિમોથી એને આસિયા વિસ્તાર તુખિકુસ એને ત્રોફિમુસ, ચ્યા બોદા આમહે આરે મુસાફીર આતા, જ્યા આસિયા વિસ્તારહુદુ આમહેહાતે ચેના.

5 એને ચા હાંગાત્યા આમહે થી આગલા જાતા રિયા એને ત્રોઆસ શેહેરામાય પોઅચીન આમહે વાટ જોવતા રિયા.

6 બાકી આમા બેની ખમીરા બાખ્યે સણ પાછે ફિલિખી શેહેરાથી જાહાજેમાય બોહીન પાય દિહાહામાય ત્રોઆસમાય ચ્યાહાપાય પોઅચ્યા, એને હાંત દિહીહુદુ તાં રિયા.

યુતુખુસાલ જીવતા કોઅના

7 આઠવાડ્યા પેલ્લે દિહી જોવે આમા પ્રભુ ભોજહાટી બેગા જાયલા, તોવે પાઉલ ચ્યાહાઆરે વાતો કોઅરા લાગ્યો જો બીજે દિહી જાતો રોનારો આતો, ચ્યાહા હાતે વાતો કોઅયો, એને આરદી રાતહુદુ સંદેશ દેતો રિયો.

8 જ્યે માળાંડયેવોય આમા બેગા જાઅલા આતા, ચ્યામાય બોજ દિવા હોલગી રીઅલા આતા.

9 એને યુતુખુસ નાંવા યોક જુવાન બાર્યેવોય બોઠલો આતો, એને જોવે પાઉલ મોડેહુદુ સંદેશ દેતો રિયો તે તો નિંદેલીદે ડોલવાથી તીજા માળા ઉપને ટુટી પોડયો, એને મોઅઇ ગીયો.

10 બાકી પાઉલ નિયે ગીયો એને ચ્યાપાય જાયને ચ્યાલ આથામાય લેયને, એને ગોળે લાગીન આખ્યાં, “ગાબરાયાહા મા, કાહાકા તો આજુબી જીવતો હેય.”

11 એને પાઉલ પાછો ઉચે ગીયો એને ચ્યાહાય પાછો પ્રભુભોજ લેદો, એને પ્રભુભોજ લેદા પાછે ચ્યા દિહી નિંગ્યા લોગુ વાતો કોઅતા રિયા, ચ્યા પાછે પાઉલ તાઅને જાતો રિયો.

12 એને ચ્યા, ચ્યા જુવાનાલ જીવતો લેય ગીયા, એને બોજ આનંદિત ઓઅયા.

ત્રોઆસ થી મિલેતુસ એછે મુસાફરી

13 પાઉલે અસ્સુસ શેહેરાહાટી દોરતી વોયને મુસાફરી કોઅના નોક્કી કોઅયા, બાકી આમા બાકી લોક જાહાજેમાય બોહીન આગલા જાતા રિયા, એને આમા તાઅને ચ્યાલ આમહે આરે જાહાજેમાય લેયના નોક્કી કોઅય રીઅલા આતા.

14 જોવે તો અસ્સુસ શેહેરમાય આમહાન મિળ્યો તે આમા ચ્યાલ આમહે આરે જાહાજેમાય બોહાડીન મિતુલેને શેહેરામાય ચેના.

15 તાઅને આમહાય લંગાર છોડ્યા અને બીજે દિહી ખિયસ બેટા હામ્મે પોઅચ્યા. આમા આગલે દિહી દોરિયો પાર કોઇન તાઅને સામુસ બેટા અને ચ્યા બીજે દિહી મિલેતુસ બેટાવોય ચેના.

16 પાઉલુસાય એફેસુસ શેહેરામાય નાંય ઉતના નક્કી કોઅયા કાહાકા તાં આસિયા વિસ્તારમાય અને બોજ સમય નાંય રાંહાટી માગે, જોવે ઓઅય હોકે, તે તાં પાસ્કા સણા દિહી યેરૂસાલેમ શેહેરામાય રોય.

એફેસી વડીલાહાન સંદેશ

17 એને જોવે આમા મિલેતુસ શેહેરામાય ઉત્યા, તોવે પાઉલે એફેસુસ શેહેરા મંડળ્યે વડીલાહાન નિરોપ દોવાડીન ચ્યાપાય હાધા.

18 જોવે ચ્યા ચ્યાપાય ચેના, તોવે ચ્યે ચ્યાહાન આખ્યાં.

“તુમા જાંઅતાહા, કા પેલ્લે દિહેથી જોવે આંય આસિયા વિસ્તારમાય પોઅચ્યો આજે હુદુ, આંય તુમહેઆરે કેહેકેન રિયો.

19 એટલે બોજ નમ્રતા થી, એને આહવેં પાડી-પાડી ને, એને ચ્યે પરીક્ષાયેહેમાય જું યહૂદીયાહા ખારાબ યોજના જું માયેવોય ચેય પોડ્યા, આંય પ્રભુવા સેવા કોઅતોજ રિયો.

20 એને જ્યો-જ્યો વાતો તુમહે ફાયદા આત્યો, ચ્યેહેન આખા એને લોકહા હામ્મે એને ગોઅહે-ગોઅહે હિકાડાંહાટી કોવેજ નાંય બિઅયો.

21 બાકી યહૂદી એને ગેર યહૂદીયાહામાય ચેતાવણી દેતો રિયો, કા પાપ કોઅના બોદ કોઇન પોરમેહેરાએછે ફિરે એને આમહે પ્રભુ ઈસુવોય બોરહો કોએ.

22 એને આમી આંય, પવિત્ર આત્મા આગનામાય યેરૂસાલેમ શેહેરમાય જાતહાવ, એને નાંય જાંઉ, કા તાં મા આરે કાય-કાય ઓઅરી.

23 કેવળ ઈજ કા પવિત્ર આત્મા બોદા શેહેરમાય સાક્ષી દેય-દેયને માન આખહે કા બંધન એને સંકટ માંહાટી તિયાર હેય.

24 બાકી આંય પોતાના જીવાલ કાયજ નાંય હોમજુ કા ચ્યાલ પ્રિય જાઅઉ, બાકી ઈ કા આંય પોતાના દાંહુદના એને તી સેવા પુરી કોઉ, જી માન પોરમેહેરા સદા મોયા હારી ખોબારેવોય સાક્ષી દાંહાટી પ્રભુ ઈસુથી મીળહી.

25 એને આમી આંય જાંઅતાહાંવ કા તુમા બોદા જ્યાહામાય પોરમેહેરા રાજ્યા હારી ખોબાર આખતો ફિયો, તુમા માન પાછો નાંય એઅહા.

26 યાહાટી તુમહાન આંય આજ્યા દિહી સાક્ષી દેયને આખતાહાવ, કા જોવે તુમહામાઅને કાદોબી ઈસુવોય બોરહો થોવ્યા વોગાર મોઅઇ જાહે તે ઈ મા જાવાબદારી નાંય હેય.

27 કાહાકા માયે તુમહાન તી બોદાંજ આખ્યાહા જું પોરમેહેરા ઇચ્છા હેય કા તુમા જાંઅ, માયે કાયજ નાંય દોબાડયાહા.

28 યાહાટી આપહે એને પુરાં ટોળા દેખ-ભાલ કોઆ, જ્યામાય પવિત્ર આત્માય તુમાહાલ અધ્યક્ષ ઠરાવલો હેય કા તુમા પોરમેહેરા મંડળીલ રાખવાળી કોઆ, જ્યેલ ચ્યાય ચ્યા લોયાકોય વેચાતી લેદલી હેય.

29 આંય જાંઅતાહાંવ કા મા જાયના પાછે તુમહે વોચમાય જુઠા હિકાડનારા ચેઅરી એને વિસ્વાસ્યાહાન બોજ નુકસાન પોઅચાડી, ચ્યે ચ્યા ફાડી ખાનારા આસાલાહા રોકા ઓઅરી, જ્યે ગેટાહાન માઆઇ ટાકતેહેં.

30 ઈહો હુદુ કા તુમહેજ વોચમાઅને પોતાના વિસ્વાસ્યાહા ટોળામાઅને, ઓહડા લોક ચેઅરી જ્યા શિષ્યહાન પોતાના પાહાલ લિયાહાટી જુઠા શિક્ષણ દાં લાગી.

31 યાહાટી તુમા જાગતા રા, એને યાદ રાખા કા માયે ત્રીન વોરહે હુદુ રાત દિહી આહવેં પાડી-પાડીન, યોકા-યોકાલ ચેતાવણી દેતો રિયો.

32 આમી આંય તુમહાન પોરમેહેરા એને ચ્યા સદા મોયા વચનાલ હોઅપી દેતહાવ, જું તુમહાન બોરાહામાંય મજબુત કોય હોકહે, એને પોરમેહેર તુમહાન તાબો દેઅરી જ્યાહાન દેયના વાયદો ચ્યાય ચ્યા બોદા લોકહાન કોઅલો હેય, જો ચ્યા કોયન પવિત્ર કોઅલે ગીઅલે હેય.

33 માયે કાદા હોના ચાંદી, કા ડોગલાં લાલચ નાંય કોઅયા.

34 તુમા પોતે જાંઅતાહા કા યા આથહાય મા એને મા હાંગાત્યાહા બોધો જરુરતો પુરાં કોઅયા.

35 માયે તુમહાન બોદાંજ કોઅય દેખાડ્યાં, કા ચે રીતે મેહનાત કોઅના નોબળાહાન સાંબાળના, એને પ્રભુ ઈસુ વચનાહાલ યાદ રાખના જરુરી હેય, કા ચ્યેય પોતેજ આખલા હેય, ‘લેયના કોઅતા દેયના ઘન્ય હેય.’”

36 ઈ આખીન તો માંડયે પોડયો એને બોદહાઆરે પ્રાર્થના કોઅયી.

37 તોવે ચ્યા બોદા બોજ રોડતા લાગ્યા એને પાઉલાલ ગોળે લાવીન ચ્યાલ ગુળા દાં લાગ્યા.

38 ચ્યે ચ્યાલ પાછે કોઇ દિહી નાંચ દેખી, યાકોય લોક બોજ વોદારી દુઃખી આતા, પાછે ચ્યાહાય ચ્યાલ હારિરીતે જાહાજ લોગુ પોઅચાડી દેનો.

21

પાઉલા યેરૂસાલેમ મુસાફરી

1 જોવે આમા ચ્યાહાથી રજા લેઈને દોરિયા વાટે મુસાફરી કોઅરા લાગ્યા, તોદિહી વાટેથી કોસ બેટમાય યેના, એને બીજે દિહી રુદુસ બેટમાય, એને તાઅને આમા પતરા બેટમાય પોઅચી ગીયા.

2 એને ચોક જાહાજ ફીનીકે વિસ્તારમાય જાતા મિળ્યાં, એને આમાહાય ચ્યે જાહાજમાય બોહીન મુસાફરી ચાલુ કોઅઇ.

3 આમહાન ડાબે એછે સાઇપ્રસ બેટ દેખાયાં, આમા ચ્યાલ છોડીન સિરીયા વિસ્તારા એછે આગલા જાતા ગીયા એને સુર શેહેરામાય જાય પોઅચ્યા, કાહાકા તાં જાહાજમાઅને સામાન ઉતાડના આતા.

4 એને શિષ્યહાન હોદી કાડીન આમા તાં હાંત દિહીહુદુ રિયા, ચ્યા પવિત્ર આત્મા અગુવાઈકોય પાઉલાલ યેરૂસાલેમ શેહેરમાય નાંચ જાઅના વિનાંતી કોઅતા રિયા.

5 હાંત દિહી પાછે જોવે તાઅને આમહે જાયના સમય યેનો, તે આમા તાઅને નિંગીન ચાલ પોડ્યા એને ચ્યા બોદા લોકહાય થેઅયો એને પોહહા હાતે આમહાન શેહેરા બાઆ હુદુ પોઅચાડ્યા, એને આમહાય દોરિયા મેરાવોય માંડયે પોડીન પ્રાર્થના કોઅચી.

6 તોવે ચોક-બિજા આરે રજા લેયને, આમા તે જાહાજમાય ચોડ્યા, એને ચ્યે પોત-પોતા ગોઓ ફિરી ગીયે.

7 સોર શેહેરામાઅને સુર કોઅલી મુસાફરી પુરી કોઇન આમા પતુલિમયિસ શેહેરામાય પોઅચ્યા એને વિસ્વાસ્યાહાન મિળીન ચ્યાહા આરે ચોક દિહી રિયા.

8 એને બીજે દિહી આમા તાઅને ચાલીન કૈસરીયા શેહેરામાય યેના, એને પાછે આમા ફિલિપ સુવાર્તિક આ હાંત માઅહા માઅને યોક આતો આ ગોઆમાય જાયને તાં રિયા.

9 આ ચાર કુવાર્યો પોહયો આત્યો, આ ભવિષ્યવાણી કોઅત્યો આત્યો.

10 જોવે આમા તાં બોજ દિહી રોય ચુક્યા, તાં અગાબુસ નાંવા યોક ભવિષ્યવક્તા યહૂદીયા વિસ્તારામાઅને યેનો.

11 આય આમહેપાય યેયન પાઉલા કોંબરા આરે બાંદના પોટો લેદો, એને આ પોતા આથ પાગ બાંદિન આખ્યાં, “પવિત્ર આત્મા એહેકોય આખહે, કા જ્યા માઅહા ઓ કોંબરાલ બાંદના પોટો હેય, આલ યેરસાલેમ શેહેરમાય યહૂદી લોક એહેકોઇન બાંદી, એને ગેર યહૂદીયાહા આથામાય હોઅપી દી.”

12 જોવે આમા યો વાતો વોનાયા, તોવે આમા એને તાઅને લોકહાય પાઉલાલ વિનાંતી કોઅયી, કા યેરસાલેમ શેહેરમાય મા જાતો.

13 બાકી પાઉલે આહાલ જાવાબ દેના, “તુમા કાય કોઅતાહા, જ્યા રોડી-રોડીન મા દિલાલ તોડતાહા? આંય તે પ્રભુ ઈસુ નાવાહાટી યેરસાલેમ શેહેરમાય ખાલી બાંદલો જાંઅનાહાટીજ નાંય બાકી મોઅરાહાટીબી તિયારી હેતાઉ.”

14 જોવે આય નાંય માન્યા તોવે આમા ઈ આખીન ઠાવકાજ ઓઅઇ ગીયા, “પ્રભુવા ઇચ્છા પુરી ઓઅ.”

15 કોલહાક દિહહા પાછે આમહાય તિયારી કોઅયી એને યેરસાલેમ શેહેરમાય ચાલ પોડ્યા.

16 કૈસરીયા શેહેરામાઅનેબી કોલહાક શિષ્ય આમહેહાતે યેના, એને આમહાન રાંહાટી મનાસન નાંવા સાઇપ્રસમાય રોનારા ગોઓ લેય જાવામાય યેના, તો બોદહા પેલ્લા શિષ્યહા માઅને યોક આતો.

યેરસાલેમ શેહેરામાય પાઉલા યેઅના

17 જોવે આમા યેરસાલેમ શેહેરામાય પોઅચ્યા, તોવે વિસ્વાસ્યાહાય બોજ આનંદાકોય આમહે સ્વાગત કોઅયા.

18 બીજે દિહે પાઉલ આમહાન લેયને યાકૂબાપાય ગીયો, જાં બોદા વડીલ બેગા આતા.

19 તોવે પાઉલે આહાન સલામ કોઇન, જ્યે-જ્યે કામે પોરમેહેરાય આ સેવાયેથી ગેર યહૂદીયાહામાય કોઅલે આતે, યોક-ચોક કોઇન બોદા આખ્યાં.

20 આહાય ઈ વોનાઈન પોરમેહેરા મહિમા કોઅઇ, પાછે આલ આખ્યાં, “ઓ બાહા તું જાંઅતોહો, કા યહૂદીયાહા માઅને ઓજારો લોકહાય બોરહો કોઅયોહો, એને આ બોદા મૂસા નિયમાહાલ પાળના બોજ બોરહો કોઅતાહા.

21 એને આ યહૂદી વિસ્વાસ્યા તો બારામાય વોનાયાહા, કા તું ગેર યહૂદીયાહામાય રોનારા યહૂદી લોકહાન ઈ હિકાડેહે કા મૂસા નિયમાહાલ છોડી દા, એને ઇબી આખતાહા, કા નાયતે આપહે પાહાહા સુન્નત કોઆડાં એને નાયતે યહૂદીયાહા રીતિરીવાજેહેવોય ચાલા.

22 તે આમી આખા, આમા કાય કોઅજે? લોક નોક્કીજ વોનાયી કા તું ઈહીં યેનહો.

23 યાહાટી જું આમા તુલ આખજેહે, તી કોઓ. આમહે ઈહીં ચાર માઅહે હેય, આહાય તી માનતા પુરાં કોઅના હેય જું આહાય પોરમેહેરા હામ્મે માન્યાહા.”

24 આહાન લેઈને આહા હાતે પોતેજ પોતાલ શુદ્ધ કોઅના વિદી પુરી કોઓ, એને આહાહાટી ખોરયી દે, કા આ ટોલપા ટાલ્યાં કોઆડે તોવે બોદે જાઈ લેઅરી, કા જ્યો વાતો આ તો બારામાય વોનાયાહા, આમાય કાય હાઅ્યાં નાંચ હેય બાકી તું પોતેબી મૂસા નિયમાહાલ માનીન આહા પરમાણે ચાલતોહો.

25 બાકી આ ગેર યહૂદીયાહા બારામાય જ્યાહાય બોરહો કોઅયોહો, આમહાય ઓ નિર્ણય કોઇન લોખીન દોવાડયાહા કા અ્યે મુરત્યેહે હામ્મે બેટ ચોડાવલા માહાં થી, એને લોયાથી એને ગોગી દાબીન માઅલા માહાં થી, એને વ્યબિચારથી દુર રોજા.

26 બીજે દિહી પાઉલે આ માઅહા હાતે જાયને પોતાલ શુદ્ધ કોઅયો એને પાછે આ હાતે દેવાળામાય ગીયા ફા તો તાં ઈ જાહીર કોઅે કા આહા શુદ્ધીના દિહી કોવે પુરાં ઓઅરી, એને આહામાઅને બોદહાહાટી બેટો ચોડાવલ્યો જાઅરી.

દેવાળામાય પાઉલાલ દોઅઇ લેઅના

27 જોવે ચ્યા હાંત દિહી પુરાં ઓઅરા આતા, તે આસિયા વિસ્તારા ચહૂદીયાહાય પાઉલાલ દેવાળામાય એઇન બોદા લોકહાન ભરમાવ્યા, એને પાઉલાલ દોઅઇ લેદો એને ઈ આખીન બોંબલા લાગ્યા,

28 “ઓ ઈસરાયેલ્યાહાય, મોદાત કોઅયા, ઈ તીંજ માઅહું હેય, જું માઅહા, એને મૂસા નિયમાહા, એને યા જાગા વિરુદ્ધમાય બોદે જાગે બોદા લોકહાન હિકાડેહે, ઈહિહુદુ કા ગેર ચહૂદીયાહાલ બી દેવાળામાય લેય ચેયન ચ્યાય યા પવિત્રસ્તાનાલ અપવિત્ર કોઅયાહાં.”

29 ચ્યાહાય એહેકેન આખ્યાં કાહાકા ચ્યાહાય તે યા પેલ્લા એફેસમાય રોનારા ગેર ચહૂદી ત્રોફિમુસાલ પાઉલાહાતે શેહેરામાય દેખેલ, એને હોમાજતા આતા કા પાઉલ ચ્યાલ દેવાળામાય લેય ચેનહો.

30 તોવે બોદા શેહેરામાય ગરબડ ફેલાય ગીયી, એને લોક દાંહદીન ચોકઠા ઓઅયા, એને પાઉલાલ દોઇન દેવાળા બાઆ ગોહલી લેય ચેના, એને તારાત બાઅણા બંદ કોઅય દેવામાય ચેના.

31 જોવે ચ્યા ચ્યાલ માઆઇ ટાકાં કોઅેત, તોવે સૈન્યા ટોળા સુબેદારાલ ખોબાર પોઅચી કા ચેરૂસાલેમ શેહેરામાય બોજ બોદા લોકહામાય ગરબડ ઓઅઇ રોયહો.

32 તોવે તો તારાત સીપાડાહાલ એને જોમાદારાહાન લેઇને ચ્યાહાપાય દાંહાદી ચેનો, એને લોકહા ગીરદે તોવે સૈન્યા ટોળા જોમાદારાલ એને સિપાડાહાન દેખીન ચ્યા પાઉલાલ ઠોકના રા દેના.

33 તોવે સૈન્યા ટોળા જોમાદારાય પાઉલાપાય ચેયન ચ્યાલ દોઅઇ લેદો, એને બેન હાકાળેહે કોઇન બાંદા આગના દેયને પુછા લાગ્યો, “ઈ કું હેય, એને ચ્યે કાય કોઅયાહાં?”

34 બાકી ગીરદેમાઅને કાદો કાય એને કાદો કાય બોંબાલતા રોયા એને જોવે દુમાલે લેદે તો હાચ્યાં નાંચ જાંઆઈ હોક્યો, તોવે ચ્યાલ કિલ્લામાય લેય જાઅના આગના દેની.

35 જોવે તો નીહાણ્યેવોચ પોઅચ્યો, તોવે એહેકેન જાયા કા ગીરદી વોદારે ઓઅના લીદે સિપાડાહાન ચ્યાલ ઉસલી લેય જાં પોડ્યા.

36 કાહાકા લોકહા ગીરદી ઈ બોંબાલતે ચ્યા પાહલા પોડયે, “ચ્યાલ માઆઇ ટાકાં.”

37 જોવે ચ્યે પાઉલાલ કિલ્લામાય લેય જાનારે આર્તે, તે ચ્યાય સૈન્યા ટોળા જોમાદારાલ આખ્યાં, “કાય આંચ તુલ કાય આખી હોકુ?” ચ્યે આખ્યાં, “કાય તું યુનાની ભાષા જાંઅતોહો?”

38 કાય તું આજ મિસર દેશા નાંય, જો યા દિહહા પેલ્લા સરકારા વિરુદ્ધ બળવો ફોઇન ચાર ઓજાર આથ્યાર બંદ લોકહાન ઉજાડ જાગામાય લેય ગીયો?”

39 પાઉલે આખ્યાં, “નાંય, આંય તે કિલિકિયા વિસ્તારા ચોક મહત્વપૂર્ણ તારસુસ શેહેરા નાગરીક ચોક યહૂદી માઅહું હેતાઉ, આંય તુલ વિનાંતી કોઅતાહાંવ, કા માન લોકહાન વાતો આખા દે.”

40 જોવે આય આગના દેની, તોવે પાઉલે નીહાણ્યેવોય ઉબો રોઇન લોકહાન ઠાવકા રાંહાટી આથા ઈશારો કોઅયો, જોવે આ ઠાવકા રોય ગીયા, તોવે તો હિબ્રુ ભાષામાય બોલા લાગ્યો.

22

ગીરદેમાય પાઉલા સંદેશ

1 “ઓ બાહાહાય એને આગેવાનહાય, મા જોવાબ વોનાયા, જું આંય આમી તુમહે હામ્મે આખતાહાવ.”

2 આ ઈ વોનાયને કા તો આહાન હિબ્રુ ભાષામાય બોલહે, આ ઠાવકા રિયા, તોવે પાઉલે આખ્યાં.

3 આંય તે યહૂદી હેતાંવ, મા જન્મો કિલિકિયા વિસ્તારા તારસુસ શેહેરામાય જાયો, બાકી યા શેહેરામાય ગમાલીયેલા પાગહાપાય બોહીન શિક્ષણ મેળવ્યા, એને આગલ્યા ડાયાહા નિયમબી હારેરીતે હિકાડલા ગીયા, એને આંયબી પોરમેહેરાહાટી ઓહડો ઉત્સાહી આતો, જેહેકેન તુમા બોદા આજે હેતા.

4 માયે પ્રભુવા વાટે ચાલનારાહાલ માટડા એને થેએયેહેલ બેનહાલ બાંદિન, એને જેલેમાય ટાકીન, ઓલા સોતાવ્યા, કા આહાન માઆઇ બી ટાકાડયા.

5 ખુદ મહાયાજક એને આગેવાનહાય બોદી સબા સાક્ષી હેય, કા આહામાઅને આંય દમસ્ક શેહેરા યહૂદીયાહાહાટી પત્ર લેયને દમસ્ક શેહેરા એછે જાય રીયલો આતો, કા જ્યા તાં પ્રભુવા માર્ગમાય ચાલનારા રોય આહાલ ડોંડ દાંહાટી બાંદિન ચેરસાલેમ શેહેરામાય લેય યાઉ.

રુદ્યા બદલાયના બારામાય

6 જોવે આંચ મુસાફરી કોઈન દમસ્ક શેહેરા પાહાય પોઅચ્યો, તોવે એહેકેન જાયા કા બોપરેહે લુગભગ ચોકાયોક મોઠો ઉજવાડો આકાશામાઅને મા ચારી-ચોમખી ચોમક્યા.

7 એને આંચ દોરત્યેવોચ પોડી ગીયો, એને ઓ આવાજ વોનાયો, “ઓ શાઉલ, ઓ શાઉલ, તું માન કાહા સતાવતોહો?”

8 માયે જાવાબ દેનો, ઓ પ્રભુ, તું કું હેતો? ચ્યે માન આખ્યાં, આંચ ઈસુ નાજરેત ગાવા હેતાંવ, જ્યાલ તું સતાવતોહો.

9 એને મા હાંગાત્યાહાય ઉજવાડા દેખ્યા, એને જો મા આરે બોલતો આતો ચ્યાહાય ચ્યા આવાજબી વોનાયા, બાકી ચ્યા હોમજી નાંચ હોક્યા કા તો માન કાય આખી રિયહો.

10 તોવે માયે આખ્યાં, ઓ પ્રભુ, આંચ કાય કોઉ? પ્રભુવે માન આખ્યાં, ઉઠીન દમસ્ક શેહેરમાય જો, એને જીં કાય કોઅના ઠરાવલા ગીઅલા હેય તાં તુલ બોદા આખી દેવામાય ચી.

11 જોવે ચ્યા ઉજવાડા જિંગાના લીદે માન કાય નોજરે નાંચ પોડ્યા, તે માયે મા હાંગાત્યાહા આથ દોઈ લેયને દમસ્ક શેહેરમાય ચેના.

12 “તોવે હનાન્યા નાંવા મૂસા નિયમા પરમાણે ચાલનારો ચોક પોરમેહેરા ભક્ત આતો, જો તાં રોનારા બોદા યહૂદીયાહામાય માનાપાના માઅહું આતો, માપાય ચેનો,

13 એને માપાય ઉબો રોઈન માન આખ્યાં, ‘ઓ બાહા શાઉલ, પાછો એઅતો લાગ.’ ચ્યેજ ગેડી મા ડોળા ઉગડી ગીયા એને માયે ચ્યાલ એઅયો.

14 તોવે ચ્યે આખ્યાં, આંચ આગલ્યા ડાયાહા પોરમેહેરે તુલ યાહાટી ઠરાવ્યોહો કા તું ચ્યા ઇચ્છાલ જાંએ, એને ચ્યા ન્યાયી એટલે મસીહાલ એએ, એને ચ્યા આવાજ વોનાયે.

15 કાહાકા તું ચ્યા એસને બોદા માઅહા હામ્મે ચ્યે વાતહે સાક્ષીદાર ઓઅહે, જીં તુયે એઅયા એને વોનાયો.

16 આમી કાહા મોડા કોઅતોહો? ઉઠ, બાપતિસ્મા લે, એને ચ્યા નાંવ લે પોતાના પાપહાથી માફી મિળવાહાટી.

17 જોવે આંચ પાછી યેરૂસાલેમ શેહેરમાય ચેયન દેવાળામાય પ્રાર્થના કોઅઇ રીયલો આતો, તે માયે દર્શન એઅયા.

18 તોવે ચ્યે માન દર્શન દેયન આખ્યાં, ‘ઉતવાળ કોઇન ચેરૂસાલેમ શેહેરમાયને માહારી નિંગી જો, કાહાકા ચ્યા લોક જ્યા ઈહીં હેતા મા બારામાય તો સાક્ષી નાંચ માની.’

19 માયે આખ્યાં, ‘ઓ પ્રભુ તી તે તું જાંઅતોહો, કા આંચ તોવોય બોરહો કોઅનારાહાન જેલેમાય ટાકતો એને જાગા-જાગાવોય સોબાયે ઠિકાણાહામાય ઠોકાડતો આતો.

20 એને જોવે તો સાક્ષીદાર સ્તેફનુસા લોય વોવાડલાં જાય રીયલા આતા, તોવેબી આંચ તાં ઉબો આતો, એને ચે વાતમાય ભાગીદાર આતો, એને ચ્યા ખૂન કોઅનારાહા ડોગલાહા રાખવાળી કોઅઇ રીયલો આતો.’

21 એને પ્રભુય માન આખ્યાં, ‘ચાલ્યો જો, કાહાકા આંચ તુલ ગેર ચહૂદીયાહા પાય દુઉ-દુઉ દોવાડીહી.’”

22 ચ્યા લોક ચે વાતે હુદુ ચ્યા વોનાર્તે રિયે, તોવે મોઠે આવાજથી બોંબલ્યા, “ઓહડા માઅહાલ માઆઇ ટાકાં, ચ્યા જીવતા રોઅના યોગ્ય નાંચ.”

23 જોવે ચ્યા બોંબાલતા એને ઉપલ્યો ઝોબો ટાકતા એને પોતાનો ગુસ્સો દખાડાહાટી આકાશમાય ઉદળાં ઉડાવતા આતા.

24 તે સૈન્યો ટોળા જોમાદારાય આખ્યાં, “ચાલ કિલ્લામાય લેય જાયા, એને ચોપકાહાકેન ઠોકીન પારખા, કા આંચ જાંઉ કા લોક કોઅહા કારણથી ચ્યા વિરુદ્ધમાય એહેકેન બોંબલી રીયહે.”

25 જોવે ચ્યાહાય ચ્યાલ ચાંબડા પોટાથી બાંધો તોવે પાઉલે ચ્યા જોમાદારાલ જો ચ્યાપાય ઉબો રોઅલો આતો આખ્યાં, “કાય ઈ યોગ્ય હેય, કા તુમા ચોક રોમી માઅહાલ, એને તી બી વોગાર દોષી ઠોરવ્યાથી, ચાપકા ઠોકાં?”

26 જોમાદારાય ઈ વોનાયને સૈન્ય-દલા સરદારાપાય પાહાય જાયને આખ્યાં, “તું ઈ કાય કોઅતોહો? ઓ તે રોમી માઅહું હેય.”

27 તોવે સૈન્ય-દલા સરદારાય ચ્યાપાય ચેયન આખ્યાં, “માન આખ, કાય તું રોમી હેતો?” પાઉલે આખ્યાં, “હાં.”

28 ઈ વોનાયને સૈન્ય-દલા સરદારે આખ્યાં, “માયે રોમી ઓઅના પદ બોજ પોયહા દેયને મેળવ્યાહાં,” પાઉલે આખ્યાં, “આંચ તે જન્માથીજ રોમી હેતાંવ.”

29 તોવે જ્યા લોક ચ્યાલ પારાખનારે આર્તે, ચ્યે તારાત ચ્યાપાઅને ઓટી ગીયે, એને સૈન્ય-દલા સરદારબી ઈ જાઇન કા ઓ રોમી હેય, એને ચ્યે ચ્યાલ બાંધોહો, બિઇ ગીયો.

મોઠી સોબાયે હામ્મે પાઉલ

30 બીજે દિહી તો હાચ્યાં-હાચ્યાં જાઅના ઇચ્છાથી કા ચહૂદી ચ્યાવોય કાહા દોષ લાવતેહે, યાહાટી ચ્યા બંધન ખોલી દેના, એને મુખ્ય યાજકાહાલ એને બોદી મોઠી સોબાયેલ ચોકઠા ઓઅના આગના દેની, એને પાઉલાલ લેય ચેયન ચ્યાહા હામ્મે ઉબો કોઅઇ દેનો.

23

1 પાઉલે મોઠયે સોબાયે એછે ચોક્યે નોજારેકોય એઅયા, એને આખ્યાં, “ઓ બાહાંચ, માયે આજેલોગુ પોરમેહેરાહાટી બીલકુર હાચ્યાયેથી જીવન વિતાવ્યાહા.”

2 હનાન્યા મહાયાજકાય, ચ્યાહાલ જ્યે ચ્યાપાય ઉબલે આર્તે, ચ્યા મુંચાવોય થાપડાકેન ઠોકના આગના દેની.

3 તોવે પાઉલે ચ્યાલ આખ્યાં, “ઓ ઘમંડયા, પોરમેહેર તુલ ઠોકી, તું મૂસા નિયમા પરમાણે મા ન્યાય કોઅરા બોઠહો, એને પાછી કાય નિયમા વિરુદ્ધ માન માઅના આગના દેતહો?”

4 જ્યા પાહાય ઉબા આતા, ચ્યાહાય આખ્યાં, “કાય, તું પોરમેહેરા મહાયાજકા અપમાન કોઅતોહો?”

5 પાઉલે આખ્યાં, “ઓ બાહાહાય, માફ કોઅજા આંચ નાંચ જાંઅતો આતો, કા ઓ મહાયાજક હેય, કાહાકા પવિત્રશાસ્ત્રામાય લોખલાં હેય, પોતાના લોકહા આગેવાનાલ ખારાબ મા આખતો.”

6 તોવે પાઉલ ઈ જાઇન, કા કોલહાક સાફૂકી લોક એને કોલહાક પોરૂષી લોક હેય, મોઠયે સોબાયેમાય બોંબલીન આખ્યાં, “ઓ બાહાહાય, પોરૂષી એને પોરૂષીયાહા પોહો હેતાંવ, આંચ કોશિશ કોઅય રિઅલો હેય કાહાકા માન આશા હેય કા પોરમેહેર મોઅલા માઅને પાછા લોકહાન જીવતા કોઅરી યા લીદે માયેવોય સજા ચાલહે.”

7 જોવે ચ્યેય ઈ વાત આખી તે પોરૂષીયાહા એને સાફૂકીયાહામાય જગડો ઓઅરા લાગ્યો, એને સોબાયેમાય કુટ પોડી ગીયી.

8 કાહાકા સાદૂકીયાહા એહેકોય બોરહો હેય, કા માઅહું મોઅલા માઅને પાછા નાંય જીવતા ઓએ, એને નાંય તે હોરગા દૂત એને નાંય આત્મા હેય, બાકી પોરૂષીયા યા બોદહાન માનતાહા.

9 તોવે મોઠી ગરબડ ઉબી જાયી એને મૂસા નિયમ હિકાડનારા ગુરુ, જ્યા પોરૂષી આતા, ઉબા ઓઅય ગીયા એને ઈ આખીન વોદારે બોલા-બોલી કોઅરા લાગ્યા, “આમા યા માઅહામાય કાયજ ખારાબી નાંય એઅજે, એને ઓઅઇ હોકહે કા ચોક આત્મા કા ચોક હોરગા દૂતાય આ હાતે વાત કોઅયીહી.”

10 જોવે બોજ જગડો જાયો, તે સૈન્યા-દલા સરદારાય યે બિકથી કા આ પાઉલા ટુકડા-ટુકડા નાંય કોઅઇ ટાકે, સૈન્યા-દલાલ આગના દેની કા ઉતી પોડીન સોબાયે સભાસદહા વોઅ્યેથી પાઉલાલ બળજબરીથી કાડા, એને કિલ્લામાય લેય યા.

11 અ્યે રાતી પ્રભુ ઈસુય પાઉલાલ જાગે યેયન ઉબા રોયન આખ્યાં, “ઓ પાઉલ, ઈમાત રાખ, કાહાકા જેહેકેન તુયે યેરૂસાલેમ શેહેરમાય મા સાક્ષી દેની, તેહેકોયનુજ તુલ રોમમાય બી સાક્ષી દાં પોડી.”

પાઉલાલ માઆઇ ટાકના આવાડ

12 જોવે દિહી નિંગ્યો, તે યહૂદીયાહાય એકી કોઅયી, એને માનતા લેદા કા જાવ લોગુ આમા પાઉલાલ માઆઇ નાંય ટાકજે, તાંઉલોગુ ખાઅના નાંય એને પિઈના નાંય.

13 જ્યાહાય ઈ માનતા લેદેલ, આ ચાળહી જાઆહાથી વોદારે આર્તે.

14 આહાય મુખ્ય યાજકાહા એને આગેવાનાહાપાય યેયન આખ્યાં, “આમહાય માનતા લેદા કા જાવ હુદુ આમા પાઉલાલ માઆઇ નાંય ટાકજે, તાંઉ હુદુ કાયજ ખાજે પિજે નાંય.

15 યાહાટી આમી મોઠી સોબાયે હાતે સૈનિકાહા ટુકડી સુબેદારાલ હુમજાડા કા, પાઉલાલ તુમહેપાય લેય યા, જાણે કા તુમા આ બારામાય હારેરીતે જાંઅરા વિચારતાહા, એને આમા આ પોઅયના પેલ્લાજ આલ માઆઇ ટાકાંહાટી તિયાર રોહુ.”

16 બાકી પાઉલા બોઅયેહે પોહો વોનાયોકા આ આલ માઆઇ ટાકાં કોઅતાહા, તે કિલ્લામાય જાયને પાઉલાલ ખોબાર દેની.

17 પાઉલે યોક જોમાદારાલ હાદિન આખ્યાં, “ચા જુવાન્યાલ સૈનિકાહા ટુકડી સુબેદારાપાય લેય જાયા, ઓ ચ્યાલ કાય આખા માગહે.”

18 ચાહાટી સુબેદારાય પાઉલા બોઅયેહે પોહાલ સૈનિકાહા ટુકડી સુબેદારાપાય લેય ગીયા એને આખ્યાં, “કૈદી પાઉલે માન હાદિન વિનાંતી કોઅઇ, કા ઓ જુવાન સૈનિકાહા ટુકડી સુબેદારાલ કાય આખા વિચાર કોઅહે, ચાલ ચ્યાપાય લેય જાં.”

19 સૈનિકાહા ટુકડયે સુબેદારાય ચ્યા આથ દોઇન, એને ચ્યાલ આલાગ લેય જાયને પુછ્યાં, “તું માન કાય આખા માગતોહો?”

20 ચ્યે આખ્યાં, “ચહૂદીયાહાય એકી કોઅયીહી, કા તુલ વિનાંતી કોઅે કા હાકાળ પાઉલાલ મોઠયે સોબાયેમાય લેય ચેય, જાણે કા તું આજુ હારેરીતે ચ્યા બારામાય જાંઅરા માગતોહો.

21 બાકી મેરબાની કોઇન ચ્યાહા ચે વિનાંત્યે એછે દિયાન નાંચ દેઅના, કાહાકા ચ્યાહામાઅને ચાળહિથી વોદારે માઅહે પાઉલાલ માઅાઇ ટાકાંહાટી ટુંગી રીઅલા હેતા, જ્યાહાય ઈ નોક્કી કોઅઇ લેદાહા કા જાવ લોગુ ચ્યા પાઉલાલ માઅાઇ નાંચ ટાકે, તાંવ હુદુ ખાઅના પિઈના નાંચ, એને આમી ચ્યા તિયારીજ હેતા એને તું હાં આખાહાટી વાટ જોવી રોયહા.”

22 તોવે સૈનિકાહા ટુકડયે સુબેદારાય જુવાન્યાહાલ ઓ આદેશ દેયને દોવાડયો, “કાદાલ નાંચ આખના કા તુયે માન યો વાતો આખ્યોહો.”

પાઉલાલ કૈસરીયામાય દોવાડના

23 સૈનિકાહા ટુકડી સુબેદારાય બેન જોમાદારાહાન હાદિન આખ્યાં, “બેન હોવ સીપાડા, હિત્તેર ગોડહા સવાર, એને બેન હોવ બોરછા વાળાહાન કૈસરીયા શેહેરામાય જાંહાટી તિયારી કોઅઇ રાખ, તુમા રાતી નવ વાગે નિંગજા.”

24 એને પાઉલુસા મુસાફર્યેહાટી ગોડા તિયારી રાખા કા ચ્યાલ ફેલિક્સ રાજ્યપાલાપાય હારે રીતે પોઅચાડી દેય.

25 સૈનિકાહા ટુકડયે સુબેદારાય ચે પરમાણે રાજ્યપાલાલ યોક પત્ર લોખ્યાં.

26 “મહાપ્રતાપી ફેલિક્સ રાજ્યપાલાલ ક્લોદિયુસ લુસીયાસ પાઅને સલામ.

27 યા માઅહાલ યહૂદીયાહાય દોઇન માઆઇ ટાકાં વિચાર્યા, બાકી માયે જાંઅયા કા તો રોમી હેય, તો સૈનિકાહા ટુકડી લેય યેયન સોડાવી લેય યેનો.

28 એને આંય જાંઅરા માગતો આતો, કા ચ્યે ચ્યાવોય કોઅહા કારણે દોષ લાવતાહા, યાહાટી ચ્યાલ ચ્યાહા મોઠયે સોબાયેમાય લેય ગીયો.

29 તોવે માયે જાંઆય લેદા, કા ચ્યા પોતાના યહૂદી નિયમાહા વાદ-વિવાદાહા બારામાય ચ્યાવોય દોષ થોવતાહા, બાકી માઆઇ ટાકલાં જાઅના કા જેલેમાય ટાકના હારકા ચ્યામાય કાય દોષ નાંય.

30 એને જોવે માન આખલા ગીયા, કા ચ્યા યા માઅહાલ માઆઇ ટાકાંહાટી ટુંગી રીયલા હેય તે માયે તારાત ચ્યાલ તોપાય દોવાડી દેનો, એને દોષ લાવનારા યહૂદીયાહાલ બી આગના દેની, કા તો હામ્મે ચ્યાવોય દોષ લાવે.”

31 ચ્યેજ રાતી સિપાડાહાન દેનલો ગીઅલો હુકુમાલ પુરો કોઅયો: ચ્યા પાઉલાલ યેરૂસાલેમ શેહેરામાઅને લેય ગીયા એને ચ્યાલ અન્તિપત્રિસ શેહેરામાય લેય યેના.

32 બીજે દિહી ચ્યા ગોડહા સવારાહાન પાઉલાહાતે ફૈસરીયા શેહેરામાય જાંહાટી છોડીન સીપાડા યેરૂસાલેમ કિલ્લામાય ફિરી યેના.

33 ચ્યાહાય ફૈસરીયા શેહેરામાય પોઅચીન રાજ્યપાલાલ પત્ર દેના, એને પાઉલાલબી ચ્યા હામ્મે ઉબો કોઅયો.

34 રાજ્યપાલાય વાચીન પુછ્યાં, “ઓ કોઅહા વિસ્તારા હેય?”

35 એને જોવે જાંઆઈ લેદા કા કિલિકિયા વિસ્તારા હેય, તે ચ્યાલ આખ્યાં, “જોવે તોવોય દોષ લાવનારા બી યેઅરી, તે આંય તો ન્યાય કોઅહી,” એને ચ્યાય પાઉલાલ હેરોદ રાજા કિલ્લા પેહરામાય રાખાંહાટી આગના દેની.

24

ફેલિક્સ હામ્મે પાઉલ

1 પાય દિહી પાછે હનાન્યા મહાયાજુક એને ફોલહાક આગેવાન એને તિરતુલ્લુસ નાંવ્યો કાદો વકીલાલ આરે લેઈને ફૈસરીયા શેહેરામાય યેય પોઅચ્યા, ચ્યાહાય રાજ્યપાલા હામ્મે પાઉલાવોય દોષ લાવ્યો.

2 જોવે પાઉલાલ હાદવામાય યેનો તોવે તિરતુલ્લુસ આવોય દોષ થોવિન આખા લાગ્યો, “ઓ મહાપ્રતાપી ફેલિક્સ, તોથી આમહાન જો મોઠો આનંદ ઓઅહે, એને તો હોમાજદારીથી યે જાતેહાટી કોલહેક ખારાબ કામે હુદારતે જાતહે.

3 ફેલિક્સાલ આમા બોદે જાગે એને બોદોજ રીત્યેસે ધન્યવાદ હાતે માનજેહે.

4 બાકી યાહાટી કા આંય તો વોદારે સમય નાંય લા માગુ, આંય તુલ વિનાંતી કોઅતાહાંવ, કા મેરબાની કોઇન આમહે બેન ચોક વાતો વોનાય લે.

5 કાહાકા આમહાય યા માઅહાલ પિડાકારક એને દુનિયા બોદા ચહૂદીયાહામાય દામાલ કોઆડનારો, એને ઓ ચોક સમાજા આગેવાન બી હેય જ્યાલ નાજરેતનો આખલો જાહાય.

6 આય દેવાળાલ અશુદ્ધ કોઅરા વિચાર્યા, એને તોવે આમહાય આલ કૈદી બોનાવી લેદો, આમહાય આલ આમહે મૂસા નિયમાહા પરમાણે ડૉડ દેનલો જાતો.

7 બાકી સૈનિકા ટુકડયે સુબેદાર લુસીયાસે યેયન આલ બળજબરીથી આમહે આથામાયને કાડી લેદા,

8 એને ચાવોય દોષ લાવનારાહાલ તો હામ્મે યેઅના આગના દેની યે બોદયે વાતહે જ્યા બારામાય આમા આવોય દોષ લાવતાહા, તું પોતેજ આલ પારખીન જાઈ લેહે.”

9 ચહૂદીયાહાયબી આ ટેકો દેયને આખ્યાં, ચો વાતો યે પરમાણેન્યો હેય.

ફેલિક્સા હામ્મે પાઉલા જાવાબ

10 જોવે રાજ્યપાલે પાઉલાલ બોલાહાટી ઈશારો કોઅયો તે આય જાવાબ દેનો: “માયે ઈ જાઇન કા તું બોજ વોરહાથી યા દેશા લોકહા ન્યાય કોઅતોહો, એને યાહાટી આંય આનાંદથી મા જાવાબ દેતહાવ.

11 તું પોતે જાઈ હોકતોહો, કા માન યેરૂસાલેમ શેહેરમાય આરાધના કોઅરાહાટી દેવાળામાય જાયને બાસ બારા દિહી ઓઅયાહા.

12 માયેવોય આરાપ લાવનારા લોકહાય માન નાંય દેવાળામાય, નાંય સોબાયે ઠિકાણાહામાય, નાંય શેહેરમાય કાદા આરે બોલા-બોલી કોઅતા કા લોકહામાય દામાલ કોઆડતો નાંય દેખ્યો.

13 એને નાંચ તે ચ્યે વાતહે, જ્યેહે બારામાય ચ્યા આમી માયેવોય દોષ થોવતાહા, તો હામ્મે ચ્યા હાચ્યાં સાબિત કોઅઇ હોકતાહા.

14 એને આંચ તો હામ્મે કબુલ કોઅતાહાંવ, કા યા યહૂદી આગેવાનાહાન લાગહે કા આંચ ખ્રિસ્તા વાટે અનુસરણ કોઅતાહાંવ જ્યાલ ચ્યા જુઠી વાટ આખતાહા, આંચ આમહે આગલ્યા ડાયહા પોરમેહેરા ભક્તિ કોઅતાહાંવ, એને જ્યો વાતો મૂસા નિયમશાસ્ત્ર એને ભવિષ્યવક્તાહા ચોપડયેહેમાય લોખલાં હેય, ચ્યા બોદહાપે બોરહો કોઅતાહાંવ.

15 એને પોરમેહેરાથી આશા રાખહુ, કા જેહેકેન પોતે યા લોકબી રાખતાહા, કા ન્યાયી એને અન્યાય બેન્યાહાલ પોરમેહેર મોઅલા માઅને પાછો જીવતા ઉઠાડી.

16 યાથી આંચબી કોશીત કોઅતાહાંવ, કા પોરમેહેરા એને માઅહા એછે મા મન કાયામ નિર્દોષ રોય.

17 બોજ વોરહા પાછે આંચ મા ગરીબ લોકહાહાટી બેટ એને પોરમેહેરાલ બલિદાન ચોડવાહાટી યેરૂસાલેમ શેહેરામાય આંચ યેનલો આતો.

18-19 ચ્યે સમાયે ચ્યાહાય દેવાળામાય માન ચોખ્ખાં કોઅના રીત પુરી કોઅતા દેખ્યા, તાં નાંચ કાય ગીરદી આતી એને નાંચ કોહોડા પ્રકારા આવાજ આતો, બાકી આસિયા વિસ્તારામાઅને યેનલા કોલહાક યહૂદી લોક તાં આતા, જો મા વિરુદ્ધમાય ચ્યાહાન કાય આખના હેય તે ચ્યાહાય તો હામ્મે યેયન માયેવોય આરાપ લાવાં જોજે.

20 કા ઈ તું પોતેજ આખે, કા જોવે આંચ મોઠયે સોબાયે હામ્મે ઉબો આતો, તે ચ્યાહાન માંચેમાય કોઅહો ગુનો માલુમ પોડયો?

21 ચોકુજ દોષ મા વિરુદ્ધ લાવી હોકતાહા, તો ઓ હેય જોવે આંચ ચ્યાહા હામ્મે બોંબલી-બોંબલીન આખતો આતો, આજે મા તોથી ન્યાય કોઅવામાય યેય રોયહો કાહાકા આંચ બોરહો કોઅતાહાંવ કા પોરમેહેર ચ્યા લોકહાન જ્યા મોઅઇ ગીઅલા હેય બીજાદા જીવતા કોઅરી.”

22 ફેલિક્સાય, જ્યેં યે વાટે વાતો ઠીક-ઠીક રીતે જાંઅતો આતો, ચ્યાહાન ઈ આખીન ટાળી દેના, “જોવે સૈનિકાહા ટુકડયે સુબેદાર લુસીયાસ યેઅરી, તોવે તુમહે વાતે નિર્ણય કોઅહી.”

23 એને જોમાદારાલ આગના દેની, કા પાઉલાલ પેહેરા માય થોવલો જાય, એને ચ્યા હાંગાત્યાહા માઅને કાદાલબી ચ્યા ગોરાજેહે ખ્યાલ પુરી કોઅરા દેઅના.

પાઉલા ફેલિક્સ એને ચ્યા થેઅયે હાતે વાતો

24 કોલહાક દિહ્યાહા પાછે ફેલિક્સ રાજ્યપાલ ચ્યા થેઅે દ્રુસિલાલ, જું યહૂદીની આતી, આરે લેયને યેનો એને પાઉલાલ હાદાડીન ચ્યા બોરાહા બારામાય જો ઈસુ ખ્રિસ્તાવોય હેય, ચ્યાથી વોનાયા.

25 જોવે પાઉલે જું પોરમેહેરા હામ્મે હાચ્યાં હેય, તી કોઅરા એને પોતાની લોબ લાલચવોય તાબામાંય રાખના એને પોરમેહેરાથી યેનારા ન્યાયા બારામાય આખા શુરવાત કોઅયા, ફેલિક્સાય બિઅતો-બિઅતો જોવાબ દેનો, “યે સમયે તું જો, જોવે માયેપાંય સમય રોય, આંય પોતે તુલ હાદી લિહી.”

26 આમી, ફેલિક્સ ચ્યે વાતહેબારામાય બિઅતો આતો, જયો પાઉલે આખલ્યો આત્યો, તેરુંબી તો ચ્યાલ હાદતો આતો એને ચ્યા હાતે વાતો કોઅતો આતો, કાહાકા તો વિચારતો આતો કા તો જેલેમાઅને બારે નિંગાહાટી ચ્યાલ કાય પોયહા દી ઈ આશા આતી.

27 બાકી બેન વોરહે નિંગી ગીયે, તે ફેલિક્સ જાગાવોય પુરકિયુસ ફેસ્તુસ રાજ્યપાલ બોની ગીયો, એને ફેલિક્સ યહૂદીયાહાન ખુશ કોઅના ઇચ્છાથી પાઉલાલ જેલેમાયજ થોવી ગીયો.

25

ફેસ્તુસા હામ્મે

1 તીન દિહ્યાહા પાછે ફેસ્તુસ રાજ્યપાલા રુપામાય યહૂદી વિસ્તારમાય યેનો, પાછો તો કૈસરીયા શેહેરા એસને યેરૂસાલેમ શેહેરામાય ગીયો.

2 તોવે મુખ્ય યાજકાહાય એને યહૂદી આગેવાન લોકહાય ચ્યા હામ્મે પાઉલાવોય દોષ થોવ્યો.

3 એને ચ્યાહાય ફેસ્તુસાલ વિનાંતી કોઇન ઈ વિચાર્યા કા તો પાઉલાલ યેરૂસાલેમ શેહેરામાય હાદાંહાટી કૃપા કોઅે, કાહાકા ચ્યા ચ્યાલ વાટે માંયજ માઆઇ ટાકાંહાટી ટુંગી રીયલા આતા.

4 ફેસ્તુસાય જાવાબ દેનો, “પાઉલ કૈસરીયા શેહેરા જેલેમાય હેય, એને આંય પોતે માહારી તાં જાહી.”

5 પાછે આખ્યાં, “તુમહેવોય જ્યા આગેવાન હેતા ચ્યા હાતે ચાલે, એને જો યા માઅહાય કાય જુઠા કામ કોઅયાહાં, તે ચ્યાવોય દોષ લાવે.”

6 ફેસ્તુસ ચેરસાલેમ શેહેરામાય આઠ દસ દિહી રોયન તો કૈસરીયા શેહેરમાય ગીયો: એને બીજે દિહી ન્યાયા જાગાવોય બોહીન પાઉલાલ લેય ચેઅના આગના દેની.

7 જોવે તો ચેનો, તે જ્યા ચહૂદી આગેવાન ચેરસાલેમ શેહેરમાઅને ચેનલા આતા, ચ્યાહાય આહી-પાહી ઉબા રોયન ચ્યાવોય બોજ ગંભીર દોષ દેનો, જ્યા સાબિતી ચ્યા નાંય દેય હોક્યા.

8 તોવે ફેસ્તુસા બોચાવામાય પાઉલે આખ્યાં, “માયે નાંય તે ચહૂદીયાહા નિયમાહા વિરુદ નાંય દેવાળા એને નાંય કૈસરા વિરુદ, કાય ગુનો કોઅયહો.”

9 તોવે ફેસ્તુસાય ચહૂદી આગેવાનાહાન ખુશ કોઅના ઇચ્છાથી પાઉલાલ પુછ્યાં, “કાય તું વિચારતોહો કા ચેરસાલેમ શેહેરામાય જાતા, એને તાં મા હામ્મે તો ઓ ન્યાય નોક્કી કોઅલો જાય?”

પાઉલા કૈસારાલ વિનાંતી કોઅના

10 પાઉલે આખ્યાં, “આંય કૈસરીયા શેહેરા ન્યાયા જાગા હામ્મે ઉબો હેતાંવ, મા ન્યાયા ઓજ નિર્ણય ઓરા જોજે, જેહેકેન તું હારેરીતે જાંઅતોહો, ચહૂદીયાહા માયે કાય ગુનો નાંય કોઅયોહો.

11 જો ગુનેગાર હેતાંવ એને માઆઇ ટાકલાં જાય ઓહડા કાય કામ કોઅયાહાં, તે મોઅનાથી નાંય બિયું, બાકી જ્યે વાતહે યા માયેવોય દોષ લાવતાહા, જો ચ્યે માઅને કાદી વાત હાચ્ચી નાંય ઠોરે, તો કાદાલ ઓદિકાર નાંય કા ચ્યા માન ચહૂદી લોકહા આથામાય હોઅપે, મા વિનાંતી હેય કા મા ન્યાય પોતે કૈસરાથી કોઅલો જાં જોજે.”

12 તોવે ફેસ્તુસાય મંચાહા સોબાયે હાતે વિચાર કોઇન જાવાબ દેનો, “તુયે કૈસરાથી ન્યાય ઓરા જોજે યાહાટી વિનાંતી કોઅચીહી તે તું કૈસરાપાય જાહાય.”

અગ્રીખા હામ્મે પાઉલ

13 કોલહાક દિહી પાછે અગ્રીપ્પા રાજા એને ચ્યા વાહની બોઅહી બિરનીકય કૈસરીયા શેહેરામાય ચેયન ફેસ્તુસાલ બેટ કોઅઈ.

14 ચ્યાહા બોજ દિહી તાં રોયા પાછે ફેસ્તુસે પાઉલા બારામાય રાજાલ આખ્યાં, “ચોક માઅહું હેય, જ્યાલ ફેલિક્સ જેલેમાય છોડી ગીયહો.

15 જોવે આંચ ચેરસાલેમ શેહેરામાય આતો, તે મુખ્ય ચાજક એને યહૂદીયાહા આગેવાનાહાય ચ્યાવોય દોષ લાવ્યો એને વિચાર્યા, કા ચ્યાવોય ડૉડ કોઅના આગના દેનલી જાય.

16 બાકી માયે ચ્યાહાન જોવાબ દેનો, કાદા માઅહાલ ડૉડ દાં પેલ્લા, ચ્યાવોય દોષ દેનારાહા હામ્મે ઉબો રોયન ચ્યાવોય લાવલા દોષા જાવાબ દેઅના મોકો મીળો.

17 યાહાટી જોવે યહૂદી આગેવાન મા હાતે ઈહીં કૈસરીયા શેહેરમાય ચેના, તે માયે કાય વાઆ નાંચ લાવી, બાકી બીજેજ દિહી ન્યાયા જાગાવોય બોહીન, માયે હુકુમ દેનો કા પાઉલાલ આદાલતેમાય લેય ચેય.

18 જોવે ચ્યા ફીરાદીવાળા ઉબા જાયા, તે ચ્યાહાય ઓહડયે ખારાબ વાતહે દોષ નાંચ લાવ્યો, જેહેકેન આંચ હોમાજતો આતો.

19 બાકી ચ્યાહા વોચ્યે આપહે ધર્માલ લેયને એને ઈસુ નાંવા ચોક માઅહા બારામાય કાંચક બોલા-બોલી આતી, તો મોઅઈ ચુક્ચહો: બાકી પાઉલ દાવો કોઅહે કા તો જીવતો હેય.

20 કાહાકા માન નાંચ ખોબાર આતા કા ચે વાતહે હોદ-પારાખ કેહેકેન કોઉ, યાહાટી માયે પાઉલાલ પુછ્યાં, ‘કાય તું ચેરસાલેમ શેહેરમાય જાહાય, કા તાં ચે વાતહે ન્યાય કોઅલો જાય?’

21 બાકી જોવે પાઉલે વિનાંતી કોઅયી કા, ‘મા ન્યાયા ફેસલો કૈસરા ઈહીં ઓઅે,’ તે માયે આગના દેની, કા જાવ હુદુ ચ્યાલ કૈસરાપાય નાંચ દોવાહું, ચ્યા રાખવાળી કોઅલી જાય.”

22 તોવે અગ્રીપ્પાય ફેસ્તુસાલ આખ્યાં, “આંચબી ચ્યા માઅહા વોનાયા માગતહાવ. ચ્યે આખ્યાં, તું હાકાળ વોનાય લેહે.”

23 આમી બીજે દિહી, જોવે અગ્રીપ્પા એને બિરનીકે બોજ મોઠી દુમધામથી ચેયન સૈન્યાહા ટુકડયે જોમાદાર એને શેહેરા મુખ્ય લોકહા હાતે દરબારા માય પોઅચ્યે, તોવે ફેસ્તુસાય આગના દેની, કા ચ્યા પાઉલાલ લેય ચેના.

24 ફેસ્તુસે આખ્યાં, “ઓ રાજા અગ્રીપ્પા, એને યે બોદે માઅહે જ્યે ઈહીં આમહેહાતે હેતે, તુમા યા માઅહાન એઆ, જ્યા બારામાય બોદા યહૂદીહાય યેરૂસાલેમ શેહેરમાય એને ઈહીંબી બોંબલી-બોંબલીન માન વિનાંતી કોઅઇ, કા યા જીવતા રોઅના યોગ્ય નાંય.

25 બાકી માયે જાઈ લેદા કા ચ્યે ઓહૂડા કાય નાંય કોઅયાહાં કા માઆઇ ટાકલો જાય, એને જોવેકા ચ્યે પોતેજ કેસરાલ વિનાંતી કોઅયી, તે માયે ચ્યાલ રોમ શેહેરમાય દોવાડાહાટી નોકકી કોઅયા.

26 બાકી માન ચ્યા બારામાય કાય આરાપુ નાંય મિળ્યો કા સુમ્રાટાલ લિખું, યાહાટી આંય ચ્યાલ તુમહે હામ્મે એને વિશેષ કોઇન ઓ રાજા અગ્રીપ્પા તો હામ્મે લેય યેનોહો, કા પારખ્યા પાછે માન કાય લોખના મીળે.

27 કાહાકા કેદાલ દોવાડના એને જ્યા દોષ ચ્યાવોય લાવલા ગીઅલા, ચ્યાહાન નાંય આખના, માન હારાં નાંય લાગ્યા.”

26

અગ્રીપ્પા હામ્મે બોલના

1 અગ્રીપ્પાય પાઉલાલ આખ્યાં, “તુલ પોતાના બારામાય બોલના પરવાનગી હેય,” તોવે પાઉલે લોકહાન ઠાવકા રાંહાટી આથા ઈશારો કોઇન જોવાબ દાં લાગ્યો.

2 ઓ રાજા અગ્રીપ્પા, જોલ્યે વાતહે યહૂદી આગેવાન માયેવોય દોષ લાવતાહા, આજે તો હામ્મે ચ્યા જાવાબ દેઅના આંય પોતાલ ધન્ય હોમાજતાહાવ,

3 વિશેષ કોઇન યાહાટી કા તું યહૂદીયાહા બોદા રીતી રીવાજ એને ચુર્યાયો જાંઅતોહો યાહાટી આંય વિનાંતી કોઅતાહાંવ દિયાન દેયને મા વોનાય લે.

4 જોવે આંય જુવાન્યોજ આતો તોવે આંય આપહે લોકહા વોચ્યે એને યેરૂસાલેમ શેહેરમાય કેહેકેન રોતો આતો ઈ બોદા યહૂદી જાંઅતાહા.

5 યાહાટી કા ચ્યા માન જુવાન્યેથીજ જાંઅતેહે, ચ્યા ઓઅય હોકે તે, યે વાતે સાક્ષીબી દેય હોકતાહા, કા આંય યોક પોરૂષી હારકો રિયો, જું કા આમે ધર્મા બોદહાથી મોજબુત ટોળો હેય.

6 એને આજે આંચ ચ્યે કોસામે આશાયે લીદે જીં પોરમેહેરાય આમહે આગલ્યા ડાયહા આરે કોઅલી આતી, ઈહીં દોષા રૂપા માય આંચ ઉબો હેતાંવ.

7 ચ્યે કોસામે પુરાં ઓઅના આશા રાખીન, આમહે બારા કુળ પોતાના બોદા મનથી રાત-દિહી પોરમેહેરા ભક્તિ કોઅતા યેનહા, ઓ રાજા, યેજ આશાયે લીદે ચહૂદી માયેવોય દોષ લાવતાહા.

8 તોવે પાઉલે વોનાનારા બોદા ચહૂદીહાન આખ્યાં, તે લોક બોરહો કોઅતાહા કા પોરમેહેર મોઅલા લોકહાન પાછો જીવતો કોઅઇ હોકહે, તે પાછે તુમા યે વાતવોય બોરહો કોઅનાથી નાકાર કાહા કોઅતાહા કા ચ્યાય ઈસુલ મોઅલા માઅને જીવતો કોઅયો?

9 આંચબી હોમજયેલ કા નાજરેત ગાવામાય રોનારો ઈસુ નાંવા વિરુદ્ધમાય મા બોજ કાઅઈ કોઅરા જોજે.

10 એને માયે યેરૂસાલેમ શેહેરામાય એહકોયજ કોઅયા, એને મુખ્ય યાજકાહા પાઅને ઓદિકાર મેળવીન બોજ પવિત્ર લોકહાન જેલેમાય ટાક્યા, એને જોવે ચ્યાહાન માઆઇ ટાકાલા જાતા આતા, તેરુંબી ચ્યાહા વિરુદ્ધમાય પોતાની પરવાનગી દેતો આતો.

11 કોલહિક વોખાત માયે ચ્યાહાન સોબાયે ઠિકાણાહામાય શિક્ષા દેવાડી એને ઈસુવા નિંદા કોઆડતો આતો, ઈહીં હુદુ કા ઓલો ગુસ્સા કા બિજા શેહેરાહામાય બી જાયને સતાવતો આતો.

12 યે ધુંદેમાય આંચ મુખ્ય યાજકાહાથી ઓદિકાર એને આગના પત્ર લેયને દમસ્ક શેહેરામાય જાય રીયલો આતો.

13 તે ઓ રાજા, વાટયે માય બોપરી વેળે માયે આકાશમાઅને દિહયા ઉજવાડા કોઅતાબી વદારે ચોક ઉજવાડો, પોતે એને પોતાના હાતે ચાલાનારાહા ચારીયોમખી ચોમકાતા દેખ્યા.

14 એને જોવે આમા બોદા દોરત્યેવોય પોડી ગીયા, તે માયે હિબ્રુની ભાષામાય, માન આખતા ઓ આવાજ વોનાયો, ઓ શાઉલ, ઓ શાઉલ, તું માન કાહા સતાવતોહો? મા વિરુદ્ધ લોડના મૂર્ખતા હેય.

15 માયે આખ્યાં, ઓ પ્રભુ, તું કું હેય? પ્રભુય આખ્યાં, આંચ ઈસુ હેય, જ્યાલ તું સતાવતોહો.

16 બાકી તું ઉઠ, પોતાના પાગવાહાવોય ઉબો ઓઓ, કાહાકા માયે તુલ યાહાટી દર્શન દેનહા કા તુલ આંચ સેવક બોનાડુ એને જીં દર્શન

તું એઅય ચુક્યોહો, એને જું દર્શન પાછે એઅહે ચ્યા સાક્ષીદાર બી બોનાડુ.

17 એને આંય તુલ તો લોકહાથી એને ગેર ચહૂદીયાહાથી બોચાવતો રોહી, આંય તુલ ચ્યાહાપાય યાહાટી દોવાડતાહાવ કા તું ચ્યાહા ડોળા ઉગડાવે,

18 કા ચ્યા અંધકાર માઅને ઉજવાડા એછે, એને સૈતાના ઓદિકારા ઇહિને પોરમેહેરાએછે ફિરે, એને પોતાના પાપહા પોરમેહેરા પાયને માફી મિળવે, એને ચ્યા લોકહા હાતે ચોક જાગો મિળવે જ્યા યાહાટી પવિત્ર કોઅલા ગીયહો કાહાકા માયેવોય બોરહો કોઅતાહા.

19 “યાહાટી ઓ રાજા અગ્રીપ્પા, માયે ચ્યા હોરગા દર્શના પાલન કોઅયા,

20 બાકી પેલ્લા દમસ્ક શહેરા, પાછા ચેરૂસાલેમ શહેરા રોનારાહાલ, તોવે ચહૂદી વિસ્તારા બોદા ઇલાકામાય એને ગેર ચહૂદીયાહાલ માયે સંદેશ દેનો કા પાપ કોઅના છોડી દા એને પોરમેહેરાએછે ફિરીન એહેકેન જીવા કા લોકહાન ખોબાર પોડે તુમાહાય પાપ કોઅના બંદ કોઅઇ દેનહા.

21 ચે વાતહે લીદે ચહૂદી માન દેવાળામાય દોઇન માઆઇ ટાકના કોશિશ કોઅતા આતા.

22 બાકી પોરમેહેરા મોદાતકોય આંય આજે હુદુ જીવતો હેય એને હાના-મોઠા બોદહા હામ્મે સાક્ષી દેતહાવ, આંય ચ્યે વાતહેલ છોડીન કાય નાંય આખું, જું ભવિષ્યવક્તાહાય એને મૂસાય બી આખ્યાં કા ઓઅનારી હેય,

23 કા ખ્રિસ્તાલ દુઃખ વેઠાં પોડી, એને તોજ બોદહાથી પેલ્લો મોઅલાહામાઅને જીવી ઉઠીન, ચહૂદીયા એને ગેર ચહૂદીયાહાન તારણા ઉજવાડા ઘોષણા કોઅરાહાટી કા ચ્યા બોચી હોકતાહા, જું કા ઉજવાડા હારકા હેય.”

24 જોવે પાઉલ ચે રીતેથી જાવાબ દેય રિઅલો આતો, “તે ફેસ્તુસાય મોઠે આવાજથી આખ્યાં, ઓ પાઉલ, તું ગાંડો હેય, બોજ શિક્ષાણે તુલ ગાંડવાડી દેનહો.”

25 બાકી પાઉલે આખ્યાં, “ઓ મહાસમ્રાટ ફેસ્તુસ, આંય ગાંડો નાંય, બાકી હાર્યાયે એને બુદ્યે વાતો આખતાહાવ.

26 રાજાબી જ્યા હામ્મે આંય બિઅયા વોગાર બોલી રિયહો, યો વાતો જાંઅતોહો, એને માન બોરહો હેય, યે વાતેહેમાઅને કાદી ચ્યાથી દોબલી નાંય, કાહાકા તી ઘટના દોબીન નાંય ઓઅઇ.

27 ઓ રાજા અગ્રીપ્પા, કાય તું ભવિષ્યવક્તાહા બોરહો કોઅતોહો? હાં, આંય જાંઅતાહાંવ, કા તું બોરહો કોઅતોહો.”

28 આમી અગ્રીપ્પાય પાઉલાલ આખ્યાં, કાય તું વોછાજ હોમજાવાથી માન ખ્રિસ્તી બોનાડા માગતોહો?

29 પાઉલે આખ્યાં, “પોરમેહેરાલ મા પ્રાર્થના ઈ હેય કા કાય વોસામાય, કાય વોદારી માય, ખાલી તુંજ નાંય, બાકી જોલા લોક આજે મા વોનાતાહા, મા ઇચ્છા હેય કા તુમા બોદા મા હારકે ખ્રિસ્ત્યા બોનહા બાકી ચોક કૈદા રુપામાય નાંય.”

30 તોવે રાજા એને રાજ્યપાલ એને બિરનીકે એને ચ્યાહા હાતે બોહનારા ઉઠીન ઉબા રિયા એને જાતા રિયા.

31 જોવે ચ્યા બારે જાય રીઅલા આતા, ચ્યા ચોકબિજાલ આખા લાગ્યા, “ચા માઅહાય મોરણા સજા કા જેલેમાય ટાકના લાયક્યે કાય ગુનો નાંય કોઅયોહો.”

32 અગ્રીપ્પાય ફેસ્તુસાલ આખ્યાં, “જો ઈ માઅહું કૈસરાલ વિનાંતી નાંય કોઅતો, તે છુટી હોકતો આતો.”

27

પાઉલાલ રોમમાય દોવાડના

1 જોવે ફેસ્તુસ રાજ્યપાલથી ઈ નોકકી ઓઅયા કા આમા જાહાજથી ઇટલી વિસ્તારામાય જાતા, તે રોમી ઓદિકાર્યાહાય પાઉલ એને કોલાહાક બિજા કૈદયાહાલબી યુલિયુસ નાંવા શતપતી આથામાય હોઅપી દેના, યુલિયુસ સમ્રાટ ઓગુસ્તુસ સૈનિકાહા ટુકડી જોમાદાર આતો.

2 અદ્રમુત્તિયુમ શેહેરા ચોક જાહાજાવોય જું આસિયા વિસ્તારા મેરાવોર્યા જાગામાય જાં તિયાર આતા, બોહીન આમાહાય આમે

મુસાફરી સુરુ કોઅઇ દેની, એને અરિસ્તર્ખુસ નાંવા જો મોકોદુનિયા વિસ્તારા થેસ્સાલોનિક શેહેરા રોનારો આતો આમે હાતે આતો.

3 બીજે દિહી આમા સિદોન શેહેરામાય પોઅચી ગીયા એને, યુલિયુસાય પાઉલાવોય દોયા કોઅઈન ચ્યાલ દોસ્તારાહાઈહી જાં દેના કા ચ્યાહા જરુરી વસ્તુ લી યેય.

4 તાંઅરે આમહાય બીજેદા મુસાફરી સુરુ કોઅચી એને હામ્મેને વારો યા લાગ્યો, યા લીદે આમહાન સાઇપ્રસ બેટા ઇહિને આગલા જાં પોડ્યા.

5 એને કિલિકિયા વિસ્તાર એને પંકૂલિયા વિસ્તારા મેરાવોયને દોરિયામાઅને લૂસિયા વિસ્તારા મૂરા શેહેરામાય પોઅચ્યા.

6 તાં સરદારાલુ સિકન્દરિયા શેહેરા ચોક જાહાજ ઇટલી વિસ્તારમાય જાતા મિથ્યાં, એને ચ્યાય આમહાન ચ્યા જાહાજ વોય ચોડવી દેના.

7 જોવે આમા બોજ દિહયા હુદુ દિરે-દિરે ચાલીન બોજ કઠાણતા થી કનિદુસ શેહેરા હામ્મે પોઅચ્યા, તે યાહાટી કા હામ્મેથી વારો આમહાન આગલા નાંચ જાં દેતો આતો, આમા સલમોના હામ્મેથી કેતે બેટ બાજુ માઅને ચાલ્યા.

8 એને ચ્યા મેરા-મેરાવોય કોઠાણ થી ચાલીન સુંદર બંદર નાંવા ચોક જાગાવોય પોઅચ્યા, તાઅને લસયા શેહેર પાહી આતા.

પાઉલા બોલનાલ નાંચ વોનાના

9 જોવે બોજ દિહી વિતી ગીયા, એને દોરિયામાઅને મુસાફરી માય આબદા યાહાટી ઓઅતી આતી કાહાકા ઉપાસા દિહયે સણ પુરો ઓઅઇ ગીઅલો આતો. એને ઓજ તો મોસામ હેય, જોવે દોરિયો બોજ ખતરનાક ઓઅય જાહે યાહાટી પાઉલે ચ્યા બોદહાન ઈ આખીન હોમજાડ્યા,

10 “ઓ બાહાહાય, માન એહેકોય જાણાયેહે કા યે મુસાફરી માય આબદા એને બોજ નુકસાન, નાંચ ખાલી માલ એને જાહાજા બાકી આપહે જીવાલ બી ઓઅનારા હેય, યાહાટી મા ઈ સલાહા હેય કા આપા ખતરા મોસમા પાછે હુદુ ઈહીં વાટ જોવજે.”

11 બાકી સુબેદારાય કેપ્તાન એને જાહાજા માલિકા વાતહેલ પાઉલા વાતહે કોઅતા વોદારે માન્યા.

12 સુંદર બંદર નાંવા ચોક બંદરગાહ હિયાળો દિહી કાડનાહાટી સુરક્ષિત નાંચ આતા, યાહાટી બોજ જાંઅહા વિચાર જાયો કા તાઅને આગલા નિંગી જાય જો કોઅહિબી રીતે ઓઅઇ હોકે તે ફીનિક્સ બંદરગામાય પોઅચીન હિયાળા દિહી કાડજે, ઓ તે કેતે બેટા મેરાવોય ચોક બંદરગો હેય, જ્યા દોરવાજો દક્ષીણ-પચ્છીમ એને ઉત્તર-પચ્છીમ એછે હેય.

દોરિયામાય તુફાન

13 જોવે દક્ષિણા વાય-વાય વારો ચાલા લાગ્યો, તોવે ચ્યાહાય વિચાર્યા કા ચ્યા યોજનાયે પરમાણે ફીનિક્સ પોઅચી જાહું, યાહાટી ચ્યાહાય લંગાર ઇસી લેદો એને કેતે બેટા મેરા દોરિયામાઅને ઓઇન આગલા વોધા.

14 બાકી વાયજ વાઅયે બેટા એહેરે ચોક મોઠો તુફાન ઉઠયો, જું ચૂરકુલીન આખાયેહે.

15 જોવે તુફાન જાહાજેલ લાગ્યો, તોવે જાહાજ વારા હામ્મે ઠોરી નાંચ હોક્યા, યાહાટી આમાહાય જાહાજેલ વારા હામ્મે છોડી દેના, એને યે રીતે વોવતા જાતા રિયા.

16 કૌદા નાંવા ચોક વાહના બેટા આલુડ પોઅચીન જાહાજા પાછાડી બાંદલા ઉડ્યા સુરક્ષિત કોઅનામાય સક્ષમ રિયા, બાકી એહેકેન કોઅના બોજ મુસ્કિલ આતાં.

17 પાછે જાહાજ ચાલાડનારા જીવનરક્ષક જાહાજેલ ઉચકીન ચ્યેલ સુરક્ષિત કોઅયા બોજ યુક્તિ કોયન જાહાજેલ નિચેથી લેયને ઉચે હુદી આસડાકોય ખેચીન બાંદી દેના એને સુરતિસ ખાડયે રેઅટાવોય ફસાય જાઅના બિકથી ચ્યાહાય લંગાર ઉતાડીન જાહાજેલ વોવતા વારા હાતે-હાતે વોવીજાહાટી છોડી દેના.

18 જોવે આમાહાય તુફાનાથી બોજ વારા કોઇન બોજ આલાં લાગ્યા એને ઘોક્કા ખાદાં, તોવે બીજે દિહી ચ્યા જાહાજા માલ ટાકાં લાગ્યા.

19 એને તીજે દિહી ચ્યાહાય ચ્યાહા આથા કોઇન જાહાજા માલ સામાન ટાકી દેના.

20 જોવે બોજ દિહયા હુદુ નાંચ દિહી નાંચ ચાંદાલે દેખાય, એને મોઠો તુફાની વારો ચાલતો આતો, તોવે છેલ્લે આમે બોયના આશા જાતી રોયી.

21 જોવે ય્યા બોજ દિહયા હુદુ બુખા રોય ચુક્યા, તે પાઉલે ય્યાહા વોચ્ચે ઉબો રોયન આખ્યાં, “ઓ લોકહાય, જો કેતે ઇહિને જાઅના મા સલાહા તુમા માની લેતા તે તુમા યા વિનાશ એને નુકસાન થી બોચી જાતા.

22 બાકી આંચ તુમહાન આમી હોમજાડુહું કા ઈમાત રાખા, કાહાકા તુમહેમાઅને કાદાજ જીવા નુકસાન નાંચ ઓઅરી બાકી જાહાજા નોકીજ નુકસાન ઓઅરી,

23 કાહાકા પોરમેહેર જ્યા આંચ હેય, એને જ્યા ભક્તિ કોઅહુ, ય્યા હોરગા દૂતાય ગીચી રાતી માપાય ચેયન આખ્યાં.

24 ‘ઓ પાઉલ, બીયહે મા તુલ કૈસરા હામ્મે ઉબા રોઅના જરુરી હેય, એને પોરમેહેરાય બોદહાન જ્યા તોઆરે મુસાફરી કોઅતાહા, ય્યા બોદહાન વરદાન દેનહા.’

25 યાહાટી, ઓ માઅહાય, ઈમાત રાખા, કાહાકા આંચ પોરમેહેરાવોય બોરહો કોઅહુ, કા જેહેકેન માન આખવામાય ચેનહા, તેહેકેનુજ ઓઅરી.

26 બાકી આમહાન ચોકદા બેટવોય જાયને રા પોડી.”

જાહાજા ટુટી જાયના

27 જોવે ચૌવુદવી રાત ઓઅઇ, એને આમા આંદ્રિયા દોરિયામાય બટકી રીઅલા આતા, તોવે આરદે રાતી પાહી જાહાજા ચાલાડનારાહાય જાંઅયા કા આમા ચોકદા મેરા પાહી પોઅચી રીયહા.

28 ય્યાહાય પાઆઈ માપા દોરી ટાકી તોવે ય્યાહાન સત્રીસ મીટર ઉંડા પાઆઈ માલુમ પોડ્યા, એને વાહાય આગલા જાયને પાછા પાઆઈ માપા દોરી ટાકી તોવે સત્યાવીસ મીટર માલુમ પોડ્યા.

29 તોવે દોગડા વાળી જાગામાય ઠોકાય જાય ય્યા બિકથી ય્યાહાય જાહાજા પાહલા ચાર લંગાર ટાક્યા, એને દિહી નિંગા વાટ જોવી રિયા.

30 બાકી જાહાજા ચાલાડનારા જાહાજા વોઅને નાહા કોઅતા આતા, એને ય્યાહાય જાહાજા હામ્મેથી લંગાર ટાકના બહાના કોઇન વાહની ઉડી દોરિયામાય ઉતાડી દેની;

31 તોવે પાઉલે સુબેદારાલ એને સૈનિકાહાલ આખ્યાં, જો યા જાહાજાવોય નાંચ રોય, તે તુમાબી નાંચ બોચી હોકહા.

32 તોવે સૈનિકાહાય દોરડે કાતરી ટાક્યેં એને વાહના ઉડ્યાંલ પાડી ટાક્યા.

33 જોવે ઉજાળાં ઓઅનારા આતા, તોવે પાઉલે ઈ આખીન, બોદહાન ખાઅના ખાંહાટી રાવ્યો કોઅયા, “આજે ચૌવુદમો દિહી ઓઅયો કા તુમા ચિંતા કોઅતા-કોઅતા બુખા રિયા, એને કાંઇજ ખાઅના નાંચ ખાદાં.

34 યાહાટી આંચ તુમહાન આખહુ કા કાય ખાય લા, જયાથી તુમહે બોચાવ ઓઅે; કાહાકા તુમહેમાઅને કાદાબી નાશ નાંચ ઓઈ.”

35 એને ઈ આખીન ચ્યાય બાખે લેઈને બોદહા હામ્મે પોરમેહેરા આભાર માનીન એને બાખે તોડીન ખાં લાગ્યો.

36 તોવે ચ્યા બોદા ઈમાત કોઈન ખાઅના ખાં લાગ્યા.

37 આમા બોદા મિળીન જાહાજેમાય બોસો છોતેર જાંઆ આતા.

38 જોવે ચ્યા ખાઅના ખાયન દારાયા, તોવે ગોંવ દોરિયામાય ટાકી દેયને જાહાજ ઓળકાં કોઆ લાગ્યા.

39 જોવે દિહી નિંગ્યો, તોવે ચ્યાહાય ચ્યા દેશાલ નાંચ વોળખ્યો, બાકી ચોક નોયાડો દેખ્યો, જયા મેરો ચોરાસ આતો, એને વિચાર કોઅયો એહેકોય ઓઈ હોકે તે ચ્યાવોય જાહાજ ઉબો રાખાયી.

40 તોવે ચ્યાહાય લંગારાહાલ ખોલીન દોરિયામાય છોડી દેના એને ચ્યેજ વેળે સુકાનના બી બોદાંજ દોરડા ખોલી દેના એને વારા હામ્મે આગલાર્યો ભાગ ચોડવીન મેરાવોય લેય ચાલ્યા.

41 બાકી બેન દોરિયા ચોકઠા ઓઅના તાં રેઅટા જાગે જાહાજા આગલો ભાગ ખુઅપાય ગીયો, ચ્યાહા જાહાજ ઉબા કોઅયા ચ્યા આગલા નાંચ વોદ્યા, બાકી જાહાજ પાહાલાને ભાગ લાફાહા કોઈન ટુંટા લાગ્યો.

42 તોવે સૈનિકાહાન વિચાર યેનો કા કૈદ્યાહાલ માઆઇ ટાકના, એહેકોય નાંચ ઓઅે કા કાદો જેપીન નિંગી જાય.

43 બાકી શતપતી પાઉલાલ બોચાડના ઇચ્છાથી ચ્યા વિચારથી રોક્યો, એને ઈ આખ્યાં કા, “જો જેપી હોકહે, પેલ્લા કુદીન મેરે નિંગી જાય.

44 જયા જેપી નાંચ હોકે, ચ્યાહાય પાટ્યાહાવોય, એને બિજા જાહાજા કાય બીજી વસ્તુ આસરો લેઈને નિંગી જાય.” યે રીતેથી બોદાજ હારેરીતે મેરે પોઅચી ગીયા.

28

માલ્ટા બેટમાય પાઉલા સ્વાગત

1 જોવે આમા બોદા મેરે હારેરીતે પોઅચી ગીયા, તોવે ખોબાર પોડ્યા કા ઓ બેટ માલ્ટા આખવામાય યેહે.

2 એને તાં રોનારા લોકહાય આમેવોય બોજ મોઠી દયા દેખાડી; કાહાકા હિયાળો આતો એને વરહાદ ઓઅરા લાગ્યો યાહાટી ચ્યાહાય આગ હોલગાડી એને આમે બોદહા સ્વાગત કોઅયા.

3 જોવે પાઉલ લાકડે ચોકઠે કોઇન બાઆ લી યેયન આગ્યેવોય થોવ્યો, તોવે ચોક જેરીવાળા હાપડાં હંકથી નિંગ્યા એને ચ્યા આથા આરે વેટળાય ગીયા.

4 જોવે તાં રોનારા લોકહાય હાપડાલ ચ્યા આથા આરે વેટળાલા દેખ્યા, તોવે આપસમાય આખ્યાં, “હાયુલ ઈ માઅહું ખૂની હેય, કા જો દોરિયાકોય બોચી ગીયો, તેરુ ન્યાયે જીવતા રા નાંય દેના.”

5 તોવે ચ્યાય હાપડાલ આગડામાય ઝટકિ દેના, એને ચ્યાલ કાય નાંય જાયા.

6 ચ્યા લોક વાટ જોવાં આતા કા તો હુજી જાય, યા ચોકાચોક પોડીન મોઅઇ જાય, બાકી જોવે ચ્યા બોજ વાઆ લોગુ એઅતા રિયા એને એઅયા કા ચ્યા કાયજ નાંય બગડયા, તોવે આજુ વિચાર કોઇન આખ્યાં, “ઓ તે કાદો દેવ હેય.”

7 ચ્યા જાગા આજુ-બાજુ પુબલીયુસ નાંવા ચ્યા બેટા ઓદિકારી આતો ચ્યા જાગો આતો, ચ્યાય આમહાન ચ્યા ગોઅો લી જાયન તીન દિહી પ્રેમથી દોસ્તારા હારકી ગાવાર ચાકરી કોઅયી.

8 પુબલીયુસા આબહો બોજ જોરાકોય એને ઑંવ લોય કોય રોગી એને મરડા થી પીડાતો આતો. આમી પાઉલે ચ્યા ગોઅો ખોલ્યેમાય જાયન પ્રાર્થના કોઅયી, એને ચ્યાવોય આથ થોવિન ચ્યાલ હારો કોઅયો.

9 જોવે ઓહડા ઓઅયા, તે ચ્યા બેટવોય રોનારે બીજે બિમાર માઅહે પાઉલાપાય યેને એને હારે કોઅવામાય યેને.

10 ચ્યાહાય આમહે બોજ આદર કોઅયો, જોવે આમા જાતા લાગ્યા તોવે જી કાય આમેહાટી જરુરી આતા, તી જાહાજા માય થોવી દેના.

માલ્ટા બેટ થી રોમ એછે

11 તીન મોયના પાછે આમા આલેક્સાંદ્રીયા ચોક જાહાજ માય બોહીન નિંગ્યા, તી જાહાજ હિયાળા લીદે યા બેટવોય ઉબા રીઅલા

આતા, ય્યા જાહાજા આગલ્યા ભાગા વોય જુડવા દેવહા યોક ચિન્હ આતાં. યુનાની ભાષામાય જુડવા દેવહાન દિયુસકુરી આખલા જાય.

12 પાછે સુરકુસાસ શેહેરામાય જાયને આમા ત્રીન દિહીહુદુ રિયા.

13 તાઅને આગલા આમા ફિરીન રેગિયુમ શેહેરામાય પોઅચ્યા; એને યોક દિહી પાછે દક્ષીણ માય હાવા ચાલ્યો, તોવે આમા બીજે દિહી પુત્યેલી શેહેરામાય પોઅચ્યા.

14 તાં આમહાન કોલાહાક વિસ્વાસી બાહા મિળ્યાં, એને ય્યાહા આખવાથી આમહાન યોક આઠવાડ્યા ય્યાહાઆરે રા આખ્યાં, એને પાછે આમા રોમ શેહેરામાય જાયના શુરવાત કોઅચી.

15 રોમ શેહેરામાઅને કોલહાક વિસ્વાસ્યા વોનાયા આમા તાં યેય રીયહા એને ય્યા આમહાન મિળ્યાં એને આમહાન રોમ લેય જાંહાટી અપ્પિયુસ ગાવા બાજાર એને ત્રીન-સરાઈ નાંવા જાગાહુદુ યેના. ય્યાહાન દેખીન પાઉલે પોરમેહેરા ઘન્યવાદ કોઅચા એને બોજ ઉસરાય ગીયો.

16 જોવે આમા રોમ શેહેરામાય પોઅચ્યા, તોવે પાઉલાલ યોક સીપાડા આરે જો ય્યા રાખવાળી કોઅરા આતો, યોખલા રોઅના આગના મિળી.

પાઉલ રોમમાય

17 ત્રીન દિહ્યાહા પાછે ય્યાય યહૂદી આગેવાનાહાન હાદ્યા, એને જોવે ય્યા યોકઠા જાયા તોવે ય્યાહાન આખ્યાં, “ઓ મા બાહાહાય, માયે પોતાના લોકહા વડીલાહા વ્યવહારા વિરુદ્ધમાય કાયજ નાંય કોઅચાહાં, તેરુંબી કૈદી બોનાડીન યેરસાલેમ શેહેરમાઅને રોમી ઓદિકાર્યાહા આથામાય હોઅપી દેના.

18 ય્યાહાય માન પારખીન છોડી દેઅના વિચાર્યા, કાહાકા માંયેમાય મોઅના હારકા કાય દોષ નાંય આતો.

19 બાકી જોવે યહૂદી આગેવાન ય્યા વિરુદ્ધમાય બોલા લાગ્યા, તે માન કૈસરા પાઅને માંગ કોઅરા પોડી કા ઈર્હી રોમમાય મા ન્યાય કોઅે ઈ નાંય કા માન પોતાના લોકહાવોય કાય દોષ લાવના આતો.

20 યાહાટી માયે તુમહાલ હાદ્યાહા, કા તુમહાન મિળું એને વાતચીત કોઉ; કાહાકા ઈસરાયેલા લોકહા આશાહાટી જો ખ્રિસ્ત હેય, જ્યા લીદે આંય યે હાકળેથી બાંદાલો હેતાંવ.”

21 ચ્યાહાય ચ્યાલ આખ્યાં, “નાંચ આમહાય તો બારામાય ચહૂદીયા વિસ્તારામાઅને ચિહ્વો મિળવ્યો, એને નાંચ બાહાહા માઅને ચોકતાંચ ચેયન તો બારામાય કાય આખ્યાં, એને નાંચ ખારાબ આખ્યાં.

22 બાકી તો વિચાર કાય હેય? તી આમા તોથી વોનાયા માગતાહા, કાહાકા આમા જાંઅતાહા કા બોદા જાગામાય ચા બારામાય વિરુદ્ધમાય વાતો કોઅતેહે.”

23 તોવે પાઉલાહાટી ચ્યાહાય ચોક દિહી ઠોરવ્યો, એને બોજ બોદા લોક ચ્યા તાં ચોકઠા ઓઅયા, એને તો પોરમેહેરા રાજ્યા સાક્ષી દેતા, એને મૂસા નિયમશાસ્ત્ર એને ભવિષ્યવક્તાહા ચોપડયેહે માઅને ઈસુ બારામાય હોમજાડી-હોમજાડીન હાકાળેહેથી વોખાતાહાલોગુ વર્ણન કોઅતો રિયો.

24 તોવે કોલહાક લોકહાય પાઉલા વાતેહેવોચ બોરહો કોઅયો, બાકી કોલહાક લોકહાય બોરહો નાંચ કોઅયો.

25 પાછી આપસમાય ચોક બિજા આરે સહમત નાંચ ઓઅય હોક્યે, ચ્યે તાંઅરે જાં લાગ્યે, તે પાઉલા ચે ચોક્યે વાતે આખનાથી જાતા રિયા : “પવિત્ર આત્માય ચશાયા ભવિષ્યવક્તા દ્વારા તુમહે ડાઅચાહાન ઠીક આખ્યાં,

26 જાયને ચ્યા લોકહાન આખ, કા વોનાયા કોઅતાહા બાકી હોમજે નાંચ, એને એઅેયા કોઅતાહા બાકી ચ્યાહાન દેખાય નાંચ.

27 કાહાકા ચા લોકહા મન જડ, એને ચ્યાહા કાન બોઅર્યા ઓઅઇ ગીયહા, એને ચ્યાહાય પોતાના ડોળા બોંદ કોઅચાહાં, ઓહડા નાંચ ઓઅે કા ચ્યે કોદહી ડોળાહાકોચ એઅે, એને કાનાહાકોચ વોનાય, એને મન કોચ હોમજે એને જીવના ખારાબ તરીકાહા થી મા એછે ફિરે, એને આંચ ચ્યાહાન હારો કોઉ.”

28 ચાહાટી તુમા જાંઆ, કા પોરમેહેરા ઈ તારણા કાહાની ગેર ચહૂદીયાહા પાય દોવાડલી ગીયહી, એને ચ્યે માની લી.

29 જોવે ચ્યાચ ઈ આખ્યાં તે ચહૂદી ચોક બિજા આરે બોજ બોલાબોલી કોઅરા લાગ્યા એને તાઅને જાતા રિયા.

30 પાઉલ પુરે બેન વોરહે પોતાના ભાડાથી લેદલા ગોઆમાય રિયો,

31 એને જ્યા ચ્યાપાય ચેતા આતા, ચ્યા બોદહાન મિળતો રિયો એને બિહ વોગાર એને રુકાવાટ વોગર પોરમેહેરા રાજ્યા પ્રચાર કોઅતો એને પ્રભુ ઈસુ ખ્રિસ્તા વાતો હિકાડતો રિયો.

गामीत नोवो इरात
Bible in Gamit language of India

copyright © 2022 Beyond Translation

Language: (Gamit)

Contributor: Wycliffe USA

Read and download Bible and several other Christian materials in various formats : www.freebiblesindia.in

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-02

PDF generated using Haiola and XeLaTeX on 2 May 2025 from source files dated 2 May 2025

4883a606-3c54-5975-b41a-ca7f8faf825d